

PL
248
S233H3

Şahābeddin, Cenāb
Hac yōlunda

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY





Şahābeddīn, Cenāb

جناب شهاب الدين

حج یولوندا

Hac yölunda




استانبول

مطبعة احمد احسان

۱۳۲۵

PL
248
523343



961238

برنجی مکتوب

« الفاهره » واپورنده

صوك دودوك هوايى چاچاك ايتدى: تشييع ايجون
كلنرك صوك نظرلرى كیده جكلرك كوزلردن بوسه وداع
ايستيور .. مرديون تلاش ايله چيقانلردن زياده تلاش
ايله اينلرله مملو .. كوكرته كيتدجه تنهالاشيور . بعض
كوزلرده ياش ، بعضيلرنده برتبسم محزونانه ، بعضيلرنده
درين برطور غونلق وار . آرتق بتون السنه سهل الاستفهام
بروولاپوك حكمنى آلدى : هپسى يكمال .. هپسى تحسر
واشتياقدن ، تمنى سلامت وملاقاتدن بحث ايدييور ؛
ترك ، عرب ، روم ، فرانسر ، ايتاليان .. هپسى كندى
لسانيله عين شيلرى سويليور .

خارجده قايقجيلرك آوازه دعوتى ، دها اوزاقده
قوجه شهرك غمغمه نهاريه سى .

برقادين المدين طومش ، كريان برسسله توصيه

ايدييور :

— صاقین مکتوبلرکی اھمال ایتمه ، ھراسکله دن بردانه
ایسترم ؛ ھر پوسته ایلہ بر خبر ایسترم .. ایکی سطر ، بر
سطر برشی ؛ بکا او قدری یتیشیر ..
اوت ، بر قادین : والدہم ! .. زواللی والدہم کہ
اونو تلیش برقاج شیئی وسیلہ اتخاذا ایدہ رک ، کاغده
صار دیغی برپا کتله بر لکده ، آرقہ مدن واپورہ قدر کلش ؛
نی تشجیع وتسلیہ ایچون آغلایامغه چالیشیور ،
کوزلرینک کنارینی براحرار حزین ایلہ شیشیرن یاشلری
حبس ایچون روح شکیننی آووجنه آلمش صیقیور .. بکا
بر نظرلہ ، اویلہ بر نظرلہ باقیور کہ موته محکومتندن
خبردار اولان برخسته آینه ده کی خیالنه انجق اویلہ
باقہ بیلیر .. بن اک عادی بهانه لرلہ باشمی باشقه طرفلہ
جویریور ، بومشفق قادینک سیالہ نظرندن آلدیغم
تأثر شدیدی تعدیلہ غیرت ایدیوردم .. بردنبرہ دیدم کہ :
— ھایدی ، آرتق سن چیق ؛ صوکرہ واپورده
قالیرسک ..

واپور ایچنده ایکی ساعتدنبری دوام ایدن کورلتی
آرتق کیلمش ، باش قبودان — اوزون ، صیق قرال
صاقاللی .. اورته بویلو ، طیقنازجه ، پنبہ چهرہ لی بر
ایتالیان — واردیاده ایلک قوماندالرینی ویریور ، آره صره

طائفه لردن بری قوشیور، چوزولن خلاطارك طویلا.
 نمسندن متشکل بر خرخره منقطعه ایشیدیلوردی ؛
 وینجک ولوله آهینی صوصمش ، ماکنه نک غمغه
 رعشه داری باشلایه جقدی ..

بر آقشام اول شرفیاب ملاقاتی اولدیغم بر ذات یانمه
 کلدی ؛ النده بر قارت واردی ؛ قارتی اوزاتدی :
 — خالد ضیا بک : « بوکون حرکتلرندن امین
 اوله یدم ، مطلقا واپوره کلیردم .. دیدی .

او کوچک ، او متواضع قارتک اوزرنده شو بیوک
 اسمی اوقودم : خالد ضیا ! .. تشکر ایدرم ، عزیزم ،
 امین اولیکز که او وداعنامه قیمتداری قیصقانیج بر اعتنا
 ایله محافظه ایده جکم ..

باجادن چیقان قالین ، حلزونی دومان استانبول
 اوستنه یاییلوردی ؛ کوکرته ده انجق یولجیلر قالمشاردی .
 واپوره قدر کلن بر قاق یار مشفقه وداعلاشدق ؛ آرتق
 بوکوزل کوزلرده مردیونه توجه ایتدی ؛ « کوزل کوزلر ،
 دیورم ، چرنکه هپسند برر قطره اشک شفقت
 واردی ...

بردودک دها .. صوکره واپور حرکت ایتدی .
 هرکس جبندن مندیانی چیقارییوردی ؛ بعضیسی کوزلرینی

سیلمك ، بعضیسی ده صوك اشارت وداعیه ایچون ..
 بو آرهلق هرکس واپورك اسکله طرفنه قوشدی :
 طلبه علومدن بری آنجق — قالدیرلق اوزره اولان ،
 مردیونك صوك قدمه سنه صاریله جق قدر بروقت بوله
 بیلمشدی ؛ بیچاره ، شالوارینی ایصلا تمامق ایچون
 باجاقلرینی قیصمش ، مردیونه آسیلی قالمشدی .. برایکی
 دقیقه بویله قالدی ، قوتی کیسیلوب دکنزه کیتمسنه پك
 آذربر زمان دها ایستردی . ایکی جسور طائفه نك
 مساعی جدیه سی او احتمال مهلکی برطرف ایتدی .
 هر طرفدن مندیللار صالانیور ، صوك تلائم وداعیه
 بوتموچلره تودیغ اولنیوردی ..

سرای روتنی طولاشدق ؛ حصار محیطك بر قسمی
 اویمه لی برنطاق سیمین کی کوروندی ... برطرفده بك
 اوغلی طبقات ابنیه سنك سیمای سنکینندن برر چشم تهی
 طرزنده باقان نامتاهی پنجره لر ، برطرفده قویومنکشه
 رنگلی برکولکه ایچنده قالان اسکدار محله لری ، بر
 طرفده مرمره نك خاره لی سطح کبودی ... آقشام
 کونشی بولوطلر ، تپه لر ، آقاچلر اوزرنده بیکلرجه
 ملاعب ضیائییه ، بیکلرجه دسته انوار والوان ایله انبات
 وجود ایدیور . سما صاف ، دکنز برسمای مستوی کی

۵
راکد .. « القاهرة » بر کتلهٔ سحاب کی اوسمای را کد
اوزرندن قایوب کیدیور .

آیاستفانوسی کچدک : آرتق استانبول بر قطع زائد
شکلنی آلدی ؛ بوشکل منحنینک ایکی نهایتنده ایکی فنار
کورو نیور ، بر حدی فنار باغچه سی ، بر حدی آیاستفانوس ..
اورته ده ، بو خطک خار جنده آطه لر که دکزک سینئه کبودی
اوزرنده برر پستان سیاه کی مرئی اولیور ...

صولرک انشقاقدن متولد بر خیش-یرتی ، ما کنه نك
غمغمهٔ موزونه سی ، بر رعشهٔ منتظمه .. اطرافده تنها
ساحلار .. ملایم ، فقط سرین بر روز کار ؛ واپور
کیدیور ، برقاج مارطی سمت رأسمزده کشاده بال
تشییع . اوزاقدہ بیاض قانادلری آچیق برقاج یدکن
کیمیسی .. صولده بوز بورون که کملیک کور فزینک مدخلنی
مدانیه وبروسه یوللرینی کوسترییور .. داخلده یولجیلر
یرلشیورلر .. ایشته هپسی بوقدر . آرتق توتون ایچنلره
مخصوص کوچک سالونه کیروب بر سیغاره ایچملی ..

کوچک سالونده یالکیز بر اجنبی واردی ؛ علی الا-
صول خفیف بر باش اکنیتسیله کنیدیسی سلاملاق .
سیغاره می یاقدم . شیمدی فکرم سیغاره مدن چیقان
ماوی دومان کی متموجدی : کاه کری یه طوغری

کیدییوردی : اوده کیلری ، اوراده براقدیغم بوشلغی ،
 بو بوشلغک یمک زمانلرنده اونلری نه قدر صیقه جغنی ،
 برقاج آی دوام ایده جک اولان بوافتراقک اونلره نه قدر
 اوزون کله جکنی .. صوکره بتون اودای محترمه پی ،
 بونلرک ایجاب ایتدجکه بنی هانکی لسانله یادایده جکارینی ،
 ایشته شوآنده مطلقا بندن - آه ، بو اعتقادات خود
 کامانه ! - بحث ایتدکلرینی دوشونیوردم ؛ گاه فکر
 ونظرم ایلری یه منعطف اولیوردی ؛ طریق سیاحتیمک
 نقطه انتهاییه سنده سیاهلره بورونمش بر موقع مبارک ،
 او ارض مقدسه ایلله بولندیغمز نقطه آره سنده اسکندریه پی ،
 طنطه پی ، قاهره پی ، سویشی ، ینبوعی ، جده پی کوریوردم .
 بوموقعلردن هنوز معلوم اولانلر حقنده کی خاطر اتمی
 جمعه چالیشیور ، دیکر لر ی حقنده کی مسموعا تمه بر نظام
 ویره رک اورالرده بر جولان خیالی اجرا سنه اوزه نیوردم ..
 صوکره خیال عودت بونلرک هپسی اوزرنده بر فانوس
 منور کی اهتزاز ایدیوردی ...

قلبمه بر صبر سزلق خالجانی واردی ؛ چرخک دورانی
 تسریع ، واپورک حرکتی تعجیل ایتمک ایستیوردم :
 روحی تضیق ایدن قبضه افتراق ایچنده بردود تجسس
 واردی که بتون تحمل شکیانه می کیریوردی ..

یاری یہ قدر یا تمش اولان سیغاره می دودا قلم آره سنه
 صیقشدیر مرق کو کرتیه چیقدم : آرتق کونش غروب
 ایتمش ، آفاقه سیاه بر کولکه اینمشدی ؛ استانبول افقک
 بر کنارنده بر خط ماضی کبی متهود اولیوردی . کیجه نك
 طبقات مظلومه سی قویو بر سیس کبی دکیزک روی همواری
 اوستنده طالغالانیوردی . کاه و بیگاه ساحلده ، اوزاقده
 بر قریه نك تئک تئک ایشیقلری کورنیور ، بر برج منعکسک
 خیال رعشه دارینی آکدیریوردی . هر طرف بی زبان
 و خواب آلود ، هر طرف مضروف سکوت ایدی :
 بو خموشی عمومی یی یالکنز « القاهرة » منتظم بر خیشیرتی
 ایله بچیور ، اطرافنده بیاض کوپوکلرله طرازیده بر
 طریق موقت آچیوردی ...

برچاکک طنین پرتلاشی یولجیلری یمکه دعوت
 ایدیوردی .. بیوک سالونه کیردم : الکتریق فانوسلری
 نیم شفاف برر نارنج ماضی حالنده ایدی ؛ بونلرک ضیای
 سفیدی آلتنده ، بیوک چیچک دمترلری آره سنده شفاف
 شیشه لر ، بلور بارداقلر ، بیاض طاباقلر ، مجلا چاتالر ،
 قاشیقلر ، بیچاقلر ... بر محور ثابت اوزرنده دون
 قولتوقلر سفره نك اطرافنه دیزلمش ، یولجیلری دعوت
 ایدر کبی ایدی .

رفقای سیاحتی طوپلو بر صورتده آنجق شیمدی
کوره بیلدم: ایکسی ایله نظری بر آشنالغ وار، اوته کیلر —
بش آلتی کشی — هپ اجنبی .. ایکده قادین وار که
یان یانه اوطوردیلر، بری اختیار، اوته کی تازه ..

آرتق چوربایی تعقیب ایدن یدی سکز درلویمک
طاباقلره قونوب قالقیوردی؛ نوبت یمشلره کلدی، بونلر
آره سنده بر درلوسی واردی که اوکا بز پک مألوف دکلز:
موز! ... بالطبع موزک لذتی صورماز سکز، چونکه
بیلر سکز که لذتی طاعمک نیتته تابعدر!

یمکده او ایکی استانبوللو بکلرله نظری آشنالغمز
معارفه درجه سنی بولدی؛ بوبکلر — رمزى وحسین بکلر —
مکه مکرمه یه کیدیورلر مش، بنم ایچون بو بر نعمت
غیر مترقبه اولدی: زیرا بو ذاتلرده بر چوق مزیات حس
ایتدم؛ بویله ایکی همراه بولمق هر سیاحتده میسر اولور
شیلردن دکلدر.

بعد الطعام سالونک بر کنارینه چکلدک، یولجیلردن
بعضیلری حقنده کی مطالعاتمزی مداوله ایدیوردق:
هله اوزون، صاری بییقلی بر اجنبینک تام اوچ شیشه
شراب ایچمسی هیمزک دیده استغرابنی آچمشدی..
بردنبه نظر من قارشیمزده اوطوران اوچ مخلوقه

منعطف اولدی : اوراده ، قارشیمزده اوطور مشلردی ؛
 تازه قادین متکلم بر مومیا حالنده اولان قائن والدہ سیله
 شاشی ، چرکین زوجی آرسنده موقع لایقندن ، لایق
 اولدینی چارچوبه مذهبدن سقوط ایتمش ، ایکی رخنه دار
 موبلیه آراسنده اعصار دیده توزلره قاریشمش بر نفیس
 نابلو حالنده ایدی ؛ بو حالنی حس ایدیور ، سیلک نوب
 اوتوزلرک ، جهان حسن و طراوتی بر خرابه زار کولکه سی
 ایچنده براقان او توزلرک - آلتندن قورتولمق ایستیور ،
 بولندینی موقعدن عادت اوتانیور ، جناح ملاحتی آچوب
 شایان اولدینی یرہ یوکسلمک دیله یوردی ؛ فقط ایواہ ! تقدیر
 ونصیب شبهه سز فقر و احتیاجی وسیله ایدہ رک اونک کوزل
 اللرینی او سالخوردہ قادینله معلول ارککک اللرینه تسلیم
 ایتمشدی ؛ طریق حیاتده ، ولور مدت موقته ایچون اولسون ،
 اونلرک آرسنده یورومکه مجبور ایدی . بونی کندیسی هر کسدن
 ایی آکلا یوردی : بر توکل دلخراش ایله کوزلرینی اوکنه
 دیک یور ، اوزمان درین بر شہیق تاثیرک کوکسنی املا
 ایتدیکی فرق اولونیوردی .. کاه و بیکاه باشنی قالدیر -
 ییور ، حضارک کندیسی اوزرنده باییلوب کیدن انظار
 اشتیاقته - چونکه بتون سالونده اولانلر بو مخلوق ملیحه
 رکز نکاه ایتمشدی ، - مخمور کوزلریله کیزلی بر جواب

ویریور ، او آنده قاشلرنده - قالین ، قرال قاشلرنده
 سمایه طوغرو. بر حرکت مأیوسانه حاصل اولیوردی...
 اوتەکی ، قان والدە - سکسان سەنە آلتەدە ازیش ،
 بوروشمش ، عضلی بر پاچاورە حانی آلمش اولان قادین -
 چەرە سنی تبسم بوکلوملریلە برالما قوروسی کبی بوروشد -
 یریور ، دائماً قاپالی کبی طوران کوچک ، خردە بینی
 کوزلرینی قاپاقلرک نامتناهی قیریشیققلری آردسندە بتون
 بتون غائب ایدیوردی ؛ گاه برادای مغرورانە ایله باشنی
 صالایور ، گاه دوداقلرینی ایکی رنکسز صولجان کبی
 یکدیگری اوزرنده قیملداتەرق برشیلر میرلدانیور ، گاه
 بوزولمش برسختیان پارچەسی شکلنە کیرن الی باشنە
 کوتوردەک طاقمە صاحبلرینی دوزلتیوردی ... بریکی ،
 زوج ، متورم کوکسینی کورکلی بر پالطویە صارمش ،
 کوزلرینک شاشیلغنی قویوماوی برچفت کوزلک آرقەسندە
 صاقلامشدی ؛ شجرە حیاتی کیروب طوران طفیلات
 مرضیە بونشئەسز دلیقانلینک یاناقلرینی چوکرتمش ،
 دوداقلرینی صولدورمش ، بویوننی اینجەلتمش ، اللرینی
 اسکلت حالنە کتیرمش ، بوغازینە سریع التکرر بر
 اوکسوروک هدیە ایتمشدی . صیق صیق اوکسوریور ،
 هر نوبت سعالده برکرە مندیلمی آغزینە کوتوریور ، هر

دفعہ سہندہ کیزی بر نظرله مندیانی معاینه ایدیوردی .
آرہدہ بر کرہ کوزلرینی .. او منحر ف المال کوزلرینی زوجہ
سنہ چویریوردی ؛ او وقت بوچارپیق ، بو متق اطع
نظر لک خفی برر عشه وداع ایله تترہ دیکی حس اولئیوردی ؛
آرہدہ بر کرہ بویونئی اوزاتیور ، برشی سویلک ایستدیکنی
آکلاتیوردی ؛ او آندہ معاند براو کسورکک مخرق پنجه سی
بوغازینہ صاریلیر ، دلیقانلی بی او کسورتیور ، او کسور
تیور ، او کسورتیوردی . بو ائشارہ کنج قادین علی المعتاد
اوکنہ منعطف اولان قویو ماوی — او قدر کہ عادتاً
سیاہ — کوزلرینی مرحمتدن زیادہ استکراہہ دلالت
ایدم جک بر طرزده زوجہ توجیه ایدیور ، نوبت سعال
کچنجه یه قدر خسته بی بو نظر نفرت مال آلتندہ براقیور ،
صوکرہ ینہ یا کاکون طیرناقلرینہ ، یا اوکنده کی ماصہ نک
آل اورتوسنہ ، یا خود زمینہ باقیوردی .. بر دقیقه بوتازہ
قادینہ حصر نظر ایتدم : یوزی مدور ، طولغون ، فقط
صواغوندی ؛ قویو ماوی کوزلری بر کوزل چوجق
کوزی کی متحیر ، او قدر شایان تقیل ایدی ؛ کوزلر
اوستندہ قالین مقوس ، قرال قاشلر نظر لک مال حیرانہ
شرح بلیغ اولیوردی ؛ صوکرہ سمیز بر جہہ ، نہایت
چیلغین بوکلوملردن ، زرین حلقہ لردن ، کمرہ تمو جلردن

مهرکب بر قوجه دمت صاچ کلیوردی که بتون او اوچوق
 چهره یی سموری بر چارچوبه ایچنه آلیوردی . آره صره
 بالمومی کبی صولوق طوران باشنی ایکی آووجی ایچنه آله رق
 هم قان آناسنه ، هم قوجه سنه قارشنی برر سپر نظر
 تشکیل ایدیوردی ؛ اوزمان مطبوع الیرینک جلد شفاف
 آلتده قوتسز برقانک اینجه ، ماوی خط لر رسم ایتدیکی
 کورولیوردی .. بوقادینک رفاقت بارده سی دلیقانی یی
 کنارنده بولندیغی کرداب قنادن قورتاره بیله جکمیدی ؟
 یوقسه کنج آدم زوجه سنی ده برلکده سورو کله یوب
 کوتوره جکمیدی ؟ کنج زوجک هر وضع ایله اعلان
 ایتدیکی محبت شدید ذاتالرزهدار اولان حیاته برضربه
 مدهشه کبی دکلیدی ؟ عجبا بوکنج عاشق زوجه سنی
 هر دراغوش ایدیشنده عمرینک برپارچه سنی غائب ایتدیکنی
 آکلامیورمیدی ؟ زوجنک زهرناک بوسه لرینه قادین نصل
 تحمل ایدیوردی ؟ . ایشته برسلسله اسئله که بونلره
 آنجق پول بورژه جواب ویره بیلیر .. آره صره دلیقانی
 بوضع استرحامکارانه ایله تازه قادینک قولاغنه یاقلاشیور ،
 سوزلرینک زوجه سی اوزرنده کی تأثیرینی آکلامق ایچون
 زاویه لی نظرلرینی کوزلرینک ماوی جاملری آرقه سندن
 قادینک کوزلرینه صاپلایور ، او یله جه بر فیصلتی یه باشلایور ،

بوفیصلانی بی نوبات سعال تقطیع وتنقیط ایلوردی . .
نەلردن بحث ایدیوردی ؟ بی شهبه حیات آتیه لرینک
الواح کلفامندن !

ارککک طوری شوتصمیمانی اعتراف ایدیوردی :
— دگلی عزیزم ، شیمدی نیل کارنده ، یاخود
رمله نك دكزه ، غازیویه نك یقین برنقطه سنده کوچك ،
عرب خیال آتشینیه بنا ایدلمش برکوشك طوتارز .
بوکوشکرك برر بیوک باغچه لری واردرکه موز ، خرما ،
باؤباب آغاچلریله ، سنک هیچ کورمدیکک ، هیچ
بیلمدیکک نظر فریب آغاچلرله مملودر ؛ اونلرک کنیش
یاپراقلری ، اویشیل یلپازلر آلتیده آهسته آهسته قلملرمزی
محبترلرمزی صاللار ، خیالی برمسعودیت صالنجاغی ایچنده
نوبهاری بکلرز . . اوزمان بو اوکسوروك کچر ؛ ذاتاً یک
کوچک ، اهمیتسز برشی دگلی ؟ البته اورانک تأثیر
بهارینه مقاومت ایده مز . هر دقیقه بو اوکسوروكدن
برپارچه سنی آلوب کوتوره جک ، هر نفیحه نسیم کوکسمه
برنوازش عافیت کبی کله جک . . آه سن اولطیف موقعک
هوای بی مثالی بیلمزسک « اوراده یشایانلرک حیاتی
نیچون ختامه ایرییور ؟ » ایشته بن هر اسکندریه
کیدیشمه کندی کندمدن بونی صورارم . . . آه بیلسنک

عزیزم، اوراده بر کوچك خانه ده بزی نه لر ، نه بیوك
سعادتلر بکلیور ..

قادینك نظر ناتوان مقصورانه سی بویله جواب
ویریوردی :

— ایواه ، دوستم بو پك كوچك ، پك اهمیتسز
او کسوروك سنی او کوچك خانه دن باشقه بریره ، ظن
ونخمین ایتدیككن ده ا کوچك بریره کوتوروپور ..
او بنم بیامدیكم كوزل آغاجلر سکا غالباً بر سایبان ابدی
حاضر لایه جق .. کوروپورم : ایشته هر کون ، یانان بر
موم کبی ، اریوب کیدیورسك .
اختیار قادین یالکز دیکلیوردی .

بو اوچ مخلوق تحف بر مثلشدی : بر کوشه سنده اختیار لقله
چیر کینلکدن مرکب قائن آنا ، اوته کی کوشه سنده کنجلیکله
کوزل کی جمع ایدن کلین ، اورتهلر نده کنجلیکله کلینه ، چیر-
کینلکله آنا سنه تماس ایدن دلیقانلی واردی ... بو اوچ همراه
یالکز بر نقطه ده متفق الروح ایدیلر : اوچی ده محزون ،
اوچی ده متفکر دی . او قدر که یانمده کی ایکی ارقداشمدن
برایی :

— بونلر جنازه آلاینه می کیدیورلر ؟ دیدی ؛ بن
جواب ویردم :

— اوت ، کندیلرینی دفن ایدم جکدر . . صوکره
ایضاح ایتدم :

— بودلیقانی متورم ؛ قالدین اوپله دکلسه بیله
بوخسته لغه پک مستعد ؛ داقانلینک رفاقتی بو استعدادی
بسلیه جک ، قالدینه بوحمای تلقین ایدم جکدر . . .
اوچنجیسنه کلنجه : اوزاناً مائل انهدام ...
اوچنجی ارقداشمز سوزمی کسدی :

— بونلر بال آینده ایمشله . . زوجک اسباب صحیه
سندن طولایی بودور نوشینی اسکندریه ده کچیره جکدرمش . .
برمدت اوچمزدده سکوت ایتدک . صوکره بردنبره
بریسی صورتی ؛

— شو اوچ بدبختدن هانکیسی زیاده شایان مر حمتدر ؟
بن تردد ایتدم .

— شوکنج قالدین ... دیدم .
اوکنج قالدین ترکیه یی آکلا یورمیدی ؟ بیلم ؛
یا لکز شونی کوردم که نه دیدیکمی آکلامش کبی اوزریمه
باغین برنظر توجیه ایتدی ، غالباً بونظرده بزشکران
ضمنی مظروف ایدی ...

وقت نصف اللیله تقرب ایتشدی ؛ قماره لرك طار
یاتاقلرینه کیرمک لازم کلیوردی . . برکره دها کوکرتیه

چیمق بزکړه دها اطرافی کورمک ایستدم: باجادن چیمقان
دومان آتشیپاره لرله مرصع برستون سیاه صورتبنده ظلمت لیل
ایچنده سمایه طوغری یوکسیلور، عادتاسحائب لیلیه یه پیوسته
اولیوردی .. بردرین سکوت، برظلمت عمیقه، واپورک
کنارنده تارمار اولان موجهلر، مسسز بر روزکار،
سیاه بردکز، طار براقق، پست و مستور بر سما: ایشته
بو قدر ... یالکز واپورک پینده قالان ایز کورونیور:
برقادرین کیجه لکنک فیستولی، اوزون، بیاض اتکی
کی اوزانوب کیدیور.

بر دقیقه ایچون روحی بو کیجه نک بوروح نامتاهیبی
ایچنه ترک ایتدم؛ روحم بر دقیقه ایچون بوسیاپوش
طبیعت ایچنده مغطوس قالدی .. بو استغراقده اوپله بر
تأثیر لذیذ بولدم که اک صوؤق قلبلری تحریک، اک
طورغون خیاللری تسخین ایدر ...

صوکره ایکی همراهه:

— صباحه قدر اللهه اصمارلادق ... دیدم.



ایکنجی مکتوب

« القاهرة » واپورنده .

نصف الیلی ایکی ساعت قدر کچمشی ایدی ؟ ..
آنجق !.. واپور اولو تعدیل سرعت ، صوکره ، توقف
ایتدی ؛ او یاندم . اعتیاد اک زیاده او یقوده اظهار آثار
ایدر : ساکن بر او طهده او یویانلری خفیف بر حرکت
ایقاظ ایتدیکی کبی متحرک برشی ایچنده او یویانلری هر وقفه
او یاندر ، حرکت عارض اولان هر سکتده او یقوی اخلال
ایدر ؛ کیجه یی ترنده کچرن یولجیلرک او یقولرینه تکرر
لک لک قعقه شیدده معدنیه سی مانع اوله ماز ، اونلری
او یاندر ان موقفلردر ؛ دکر منجیلر ما کنه ایشلیدیکی مدتجه
او یویه بیلرلر ، او ولوله منتظمه کسیدیکی آنده کوزلرینی
آچارلر .. بشیکک ، یا خود صالنجاغک اهتزازی کسیلر
کسیلمز چو جقلرک او یانملرینی اثر ذکا اعتبار اتمک نه
بیوک خطادر ! بو پک طبیعی ، پک بایاغی برشی ..
بر عکس العمل اعتیادیدر .

شبهه سز چناق قلعه پیشگاهنده ایدک : علی العجله
پانطولونه ، پالطویه صاریندم ، کوکرتیه چیققدم .. بو

راده کی مدت توقف پک چوق دکلدی : معاملات
رسمیه بی ایفا ایده بیله جک قدر بر زمان ، انجق یارم
ساعت ...

افق طار، پک طاردی؛ کویا بر حوض ایچنده ایدک ..
اطرافمز خفیف بر کیجه قندیلله ضیالانان بر یاتاق او طه سی
حالنده ایدی ؛ حاجا ضعیف بر شعله کوز قیریور ، برقاج
نجره تول پرده لر آرقه سندن صاری بر روشنی نحیف
کوستریور ، بونقاط مضیئه آره سنده قالان یرلر حدائق
ظلام کی سیاه یا پراقلر ، سیاه آغا جلر ، سیاه شکلرله حملو
کورونیوردی ؛ سما بونلرک فوقنده بر طاق مکوکب کی
محتشم طور ویوردی . پک یقینمزده ، صباحی بکله ین بر
قاج واپورک ، آویخته فنارلری ، بوفنارلرک آلی ، یشیللی
ضیاسی واردی ..

بعض شهرلرک منظره لیلیه سنده بر حالت مقتورانه
واردر : چناق قلعه - اسکی هه لسپون ، - بوکیجه او یله
ایدی . براق ، فقط قرسز بر سما آلتنده بر خواب تاریکه
بورونمش ، بر خموشی تقوی شعارانه ایچنده شب یلدانک
رؤیای مدیدینه طالمش ، انجره ظلام آره سنده کاه و بیگاه
کوکس کچیریور کی ایدی .. هرشی درین بر سکونت
ایچنده ایدی ، یالکز واپور مزه تقرب ایدن بر ضدالک

کورکلی براحتشاش موزون ایله روح لیلی غیجیقلایا-
یوردی .

تیاترولرده « ده قور » ك اهمیت نفوذینی کیم انکار
ایده بیلیر ؟ بر آدم تصور ایدیکز که قارآنلق برکیجهده
یولنی غائب ایتمش اولسون : بو آدم بر شهرک ایچنده ، یا خود
جوارنده بولندجی حادته نك هیچ بردهشتی یوقدر ؛ برده
بو آدمی آفریقا اورمانلردن برینه ، پای بشرک هنوز
تماس ایتدیکی اونامتناهی غوطه لردن برینه قویکیز ؛
حادثه در حال تبدیل قیافت ایدر ، کویا هر طرفدن بر سهیم
سمیم تهله که کور و نور ... بو تصور قلبه بر لرزه باردوشو-
رور ؛ کوز اوکنه تشنه خون و حیات سباع مهوره ،
قولاغه صفیر جانخراش افاعی کلیر ؛ بتون توپلر اورپرر ..
ایشته بوراده ، شو بر قاج دقیقه لق توقف ائناسنده
اعتراف ایدرم که کیجه قارآنلق ، هر طرف ابکم .. آنجق
صویالکیز ایشیدیله بیله جك درجهده خفیف بر صریر
ایله فیصله دیور .

واپورک دودو کی طالدیغم رؤیای پرسکونی خرد و خاش
ایتدی ؛ یارم ساعت قدر بر توقدن صوکره ینه یوله
قویولدق : نقاط منوره کیتدکجه سیرکشدی ؛ تپه لرده

آده صره پارلاق نقطه لر وار .. براز صو کره بحر سفیده
 حقیقه جغز .. ینه طار یاتاغه کیر ملی .



ایکنجی کون . — چاک سسیله او یاندم؛ ساعت آلا فرانغه
 میدی ... بوسس یولجیلری صباح قهوه سنه چاغیر یوردی .
 قهوه نی سومر سه کز چای، چقولاته و بونلرک سود لیلری
 وار؛ غارسون آرزو کزی استفسار ایدیور. قهوه آلتی ده
 حاضر : تره یاغی ، رچل ، پیسکوی ، دیلینمش اکملر
 سفره ده دیزلمش ؛ هر ایستدیک کزدن ایستدیک کز قدر
 استهلاک ایده بیلیر سکز . ۱

هنوز هیچ کیمسه قالقما مشدی ؛ کندی کندی
 قهوه آلتیمی ایتدم ؛ کوچک سالونده سیغاره می ایچدم،
 زیرا بیوک سالونده کی : « ممنوع شرب الدخان » لوحه سی
 بو کلفتی اقتضا ایدیوردی ..

بو صباح واپورک هر طرفی بر کره طولاشمق ،
 ایکنجی موقع مشتری لریله کو کرته ده کیلری کوزدن کچیر مک
 ایستدم : اسکی اصولده یاپیلان واپورلرده برنجی موقع
 قماره لری هپ واپورک دومن طرفنده ، ایکنجی
 موقع کیلر باش طرفده در ؛ یکی یولده اعمال اولنا نلرده
 ایسه برنجی موقع یولجیلرینک یری واپورک اورته سنده ،

ایکنجی قمارلر دومن طرفنده در . بو ایکنجی طرزك
 برمزیتی وارمش : بر واپورك اك آ ز صالینتیلی یری
 اورته سی اولدیغندن برنجی موقع ایچون اك مناسب یر
 اوراسی ایتمش ... بو واپورلرده کوکرتة یولجیلری برنجی
 موقع صالونلریله باش آره سنده کی مسافه یه یرلشدیلیور..
 ایشته « القاهرة » بویولده یاپلمش بر واپوردر ، ایکنجی
 موقعی کورمك اوزره دومن طرفنه طوغرو کیتدم..
 پك چوق سیاحت ایتمش بر آلمان ویانه دن بشته یه
 کلیرکن شمندوفرده بکا دیمشدی که :

— واپورده دایما برنجی موقع ، شمندوفرده دایما

ایکنجی !

بوسوزی هر سیاحتده تخطر ایدر ، هر سیاحتده
 حقلی بولورم . بودفمه ده کی سیاحت مینه بروسیله تصدیق
 اولدی : اوراده ، طار ، قارانلق صالونده — که عادی
 بر مکتب طعاعخانه سنی آندیریوردی — بیوک ، کوچك ،
 قادین ، ارکك بتون ایکنجی موقع یولجیلری اوطور -
 مشلردی : بونلره ویریلن سودلر ، قهوه لرشایان دقت
 بردرجه ده صولو .. بیسکویلر اك اوجوز ، اك عادی
 جنس دن ... یولجیلر شایسته نظر بر استعجال اکولانه
 ایله بو اوجوز بیسکویلری اوصولو قهوه لره باتیریورلردی .

يکديکرىنى آنجق دون اقشامدنبرى کورمش اولان
 بويولجیلر او قدر لا ابالیانه کوروشیورلر ، او قدر بی ادبانه
 قهقهه لر صالیویریورلردی که صایغیسزلغك بودرجه سنه
 قارشى متحیر قالماق ممکن دکلدی . هله آتنه یه چیه جق
 یولجیلردن بعضیلری ظرافت فروشانه بر وضعیت آله رق
 وولتری فرانسز اولدیغنه پشیمان ایده جك بر فرانسزجه
 ایله او یله خام کنایه لر ، او یله قاباجناسلر یووارلیورلردی که
 بر سامع بی طرف اولدیغم حالده - اوراده کی قادینلردن
 برینك فرانسزجه بیلمسی احتمالی دوشوندم ، - بم
 یوزم قیزاردی : سامعین اره سنده قادینلر حتی بر تازه
 قیز واردی ... اوراده کی قادینلردن ایکیسنك یاننده
 بررده ارکك بولنیوردی ؛ بو ارکك لرك او قافه شان تان
 ملاطفاتنك دوامنه نصل مساعدده ایتدکلرینه عقم
 ایرمدی .. کندی کندیمه : « ایکنجی موقع !... » دیدم ؛
 بومناسبتسز لکلره باشقه بر چاره ایضاح بوله مدم ... بو
 موقعك قماره لری ، یاتاقلری تخته ، الکتریق فانوسلری
 یالکیز ایکی دانه ایدی ؛ سالونك اورته سنده قیرمزی
 چوخه اورتولو اوزون بر ماصه ، ماصه نك ایکی طرفنده
 ثابت ، یکپاره برر صره واردی .. یولجیلر بو ایکی صره
 اوستنه دیزلمشلردی ؛ برینك باشنده بر کیجه لك فسی ؛

اوتہ کینک کیرلی صاحبی غیر منتظم ؛ بریکی طوننک
 اوستنه اوزون پالطوسنی کیمش ، قماره سندن کن دیسنی
 آتمش .. بردانه سی هنوز یوزنی ییقامامش ، کوزلری
 چاپاقلرله مستور ؛ بردانه سی بر باجاییقیلیر کی کورولتی ایله
 کوله رک - آنجق چینده پک مقبول اوله جق صورتده
 سیاه اولان - مستکره دیشلرینی میدانہ چیقاریوردی :
 بو آغز حقیقه "ماننده آسیاب قهوه !" ایدی .

یوووق ، بو آدم لرله یان یانه اوطوروب برشی یمک
 قولایقله اختیار اولنه بیله جک بر فدا کارلق دکلدی ! ..
 شیمدی واپورک باش طرفه طوغرو یورودم ؛
 بر کرده کوکرته یولجیلرینه باقدم : آمان یاربی ! نه -
 دهشت ، نه سفالت ؛ نه عدم نظافت ... بومنظره نک
 خیال کریهی مدت مدیده دماغمی برکابوس مؤثر کی
 تحریک ایده جک : بر طرفده قرق ، الی بخارالی دیر
 دیزه ، اوموز اوموزه ، آرقه آرقه یه اوطورمشلر ..
 یاخود باش باشه ، آیق آیاغه یاتمشلردی .. برینه مردار
 برپاچاوره ، اوتہ کنه واپورک ایصلاق تخته سی یاتاق خدمتی
 ایفا ایدیوردی ؛ الك واسع المعیشه کوروننی قولتوغنک
 آلتده برچیقین طوتیوردی که آنجق ایکی قات چاشیر
 آله بیلیر ... علی السویه هپسی قالین ، کنیش ، اوزون ،

سیرك ديكشلی ، فقط یاغلی ، ملوث برر خرقه یه بو -
 رونمشدی ؛ بعضیلرینك باشنده یالكز ، كنارلری یاغدن
 سیم سیاه برپارلتی پیدا ایدن ، بررتقیه .. بعضیلرینك كنده
 یو تقیه ایله برلكده تویلو قویون پوستندن برر كلاه
 واردی ... خرقه لرینك قوللری ایكیشر قول اوزونلغده
 ایدی ؛ اللری بوزلمش ، غائب اولمشدی . بو خرقه اونلره
 ستره ، پانطالون ، پالطو ، الیون رینه كچور ، بو خدمتلك
 هپسینی بردن ایفا ایدیوردی : غالباً او قدر اوزون اولیشنك
 سببی بو ایدی ... بو اوزون خرقه لی یولجیلر اوتده بریده
 بشر ، آلتیشر طوپلانمشلردی : بری سویلیور ، اوته کی
 برتبسم بختیارانه ایله دیکلیور .. بریسی اوچ ، درت
 کومور پارچه سنی باش باشه چاتمیش ، صباح آتشی تداركله
 مشغول ... بریسی قریق دو كوك برصاچ منغال اوستنده
 قوری فاصولیه پیشیریور ... بردیگری آرده صرده
 آغزینه بر آووج برشی - لبلی اولسه كرك ! - آتیور ،
 بش اون دقیقه بونی چیکنه یور ... برقاچی حالا اویویور ...
 هپسینك رنك جلدی اسمر ، صاری .. قیللری سیرك ، بیقلری
 دوشوك ، صاقلاری چكه لرینه منحصر .. الماچق كیمكلری
 حقیق ، كوزلری جاپونیا لیلرك كوزلرینی آندیریور ،
 چكك یاناقلری باتیق .. قاشلری هیچ یوق کی ، یالكز

بر آزیری بللی .. نظرلری ثابت وبی مال ...

هیأت مجموعه لرندن بر رایحه عفتیه انتشار ایدیور ؛
یورایحه پیشمک اوزره اولان فاصولیه نك بخار شدیدینه
قاریشنجه اویله بر آغیر قوقو حاصل اولیور که نه آج قارننه
چکیلیر ، نه طوق قارننه ... او حالی بر مدت تماشا
ایتدکدن ، بوروایحی بر قاق دقیقه تنفس ایتدکدن صوکره
انسان : « بو آدم لک فقر و ضرور تیرندن زیاده عدم
نظافتلری شایان مرحمت ! » دیمکه مجبور اولیور .

کو کرته نك اوته کی طرفی عادتاً تاریخ قدیمک تصویر
ایتدیکی برج بابل : هر ملتدن بر آدم وار ، هر لسان
سویلنیور ؛ قادین ، ارکک ، چوجوق ، اختیار .. هپسی
بر عدم انتظام خارق العاده ایله صیقشمشلر ؛ هیچ بر یرده
بو قدر صیقشیق اوطور لدیغنی کور مدم . بو زوال لیلرک
قیملدایه حق یرلری یوقدی : اوطور دقلری یرده یمکه ،
ایکی دیزاوستی او یومغه مجبور ایدیلر ؛ هله بعض چوجوقلر
والده لرینک قوجاقلرندن باشقه یر بوله مامش-لردی ...
بو طرفک منظره سی حزین ایدی : عجز و محرومیتی ،
یر مجبوریت الیمه نی کوستریوردی . ایشه فدا ایده جک
بر قاق غروشلری اولمدیغنی ایچون شوراده بری برلرینی
ازیورلر ، شو صوؤق صباح روزکارینک قارشیسنده

تتره شیورلردی ... بونلرک سفالتلرینی یوزلرینه اوران ،
 مذلتلرینه بر آینه ضدیت طوتان ، ضرورتلرینی مضاعف
 کوسترن برشی دها واردی : برنجی موقع صالوننک
 پنجره لرندن برقچی بونلر اوزرینه آچیلوردی ... بر
 لزومسز بوغچه کبی بری بری اوزرینه آتیلمش اولان
 بو آدملر باشنی چویرینجه چیچک دمتلریله معطر قوجه
 برماصه باشنده سکرنجی قاب یمکنه چاتال صالدران
 برکشی کوریورلر ، بلکه بوقوجه صالونده اویولجینک
 کندی کندینه نصل صیقلمدیغنی آکلایه میورلردی .
 بوراده تنکنائی محرومیت ، پنجره نک اوته کی طرفده
 وسعت ثروت ، بتون کشایش حضور ! ..

قلم بوتضاد مدهشک تلاطم تأثیریه مملو اولدیغی
 حالد باشمی چویردم ...

ایشته دکر ، بوراده ده وسعت طبیعت ...

سردجه برباد طلوع دکرک سطح لاجوردیسنی
 بوروشدوریور ؛ اطراف برچارشاف ، فقط بوروشوق
 برچارشاف حالنده ... آفاق ماوی ، قیرمزی ، یشیل ،
 مور بولوطلرله مزین ؛ بونلرک اوزرنده قویو منکشه
 رنکنده برخط .. قبه آسمان ماوی بر نصف کره زجاجیه
 کبی لکه سز ... افقار ازهار رنکا رنک ایله مشحون

برمدور سپت ، سما بوسپت اوزرینه کریش بر تولى
آندیریور .

كوچاك طالغلهلر برفشفشه روحنواز ايله واپورك
كنار سیاهنده بری بری اوزرینه ییغلیور ... کره نسیم
برتهائی کالی کوستیریور : نه برقوش ، نه برسس وار...
اقلقك برکوشه سنده ، اوزاقده بر آطهك ساحل کبودی
بربیوک طالغه کبی مرئی اولیور. یونان دکزینه وارمق
اوزره جنوب غربی یه طوغری کیدیورز ...

بیوک سالونه عودت ایتدم . رمزی وحسین بککر
قالقمش ، قهوه آلتیرینی هنوز بیترمشلر ؛ بنی مصاحبه
دعوت ایتدیلر ... بیلم نصل اولدی ده مجرای کلام
اراضی ادبیه دوشدی ؛ بحث کج وقته قدر سوردی .
قاره یه کلدیکم زمان ساعت بشی بولمش ایدی .



اوچنچی مکتوب

« القاهره » واپورنده .

سیاحتمزك بوايكنجی کونتی بحرس-نفید اوزرنده ،
یونان اطه لری پیشکاهنده کچیره جكدك ؛ مطرد بر حرکت ،
يك آهنگ بر غمغه ، يكرنك بردكزله يکپاره بر سما ...
ایشته بونلر اقشامه قدر بزى اتعاب ایده جكدی . فقط
آقشام ایچون بویور غونلغه بر چاره تضمین موعود ایدی :
پیره یه واريله جق ، اورادن آتیه اینیویرمك بزم ایچون
ممکن اوله جقدی . آقشامه قدر اوایلانمق ایچون او جولان
هوسکذرانه ایچنده کی مسایر خیالیه کافی ایدی ؛ بوندن
باشقه منظره اطراف ده قورقدیغمز قدر متعب و مزعج
دکلدی : کونشك دائره نوارندن ریزان اولان الواح
ضیا بر آینه پاره زرین کبی دكزك قویومائی ، کنیش ،
روز کارله خاره لمنش قطیفه سی اوستنده اویناشیور ، تذلقات
رقصیه یی آکدیران بر حرکتله طالغانه رق افقه دوغری
سوزولوردی ؛ طاتلی برباد شرقی واپورك بتون ایپلرنده
بر زمزمه اهتزاز او یاندیریوردی ؛ کوز بر لاجوردی
غیر محدود ایچنده دیکلنیور ، کوکس نامتناهی بر هوای

پاکک نفحات ملایمه سی ایله طولهرق طراوت بولیوردی،
بتون بوشیلر برروح پرخیالک ترک وناز مستغرقانه سینه
برر خیابان بی حدود اوله بیلیردی .

کونش سمت رأسمره واصل اولمهدن جزا اریونانیه نك
مقدمات مهمه سی افقده برر سنجابی موج بهار حالنده
آشکار اولدی .

ایشته چنغراق سسی ، ایشته اوکلن طعامی زمانی ...
طعام زماننده یکدیگری نی برقاچ ساعتدن بری بوسابج
اوتل ایچنده طانیان سیاحین اره سنده کی مصاحبه ، اکر
فورطنه یوقسه ، علی الا کثر نقطه عزیمته متعلق معلومات
ومشاهداتک یادی ایله نقطه مواصلته دائر استخبارات
وتصوراتک بیانی آره سنده رقص ایدر ؛ بری برینک
هویتدن بی خبر اولان بوموقت آشنالر پست برسس ،
نازکانه بربرودتله مداوله مشهودات ومسموعات ایدر لر ...
بوکون بو طعام اثناسنده یوجیلردن ایکی فرانسر یونانیلر
حقنده جدی برمباحثه یه طوتشدیلر . بری یونانیلرک
لهنده ، دیکری علمهنده ایدی . بز برسکوت بی طرفانه
ایله دیکلیوردق . مباحثه یالکزی ووقوفانه برسوزیاریشندن
عبارت دکلدی ؛ بوجهتله بن ذهنی برضبط کتابتته قو-
یولدم . بری دییوردی که :

— ذوق فنون و ادبیاتی ، فکر تجارتی انسانیتیه ایلک مال ایدن یونانیلر اولمشدر . بونلرک اک شدتلی هنکام محارباتنده بیله شعر و تجارت ، بوایکی واسطه تأمین مسالمت ، روحلرینک لقایف سفلیه نسیاننه سقوط ایتمه مشدر . او یله مستثنی زمانلرده بیله یونان صولرنده مرسای تجارت آرایان کیملر کورلدی .

مخاطبی غایت ظریف ، خفیفجه مستهزی ایدی ؛ کولومسه دی :

— سزده مبالغه لی بروجده مورخانه کورو یورم ،

دیدی ..

سوزنده دوام ایتدی :

— منر آرسطو ، آلسی یاد زمانلرندن بحث ایدیور .

سکزر . بوکون « یونانی » دینلنجه خاطره کله جک شی نه یونان قدیمک عقلای سبعة مشهوره سندن بری ، نه ترموپیل کچیدینک اوچ یوز قهرمانندن بری ، نه ده آریستوفانلردن ، اورپییدلردن ، اسکیللردن بریدر ... بوکون بر « یونانی » اکر شهرلی ایسه قادین ، شراب ، قمار آره سنده یو وارلانا ن برزو پیه ، پول دو قوقک رومانلرنده کی اشخاصدن بری ؛ اکر کویلو ایسه بندیکی مرکبک یولارینی قاریسنه چکدیرن برقابا ، خودکام ، آداب نظافتدن بی خبر بر مخلوق در .

شمى يونانستانك بيوك شهرلرندن برنده بولمىش ايسه كز
الته دقت ايتمشسكز در: دليقانلىلر قوللر نده كتاب طاشيمقدن
زياده مترس طاشيمغه هوسكاردرلر... يولكز يونان
قريله رينه اوغرا ديسه بى شېه كورمشسكز در كه بدمست
بر كويلو آقشامه قدر تارالارده چالیشان زوجه سنى سپاه
يومروقلرى آلتنده ازييور. برشهرده بولنورسه كز
آوروپامد نيتك بتون فنا جهتلىنى ، اما منحصرأ فنا
جهتلىنى كوررسكز : قهوه لرده ، سوقاقلرده كلن كچنه
معنيدار بر صورتده قول ووران قادينلر ك عددى شايان
حيرت بردرجه يه بالغ اولمشدر ؛ اكثر خانه لرده دعوت
كيجه لرى يمك ماصه سى او كنده ، آرمودله پينر آره سنده
كنج قيزلر پرده بيرونانه مضمونلر صرف ايدرلر. قيزلر ك
بوتقوها تنه والده لر مغرورانه تبسم ايدرلر ؛ هله سالونلرده
كنج ار ككلر ك حالى يك كولنجدر ، اك ممتازلرى تحملىسوز
براد ايله فرانسزجه سويلرلر ، اكثر يسى ايچون آرغوبر مدار
تميز اولور !.. يمك ماصه لر نده ميوه طبقلرىنى اسقانييل
دسته لرى تعقيب ايدر ؛ برهضم طعام اثناسنده ثروت
موجوده سنك ثلثانى غائب ايدنلر نادر دكلدر . قارده
حيله بر قاعده عموميه ، بر اثر ذكادر ؛ عفيفانه حكم تصادفه
تسليم ثروت ايدنلر آتته سالونلر نده تحميق اولنور !..

فرانسه قاربازلری آره سنده زبازرد اولان - بریونانلی کبی
حیله کار - سوزینی بر تشیه تهی ظن ایتیه ییکز. اعتقادجه
لسانمزه - بریونانلی کبی هواپرست، بریونانلی کبی بدمست -
تعییرلرینی ده علاوه ایتلی ...

بتون بو سوزلر شایان تعجب بر سهولت و طلاقته
سویلینوردی؛ چانالارک طاباقلره طوقومه سندن متولد
سسیر آره سنده یولجیلرک قولاقلری بو حقایق هجویه یی
دیکیوردی ... برنجی مباحث چیکنه دیکی بیفتک پارچه سنی
یوتمه دن طولغون بر آغزله مقابله ایتدی :

— مع مافیه بتون بو حاللر هر طرفده مکتبلر کشادینه

مانع اولمور ...

اوته کی ینه کولدی :

— اووو، مکتبلر! .. رجا ایدرم، بکا اونلردن

بحث ایتیه ییکز! .. محکمه سالونلرنده دساسانه دون
کیشوتلق ایتمکدن باشقه برایشه یارامیان آووقاتلر، پیره
ریختملرنده هر کوردکلرینی نظر استحقار ایله سوزهرک
قلیچ سورومکدن باشقه معرفتلی، صاحبلی طاعتی
قادینلردن باشقه کیمسه یی تعقیب ایدمه بیله جک جسارتلری
اولمیان ضابطلر، آنجق پنایر شارلاتانلرینه یارداقلق
ایده بیله جک قدر معلوماتی اولان هکیملر، بتون بومعارف

مدنیہ مفلسلری اور الرک یتشدیردیکی اعجوبہ لردن دکلیدر؟ آتہدہ بن اویله دارالفنون طلبہ لری کورددم کہ هندسہ نك مسائل ابتدائہ سندن بی خبر، مع مافیہ بعض رسائل موقوتہ نك ویردیکی مسائل لعیہ یی ایلک حل ایدن کندیسی اولیور.. بوارباب تحصیلدن اکثرینک او طہ سندن کتاب طولابی یرندہ بر «رولت» قوطوسی بولنور؛ همان هپسی روما قانونلرندن زیاده «شطنج» قاعدہ لرینی بیلرلر...

— صنایع نفیسہ دہ کی استعدادینی دہ انکار ایدہ بیلہ۔

جکمیسکز؟

— «استعداد» لرینی بیلیم، فقط اثرلرندن بحث

ایدہ لم.. ادبیاتدن باشلایہ لم: بوکون بریونان ادبیاتی

موجود دکلدر، بوکونکی یونان اشعاری، بتون او یچاقدن،

تفکدن، مترسدن، شرابدن باحث قافیہ لردن، اور واپاغلرینک

برندن دیکرینہ عکس ایدن چوبان شرقیلرندن باشقہ شیلر

دکلدر؛ بوکونکی یونان قافیہ پردازلرینک او میروسک

حفیدلکی دعواسندہ بولملری برکدای طرارک قارون

زاده لکندن بحث ایتسنہ بکزر. یونانستانده هنوز

برادبیات اولمدینی کبی بر فکر ادبی دخی یوقدر؛ کتابچی

دکانلرینک اوکنده کی جامکانلرہ دقت ایدکزر: بتون

اورالری «فهن دوسیه قل» محررلرینک آثار پرده بیرونانه سی
 اشغال ایدر . بزم بیوک ادبامز اوراجه مجهول کبی در .
 مع مافیة یونان لسانی آهنگسز ، یونان خلق خیالدن
 محروم دکدر ؛ فقط جهل وسفاهت بوقطعه بی او قدر
 تحت تصرفه آلمشدر که هیچ کیمسه نك ملکاتندن استفاده بی
 دوشونه جک حالی یو قدر ... موسیقی یه قارشی اولان
 ذوقسز لکلرینی آکلامق ، تسلیم ایتمک ایچون یونانستانده کی
 قافه شانتانلردن برنده یارم ساعت کچیرمک کافیدر : بوضعت
 نفیسه یه قارشی یونانلیلرک نه معلوماتی ، نه احتیاساتی واردر ؛
 سلم آهنگی غیر مساوی فاصله لی ربع اصواتدن مرکب
 بر موسیقی یه بر طاقم غیر منتظم تیز سسلرله او یله بر حال
 ویرلر که بر اوروپالینک قولانغی بونده مطابقات لحنیه دن
 هیچ بر اثر حس ایده مز . الهیلر ، قصیده لر ، آغیر
 وخفیف شریقلر .. هپسی بر طرزده بسته لیر ، هپسی
 بوروندن چیقان اکشی برسسله تغنی اولنور . شیمدی
 بو صدای حامضی یه برده اوچ تملی کیتاره نك اهتزازات
 سامعه خراشنی علاوه ایدکز : ایشه یونان موسیقیسی ،
 بر موسیقی که سزی صاغر اولمدیغکزه نادم ایدر ... بو کون
 یونانستانده هیکل نامنه لایق بر اثر یو قدر ؛ بو جهته
 قید یاس احفادینک هیکل تراشلقدده کی مهارت لرینی قاله

آله میه جغم... رسمه کلنجه یکی کلیسارک بتون دیوارلرینی
تکون ایدن قابا تصویرلر، آغیر ضیالر یونان رساملرینک
قدرت لرینی بندن دهافصیح بر صورتده آکلاتیر... او
کلیسالر دن معمارلرک ذوق واقتدارینه ده استدلال اولنه
بیلیر: غوتیک، رومی، عربی اصوللرینک ذوقسز،
مهارتسز برطرزده جمع ایدلمسندن متحصل بر ملز
معماری ایله ترتیب اولنان او ابنیه اولاد یونانیه نیک بو
شعبه صنایعده بیله پک استعدادسز اولدقلرینی آکلاتیر..
ایشته بر زمان صنایع نفیسه نیک همان هر شعبه سنده برنجیلکی
قازانان بر مملکتک بو کونکی حالی...

بو مقابله یی بتون سفره ده بولنانلر حیرت آمیز بر
سکوت ایله تقدیرایتدیله. بونشانه تحسین نطوق فرانسزه
جسارت ویردی؛ اوئی ینه سوزه باشلاتدی:

— صنایع نفیسه یوقلغی نیم بو کونکی یونانیلرده
کوردیکم نقایصک اک خفیفی در. بر کره اونلرک عالم
خصوصیتنه داخل اولکز: یکدیگرینه «قاردشم» دییه
خطاب ایدن بو آدملرک براجنبییه قارشیه قدر خودکامانه
طاوواندقلرینی او زمان آکلارسکز. اونلر نظرنده
«یونانی اولماق» بر خطادرکه آنجق پاره ایله، آنجق
فدیة نجاه ایله عفو ایتیر ییله بیلیر. برقریه ده داخل اولکز:

مطلقا قادینلر سزدن قاچه جق ، ارککلر سزی عدم
 امنیتله مملو بر نظرله باشند آیاغه سوزده جکدر ، کویا
 سزك حقکزده ایدینه جکلری فکر طول قامتکزله متناسب
 اوله جقدر ؛ بو نظر آلتده صیقیلیرسکز : برپا تاغونیالی
 اولمدیغکزدن طولایی محزون ، برلاپونیالی اولمدیغکزدن
 طولایی ممنون اولورسکز.. اونلرک حرمتی مطلقا کیسه کزك
 ثقلته تابعدر. بومعاملات یالکز اجانبه قارشی دکلدیر، کندی
 آره لرنده ده ، آدلفوسلر آره سنده ده بویله جریان ایدر...
 دهاسی وار : بونلرک زوجهلرینه ایتدکلری معاملهی
 کورملی ؛ قادین هر کون آقشامه قدر چالشیر ، کوی
 قهوه سنده شراب ایچن زوجنه نفقه تدارک ایدر ؛ تارالا-
 لرده ، دره کنارلرنده ، سوقاقلرده ، اولرده چالیشانلر
 بتون قادینلردر ؛ اوته کیلر ، تنبل ، مفسود الاخلاق
 ارککلر !. اونلری آنجق غازیولرده ، کوی میخانه لرنده
 کوره بیلیرسکز ؛ قادین ایچون برکیتاره تلنه طوقونمق
 برخطوه رقصیه ، برتبسم ممنوعدر ؛ قادین مظلوم و مطرد
 بر حیات ایچنده یالکز برارککله کوروشه بیلیرلرکه اوده
 قریه نك پاپاسیدر ؛ قریه پاپاسلری قادینلره اعتقادات باطله
 تلقینندن بر آن خالی قالمازلر . بوتلقینات قادینلردن چو-
 جقلرینه انتقال ایدر .. بوجهته او مملکتلرده ظنون

و اباطیله رعایت هر یردن زیاده در : آیایانینک بحر سفید
 آطه لرندن برنده کی غلطات بصریه سنی حاکی اولان کتاب ،
 جاهل یونانیلرک خیال رعشانی او قدر تهیج ایتشدر که
 حال و مستقبله عائد بتون وقوعاتی او کتاب ایچنده مقید
 ظن ایدرلر . بومیل ظنون پرستانه نتیجه سی اوله رق
 متعصب ، خونخوار ، محاکمه سزدرلر . جاهل پاپاسلرک
 اثر تشویقاتی اوله رق بر زمان اوروپا تجارتنه قارشی قورصا-
 نلقه رقابته قالقشمشلردی ، اوزمانلر قورصان کیملرنده
 یونانی برپاپاس بولمق شرط ایدی ؛ قورصانلر تجار
 سفینه لرنده کی طائفه لری بوغار ، کسر ، اولدوررکن پاپاس
 « پانایی » اوکنده دیز چوکر ، قاتلارک مظفریتنی تمنی
 ایدردی ... یونان تاریخ اخیری میدانده دکلی ؟ آثار ،
 هر کسدن طوغروسویلر : اوتاریخک اک مهم صحیفه لری
 نهب و قتل ایله مملودر !

آرتق طعامه نهایت ویرلمش ، قهوه لر ایچیلیوردی ؛
 مباحثلر صوصمش ، سامعلر سکوتی محافظه ایدیوردی ..
 سالوندن چیقارکن رمزی بک قولاغمه دیدی که :
 — نه سویملی آدم ! نه قدر طوغروسویلیور ..

بن تصدیق ایتدم .

آرتق یونان آطه لری اوکنه کلشیدک . برطعام اثناسنده

برافق بوی مسافه قطع ایدلمشیدی . شیمدی یولجیلرک
اکثریسی ساحل جهته بریکمش ، سمایه قدر چیقان سیام
قایالردن عبارت بر ساحل یابیسی تماشا ایدیوردی . بو چبلاق
صخره لر پیشنده دکز کولکه لیور ، قاراریوردی .
بعض نظرلرده او یله بر معنی واردی که : « یونان آطه لری
بونلرمی ؟ » دیور ، خیالنده آلدان دیغنی آکلاتیوردی .
اوتده بر یونانی طانی دیغنه ، طانی دیغنه بو آطه لرک اسملرینی
سویلیور ، محصول لرندن بحث ایدیور ، حقایق مغمومه سیله
کوز اوکنده طوران بواشیای طبیعیه اغراق پسندانه
قصیده لر یاییوردی . بو آطه لرک اسملری خاطرده قالمق
ممکن دکل ، زیر او قدر چوق ، غریب ، او قدر متخالف .
بر ساحل نه قدر بسیط ، نه قدر یکمنظر اولور سه اولسون
چبلاق دکز لر له الفت ایتمین نظر لره خوش ، آرا منمون کلیور .
ساعت لرجه ماوی برافق دائروی ایچنده کیدن بر یولجی یه
طوپراغک یوزی نازک ، مهمان نواز بر خانه صاحبی کی
سویملی کورینور . دکزک روی نامتناهیسی اوستنده
آهسته آهسته قلب سیاحه تراکم ایدن آجی ، فتور
آمین شیلر بر ساحل اوکنده بردنبره برهیجان امید
قاریشیور ؛ طوپراغک قارشیننده سیاحک روحنه شو آرزو
کلیور : واپور شوراده یارم ساعت طورسه ، یارم ساعت

شوساحلده کزینهرک باجاقلریمی دیکلندیرسهم ...
 شیمدی شوخاک عریانه قارشى بتون بو حسلری ،
 بتون بو هوسلری طاتیوردم . آطه لر پیش نکاهمدن
 کچور ، اوزری رسملی بریوک شرید کبی لاینقطع آقوب
 کیدیوردی . برخلوت غیر متناهیة بتون بوساحلاری
 برفکر وسکوت آلتنده براقیوردی . آطه لردکیشیور ،
 فقط منظره لرهمانهمانیرقالیوردی : جابجا بردمت چالی ایکی
 سنجابی قایا آره سنی کوستریور ، نادر آبرزیتون آجی خفیف
 برسیس ایچنده حزین براهتازده مقرون کورونیور ،
 کاه ویکاه بریاض طاش بو عالم سیاه ایچنده بر مهتاب
 نقطه سی کبی مرئی اولیور ، بر آطه ده بر اینجه صو
 آقینتییی بررشته شفاف حالنده دکزه قدر اینیور .. فقط
 بونلرک هییچ بریسی ساحلک منظره عریاتی تعدیل
 ایده میوردی .

برقاچ مارطینک پرواز بیاضی آلتنده برمدت بویالچین
 کنارلری تعقیب ایتدک . هربری کسکین بر اوچوروم
 هیأتنده طوران بو آطه لر آره سنده دکز کاه منحنی ،
 معوج ، منکسر برخط .. کاه بیوک برحوض را کد
 نسبتی آلیوردی ...

صوکره منظره دکیشدی : یانندن کچدیکمز جزیره

اوستنده براسكى شهرك خرابه متروكه سى عميق برسكوت،
صيق برسابود زمردين ايچنده اعصار دیده بر خاطره
بشریت صاقلایوردی ؛ اوزاقده بر آطه قارلی شواھقیله
کوپوکلې بر طالغه کې طورویوردی. یانمزده کی خرابه یی
کیزلی بر آقار صویك مدھش چاغلتيسی کیریوردی :
یونی ایشیده بیلوردق ، ساحله او قدر یاقلاشمشدق .

یانمده کنج برانکلیز کوچك آلومی اوزرینه خرابه نك
قروکیسنی یاپیور ، بر بلده معدومه نك انتقاض و اغبره سندن
بر یادکار صنعت آلمغه چالیشیور . کیم بیلیر؟ بلکهده بورایه
— چبلاق چوجوغنی دکز کنارنده ییقایان — بروه نوس
علاوه ایدرهك اساطیری بر تابلو وجوده کتیره جکدر .
شمیدیلک رسام سرعتلی خطرله ییقیق دیوارلری کوسترمک
ایچون تلاش ایدیوردی .

آرتق او طبیعت مرده یه ، اوورطه لره ، اوقیالره ، او
مدھش بر عدم انتظام ایچنده مدھش بر تنهالق کوسترن
ساحلره نهایت ویرمشدك ؛ آرتق آغا جلرله محاط برر
تالاب چنله باشلایان نشانه زندگی اوزاقده بیاض ، شیشکین
یلکنلری صواوستنده قایان ، کیملرله بر موجودیت متحرکه
اثبات ایدیوردی . شیمدی طبیعت روحه اوارمله
ما تمزده یی اخطار ایدیوردی که یکیدن دارالضیافه حیاته

کیرمک ایچون دوشنده کی لباس یکرنکی چیقارمش، برقیص
کلفام عید ایچنده وجودینه بر رؤیای ربیعی طراوتی
ویرمشدر.

طاغلك اشكال بخاریه سی کیتدجه کری یه چکیلیور.
خفیف موجه لرله ایصلانان ساحل کیتدجه آثار حیات
کوسترییوردی. شیمدی قیرمزی طاملی بیاض خانه لری
بیوک باغچه لر ایچنده طاغلمش برقریه اوکندن کچورز،
صوکره تارلالری آره سنده چیفت سورنلری کوروپورز،
دها صوکره اوچ سروسال دیده آره سنده بر قبرستانک
بیاض طاشلری پارلدايور.. بعضاً یوکسکده، آهسته
کردش برقاج هوا دکرمنی بتون بومبصراتی یلپازه لیور.
خاطرات اساطیریه نك بوکچوب کیدن جولانکاهلری
اوکنده اومیروسی طامش برخیال پك قولایلقله برنشیده
مظننه نك عناصر حیاتیه سنی تدارك ایده بیلیر. هیهات،
بن اومیروسی آنجق او قومشدم..

ینه بر چنغراق سسی، ینه طعامه دعوت... ساعت
بعدالزوال اوچه کلشدی. بو اوچنچى طعام بر ایکندی
قهوه آلتیسی ایدی؛ ات صوینی، سوکوش ویمشلدن
مرکب...

بودعوته یولجیلرک پك آزی اجابت ایتدی، زیرا

اوکلن طعامنه ختام ویره لی آنجق ایکی ساعت اولمشدی. بوندن باشقه ایکی اوچ ساعت صوکرده ده آقشام طعامی حاضر لشمش بولنه جقدی. کونده درت نوبت مکمل طعام!.. بوکا آنجق بز دیو معدده سی متحمل اوله بیلیر. واپورده بردفتر واردی که واپورک ایچنده کی امور و معاملاتده بر مناسبتسزک کورنلر اورایه ملاحظه لرینی قید ایدیورلردی. بزم حسین بک اودفتره شومطالعہ یی یازمق ایستدی: «هرشی یولنده، «هرشی کوزل. فقط یمک نوبتلری پک صیق، یمک «زمانلری حسن توزیع اولنه مامش. بوافراط استطعامه «تحمیل آنجق پانتاغروئلک معدده سنه تملکله ممکن اوله. «بیلیر...»

واپور ساحلی تعقیب ایتدیکی زمان یولجیلر یمک ماصه سنده وقت کچیرمکی سومز لر. ایکی چاتال ضربه سیله طعامه ختام ویردی لر؛ هرکس کوکرتیه قوشار. ساحلک پانوراماسنی تماشا ایدر؛ کوکرتیه ده پک آز قونوشولور؛ هرکسک آرزوسی یالکز قالمق، بوتماشا ساعتلری ایچنده کندی کندینه روحنی صاللامق، هوسات خیالیه سنه کوره برعالم رؤیا ایچنده تنهاجه یاشامق، وحتى اطرافنده یولجیلر اولدیغنی اونو تمق در. بویله زمانلرده بر یولجییه نطقلر دیکلتمک آداب معاشرته موافق اوله ماز...

برخوشى استغراق ايله ينه كنارلارك سیرینه طالع .
 دكزده مختلف استقامتلرده يلكنلر طولاشيور ، قرده
 زمان زمان انسان شكللى رسم ایدیوردی . ساحله
 صولرك كیردیكى اویوقلر ، امواج بحر سفیدك آثار
 اسنانی .. ایلریده دكزه طوغرو اوزانمش بر قاعه ارضیه
 مشهود اولیور ، بو چیقندی منظره نك اوته کی طرفی
 اخفا ایدیوردی . یانمده کیلردن بری فرانسزجه دیدی که :
 — شیمدی شو چیقندی بی دور ایدنجه آتیه
 کورونه جك ...

آرتق بن اوزمانه بی صبرانه منتظر قالدیم ..
 بر ساعت صوکره او چیقندی بی دور ایتدک :
 واسع ، تهی بر قویك قعرنده قره به طوغرو اوزانمش ،
 مالطه رنکنده ، طاغنیق ، باصیق خانه ییغیلى کوروندی .
 مختلف ارتفاعده بر قاق طاغ بویكى منظره نك حدودینی
 کیزله مشدی .

بوپوش قویده بر ساعت قدر کیتدکن صوکره طار
 — آنجق ایکی واپور صیغه بیله جك قدر طار — برمدخلدن
 پیره لیمانه کیردک .

دیرکلر ، ایپلر ، یلکنلر ، باجالر آرقه سننده پیره
 شهرینک بیاضلی ، مایلی ، پنیه لی ابنیه سنی کوردک .

غایت آغیر بر حرکتله لیمانک اورتەسنه قدر کلدک ؛ اوراده
بر صندال هجومی آره سنده واپورک زنجیر توقفی بوشاندی ..
شیمدی صندالچیلر ، حاملر ترجمانلر ، اوتلجیلر بر عریبده
مدهشه ایله واپورک ایچنه طیرمانیورلردی .. رمزی
وحسین بکلرله بن ایپلرله ، قانجه لرله واپوره صیچرایان
بو آچلری متحیرانه کوزدن کچیریوردق . بو آره لق
بر ترجمان یانمزه صوقولدی :

— بر مجیدیه ویرکز . سزه ایکی ساعتده آتنه نك
بتون مواقع مشهوره سنی کزدیره یم ... بتون مصارف
ایچنده ... دیدی .

بو تکلیفده خوشه کیمیه جک برجهت یوقدی .
ترجمان کاه مردار بر فرانسزجه ، کاه ملوث بر ترجمه ایله
متمادیا سویلیور ، بو ایکی ساعتک سیاحتک منافع و لطائفدن
بحث ایدیوردی :

— صندال ایله چیقہ جغز ، شمندوفرله آتنه یه قدر
کیده جکز ، شهری لاندو ایله طولاشه جغز ؛ ینه شمندوفر ،
ینه صندال ایله عودت ایده جکز .. بتون بودوران ایکی
ساعتده بیتہ جک ؛ آتنه نك بتون ابنیه مشهوره سنی
کوره جکسکز ...

صوکره ابنیه مشهوره یی تعداده باشلایوردی :

— پارتەنون ، زاپیون ، پولیتکنيون ... قیصه
 برمذاکرەدن سوکرە آتە داخڵندە برکەرە طولاشمغە
 قرار ویردک . واپور بورادە آنجق اوچ ساعت قدر
 طورە جقدی . ایکی ساعت سوکرە عودت ایتک شرطیلە
 مردیونە توجە ایتدک ؛ ترجمان او قدر مەنون ایدی که
 کاه اوکه کچیور ، کاه آرقەدە قالیور ، نەیاپە جغی بیلە
 میوردی ...

ایکی ساعت ایچون اللهه اصمارلادق ...



دردنجی مکتوب

« القاهره » واپورندن .

ایکی بچق ساعت دوام ایدن پیره و آتنه جولانندن
شیمدی عودت ایتدک .

قبا برصندال ایچنده صبر فرسا بر بطاٹله پیره ریختمنه
تقرب ایتدیکمز زمان کونش افق مقابله یا قلا شمش . .
او طرفده کی طاغلق ، خفیف بولوطلر آثار احرار
آره سنده مغروق قالمشدی . بز لیمانک ساحل شرقیسنه
یاناشیرکن قره ده پانجورلر ایچندن اوزانان سیاه یاخود
قرال باشلر نظر تجسس لرینی ، دورینلر واسطه سیله ،
واپورلر آره سنده طولاشدیریولردی ؛ قیصه ، طومبول ،
بیاض برچوجق قولی بر کنارندن یا قه لادینی بر بیاض
مندیل ایله برلکده ، برچفت لکه سز کو کرچین کبی ،
بر پنجره نك چرچیوه سی ایچندن ، یکی کلن واپوره قارشی
آله بیلدیکنه چیرپینیوردی . بو چیرپنه بلکه بر مرثده
ملاقات ، خلجان وداع ، بلکه ده کیمسه سز بر یولجی به
کوندریلن بر صدقه آشنائی ایدی ؛ بو بر نوازش یاخود
بر تخریش اوله بیلردی .

کری به چکیلمش غازینولرینی، دکانلرینی، رنکارنک
 پانجورلو خانهلرینی کویسترن کنیش بریختم اوزرنده
 بولندیغمز زمان، ایکی کوندنبری تحسرتاب غیجیقلانان
 آیاقلمزده برحس خشنودی، برحضور تلاق کلدی؛
 طوپراق اوزرنده اولدیغمزه اینامق ایچون خطوه لرمزی
 شدتله یره اوریوردق... میخانه لره کیرن یاغلی شابقه لر،
 قیرمزی مندیله باغلی بویونلر، قابا قطیفه پانطالونلر...
 یونلر آره سنده دونوب دونوب آرقه سینه باقان پودرالی
 چهره لر ریختمک عابرین سائره سنی نظردن کیزلیه بیله جک
 برکثرته ایدی. کوچک غازینولرک - ریختمی قسماً
 تفریش ایدن - کوچک باغچه لری وقت غروبک ملایمت
 مضیئه سی ایچنده برنظر دعوتله مملو کورینیوردی: فقط
 رهبرمز روح شناسی یی نالان ایده جک برادا ایله :
 « - دها واراون دقیقه، قاچه جق صکره تره ن ! » دیور،
 قوشیوردی. براونی تعقیب ایدیوردق... ریختمدن
 آیرلدق؛ کنیش برشوسه یی تعقیب ایتدک.

برقاچ قدمه لک طاش برمردیون اوزرنده.. ایکی
 طرفی اوزون، یوکسک برصیره پنجره ایله متادی برقاچو :
 بوراسی شمندوفرک غاری. ایری، نیم مضی بر اولونک
 برکوشه سینه بوزولمش بر پنجره دن بیلتلرمز آلندی.

طارجه ، اوزون برکزینتی یرینه چیققدق : بوراسی ده
 انتظار سالونی ایدی ! اوتده بریده طاغلمش تحته قاناپه لر
 اوستنده برقاق یولجی صبر سزلقله دیککنیوردی . یولجیلرک
 قسم اعظمی برقاناپه اوکنده بریکمش ، اوراده اوطورانک
 سویلدکلرینی دیککیورلردی : بزسوق تجسسله صوقولدق .
 اوزمان کوردک که کوه زه نک اللرنده دمیر کلپچه ، یاننده
 برپولیس واردی . متعجب اولماییکز : بو برجانی ایش !
 رهبر مز بزه یاری ترکه یاری فرانسیزجه اکلادی که
 بوایتالالی برقاتل ایش ، اوکون برروس کمیجیسنی
 اولدیرمش ؛ سبب قتل ، جنایتک صورت جریانی حکایه
 ایدیورمش . مجرمک خونین کوزلرنده شایان استکراه
 بر معنای تهور ، بتون چهره سنده کوکره مش بر بهیمیت
 واردی . برقاتله بو قدر یقین بولنق بزی تتره تدی ؛ هله
 بونکله برتره ندده آتیه قدر کیده جکمز دوشوندکجه
 بتون توپلر مز اورپریوردی .

— یولجیلرله برقاتلی ایکی معصوم دوست کی کو-

رشدیرمک ! .. غریب برعادت عدلیه ...

دیدم . تره نک دودکی ایشیدلمشیدی . شیمدی کوچک
 براومنیبوس قطاری ایچنده شرقه طوغرو عودت
 ایدیوردق . واغونک پنجره لرندن کیرن خفیف بر باد مس

طاتلی ، معتدل بر حرارت کتیریوردی ؛ رمزی بك دیدی که :

— اقلیم دکشیدی . بوراده هیچ اولمازسه اون ،
اون ایکی درجه بر حرارت وار . . تره ن گاه دکزی
بولیور ، گاه اونی غائب ایدرک خام بویالی صیفیه لر آره سنه
طالیوردی . شیشلینک تراموای عربهلرینی آکدیران
واغون ایچنده عمیق بر سکووت واردی : بر قاچ غزته
خشیرتیسيله تره نك ولوله معدنیه سندن باشقه برشی
ایشیدلیوردی . اوچ استاسیوندن صوکره آتنیه واصل
اولدق . بوراده کی غار معنای عربیسيله بر غار حالنده ،
چوقورده ایدی : شهر حداسنه چیقماق ایچون یکرمی
بش ، اوتوز قدمه لی بر مردیون طیرمانق لازم کلیوردی .
رهبر مز اوکدن قوشدی ، لاندومزی تدارک ایتدی .
ملایم بر آقشامک بقیه مضیئه سی ایچنده آتنه شهرینی
طولاشدق ؛ اینشلی یوقشلو شوسه لردن کچهرک آقادیانی ،
دارالفنونی ، زاپیونی ، سرای قرالی بی ، سلطنت سنیه
سفارتخانه سنی ، بیوک جاده لری والحاصل رهبر مزك بتون
وعد ایتدیکی یرلری کوردک . آرتق غازلر یانمش ، سو-
قاقلر غلبه لقدی . بر کره شهرک آرقه سنده قالان رته نون
خرابه لرینی کورمک ایستدک : اسکی تیاترولر ، اسکی

آنفتیاترولر اوزرنده قدیم ستونلرینی کوسترین وابنای
یادکاری مقدمه لیل آره سندن خیال میال تماشا ایتدک .
خرابه ایچنده آهسته خطوه لرله بر انسان شکلی طول-
شیوردی ؛ حسین بك :
— ایشه آثار عتیقه مراقیلرندن بری ... احتمال که
بر آیدنبری کیجه لی کوندوزلو بوراده وقت کچیرمکده در ،
بونلرک پاس قوقوسندن نه ذوق آلدق لرینی بر دورلو
آکلایه میورم .

نیدی ...

ایندیکنز یلردن چیقهرق ، چیقذیغمز یوقوشلردن
اینهرك واپوره عودت ایتدیکنز زمان اورته لق بتون
بتون قارارمش ، « القاهرة » بتون الکتریق قنارلریله
بردمت اکره منوره حالی المشیدی ...

آقشام طعامندن بزم ایچون آیریلان شیلری (چونکه
طعام وقتی کچمشدی) یمکه اوطوردیغمز زمان واپور
حرکته حاضر لانیوردی ؛ « — تام وقتنده کلشرا ! »
جمله سی آره مزده طولاشدی .

توتون سالوتنده بك آز اوطوردم : بومشهوداتی
قید ایتک ایچون آرقداشلردن مساعده ایستدم .
بن یازارکن هرکس برربرر قماره لرینه چکیلیوردی .

براز صوکره بنده کوزلر مده بر اثر تعب طویدم...

ایرتسی صباح :

بوکون جمعه . واپوره بینشمزک اوچنجی کونی .
 واپور صالانیور . کوچک بر فیژنه وار؛ کیجه بر آره لق
 او یاندیغ زمان ینه بو صالینتی یی حس ایتشدیم . دها هینچ
 کیسه قالمش ، هرکس او یویور . یکر می دوت ساعت
 صوکره اسکندریه واصل اوله جغز : « ورسای » نامی
 اون دردنجی لوئی یی ، « واندوم » ستونی ناپولئون
 یوناپارتی اخطار ایتدیکی کبی یکر می دوت ساعت صوکره
 واصل اوله جغز شهرده ذهنه ، دارات دارایی زیروزبر
 ایدن اسکندر کیری اخطار ایدیور ؛ زمان قدیمک
 بویوک عسکری هندستان ایله یونانستان آره سنده برمرسای
 معتدل تشکیل اتمک اوزره آفریقا ساحلنک او نقطه
 متخبه سنده اسکندریه شهرینی بنا ایتشیدی . متعاقباً
 یونانیلردن رومالیلره ، رومالیلردن عربلره ونهایت یدعاده
 عثمانیانه کچن بوبله عتیقه موقع جغرافیسنک اهمیتی
 حسیله موجودیت مدنیه سنی علی رغم لازمه محافظه
 ایتش ؛ قارتاج ، هالیقارناس ، ترووا کبی بر خرابه حالنه

دوشمکدن قورتلش ... اورایه تقرب ایتدکجه روحده
 برطاقم خاطرات تاریخیه او یانیور؛ ایشته شانلی بروقه که
 اوزرندن اون اوچ عصر کچمش اولدینی حالدده طراوت
 اصلیه سندن هیچ برشی غائب ایتمه مشدر : اوت ، هجرت
 نبویه نك یکرمنجی سنه سی ، بوسنه مبارکه نك شهر محرم
 الحرامی ، بو آیک ایلاک جمعه سی ایدی که حضرت عمرو
 بن العاص اورایه لوای اسلامیتی رکز ایتمش ، قلوب
 مصریونه بتون بر سمای هدایت آچمشدی . . .
 حافظه یالکز بوووقه مبعلاه تاریخیه نك یاديله اکتفا
 ایده میور : بوراده حکمران اولان خلفای عباسیه یی
 ونهایت بر « آتشپاره جلادت » اولان سلطان سلیم اولک
 بر حمله ده بورایي تسخیر ایدن قبضه آهنین سطوتنی دوشو -
 نیور ... صوکره دهلیز حافظه دن برر برر بتون فلاسفه
 قدیمه ، ارسطولر ، بطلمیوسلر ، اسکی مبدلر ، اسکی
 کتابخانه لر ، اسکی فنلر ، اسکی آدملر مسابقتکارانه بر تلاش
 ایله کچوب کچوب کیدیورلر .. ده صوکره کنار دریای
 تصورده یکدیگرینه صارلمش ایکی قلب کلیور : آنطوان ایله
 قله نوپاترا .. او ایکی سودازده مشهور بوراده بولشمش لردی .
 بوتخاطر ، نظر خیال اوکنده ، بتون برهاله حسن
 وعشق پرده کشف تاریخیسنی قالدیر یور یوریدی :

محیط برضیا ایچنده بری برینی قوجاقلایان ایکی روح
 معاشقک انظار استقراقنی تماشاییدیورسکز ...
 صاونده حالا کیمسه یوق . واپور ، کیتدکجه اشتداد
 ایدن صالینتی ایچنده یولنه دوام ایدیور . کندی کندییه
 قهوه آلتی ایتدم . صوکره اطرافه کوزکز دیرمک اوزره
 کوکرتیه چیقدیم : اطرافده نه قره دن اثر واردی ،
 نه دکزک مستویت افقیه سندن . بیاض بولوطرله قباران
 کبودی سما ایله بیاض کوپوکلو کبودی دریا آره سنده
 قالمشقد . سرذ وشدید بربادغربی واپورک بتوزایپلرینی
 یرصفیر اضطراب ایله اوتدیریور ، بتون ننته لرینی مدهش
 برچارپنتی ایله صارصیور ، باجادن چیقان اسطوانه دخانی
 جهت معکوسنه یه طوغری ویا تیریوردی . بتون کمی حرکات
 امواجه بویون اکیور .. کاه باشدن ، کاه یاندن یالپه
 ایدیوردی . کوکرتیه اوستنده مقاومتلی برایکی یولجیدن
 باشقه هیچ کیمسه یوقدی . یوطبیعت متهوره ، شوبحر
 پراختلاج ایچنده کندی کندییه ایدم : بوتنهالق بنی
 تدهیش ایتدی . شوغنصر غضوبیه ، شوقوای غیر
 محدودیه قارشى آیاقلرمک آلتنده مدهش برتهدید
 انهدام ایله چاتیردایان سفینه کمینه دن باشقه صاریلنه -
 جق بروسطه ماده نجات یوقدی . کورمه مک ،

بو عجز و متروکیتدن بی خبر قالمق ایستدم . مع مافیه سالونه
کیرمه دن بردفعه او چنجی موقع یو لجیلرینه باقدم : غلبه -
لقلری ایچنده اونلر دهاتروک ، دهاتنها ، دهاتبدبخت
ایدیلر ؛ هیچ بریسنک هیچ بر طرفی کورونمور ، هربری
یاغلی بر پاچاوره ایچنه صارلمش یاتئوردی ؛ بونلرک بوغچه -
لرندن ، هکبه لرندن کندیله رنی آیرمق ممکن دکلدی :
او قدر بوزولمشلر ، او قدر اورتونمشلردی ؛ دکرگاه
وبیکاه بو ییغینلری رشاشه تهدیدی ایله ایصلا تیوردی .
بو آدملر ، شوولوله ، شواختلاج ایچنده نصل او یویه بیلیورلر ،
شومنفسی اولمایان قونداقلر ایچنده نصل تنفس ایده بیلیورلردی ؟
مجهول ، مجهول ...

سالونه کیردیکم زمان رمزی وحسین بکلرک سویملی
چهره لرینی بر ماصه باشنده قارشی قارشی یه کورددم . یوزلرنده
خقیف بر صولغونلق ، بللی بلیرسز بر معنای ناخشنودی
واردی . صور دیلر :

— نصل ؟

هوایه ، دکره دائر معلومات آلمق ایستورلردی .

— نه پک ایی ، نه پک بیوک فنا ... دیدم .

صوکره بری بریمزه کیجه لر رمزی نصل کچیردیکمزی

حکایه ایتدک ...

اوکلن طعامی زماننده. سالونه چیقان یولجیلرک عددی
 دوت بشه بالغ اولدی. اوته کیلر قماره لرندن چیقهمیور.
 لردی؛ هپسنی دکزطوتمشدی؛ دکزطوتمه سی: اوت،
 بوخال فرانسلرک داءالبحر دیدکلری مرض موقندر.
 دکزطوتانلرک درجه اضطراباتنی آکلامق ایچون
 چهره لرنده کی رنک وحالی کورمک کافیدر: بتون او
 چهره لر سیاهه مائل برصولغونلقله صاراریر، بتون ملاح
 وجهیه به خطوط آلام ترسم ایدر. بر بار ناتوانی آلتنده
 بتون موجودیت بدنیه ازیش کی کورونور... بوخال
 مرضیه قارش ی پک چوق دوالر توصیه ایدلش فقط
 هیچ برندن نتیجه مطلوبه استحصال اولنه مامشدر. «اک
 کوزل چاره کوکرتیه چیقماق، آچیق هوایه قارش
 اوطور مقدر!» دییورلر؛ فقط بوکاده تحمل، غایت
 متین بر قوه تحملیه لازم؛ چوقوقلرک، قادینلرک،
 عصبی ارککلرک الندن کله بیله جک شی دکل... دکز
 طوتمه سنک انواعی وار، دکزهرکی برطرز خصوصیده
 طوتیور: بری یاتماق، لاینقطع یاتماق، قیملد اماق،
 قاره سندن چیقماق، ایستیور؛ اوته کی اوطوره میور،
 دائماً کزینیور، خطوات عصبیه ایله کوکرتده، سالونده
 متمادیا تک وتاز ایدیور؛ براوچنجیسی مرضی اشتهای

معدی یه طوتیلیور ، کندیسنه اوילה کلیور که معدی سی
هر زمان بوشدر ؛ بعضیلری بو اشتهایی انجق بعض ما کولاته
قارشی حس ایدیور لر : ایشه بر یولجی که بر عارسز چوجق
کبی دوداقلرینی بر لیون ایچندن آیره میور ؛ ایشه بر
دیگری ده بیسکوی یه صارلمش ، فاره کبی متوالیا کیریور .
دکز طومسی اثری اوله رق مدهش مصدع بر کوزه -
کسیلنلرده وارمش !.. دکزک بوتعرضاته قارشی کندمده
بر میل مقاومت وار ، بو احوال فوق العاده پی ده ایشمدی یه
قدر وجودمده حس ایتدم ؛ حس ایتدیکم برشیدن ده
زیاده بحث ایتیه حکم ...

اوکلن طعامی زماننده یمک ماصه سی همان بوش کبی
ایدی ! آنجق بش آلتی کشی سیرک سیرک اوطور مشلردی .
بر آره لق سوز فیرطنه ائناسنده ملحوظ الوقوع قضالره
انتقال ایتدی ؛ باش قپودان اوغولتولی بر فرانسزجه ایله
دیدکی که :

— هوا آحیق ، هر زمان ارتفاع ممکن .. پاراکته مز ،
قرونو مترو مز ، پوصله مز منتظم .. ما کنه نک مقاومندن
امینز .. واپو آحیق دکزده کیریور ، یولمزی غائب
ایتمدکجه هیچ بر مخاطره یوقدر ؛ حال بوکه آلا تمز مکمل
اولدقجه یولمزی غائب ایتیه حکمز دن امین اوله بیلیرز ..

صوکره یو جیلردن بری حکایه ایتدی :

— سویش قانالک عملیات حفریه سنده استخدام اولمق اوزره برچوق مالطه لی عمله جلب اولنشدی ، ختام عملیاتده بونلری مالطه آطه سنه قدر یوللامقده شرائط مقاوله دندی . قانال آچیلدی ؛ عملیه ی مالطه یه قدر کورتورمک اوزره برواپورطوتلدی ؛ عمله اسکندریه دن بوواپوره ارکاب ایدلدی . سما صاف ، هوا ساکن ، دکزرا کددی . واپورا وچ کونده مالطه یه واصل اوله جق ، همان اوکون عملیه یی چیقارهرق عودت ایده جک ، آلتی کون نهایتنده ینه اسکندریه ده بولنه جقدی . آره دن برهفته کچدی ؛ مالطه یه کیدن واپوردن اثر کورونمادی ، آجنته مالطه دن تلغرافله معلومات ایستدی . شویله بر جواب آلدی : « او یله برواپوره دائر بوراچه معلومات یوقدر . » اون بش کون کچدی ؛ حالا خبر ، حالا معلومات ، لاحا واپوردن بر اثر یوقدی . بتون بحر سفید لیمانلرینه تلغراف چکیلدی ؛ مارسلیادن ، جزایردن ، از میردن ، استانبولدن ، بیروتدن کمی یه دائر خبر صورلدی ؛ هر طرفدن کلن جوابلر متحد المال ایدی : « مجهول ! » آرتق اسکندریه ده هر کس واپورک غرق ونادید اولدیغنه حکم ایدیور ، مایوس اولیور ، فقط هیچ کیمسه صورت وقوع قضایی ایضاح ایده میوردی .

كونلر كچيور، هر كسك ظن و تخميني كسب قوت ايد ييور،
ياش وقتور آرتيوردى ... اوتوز اوچ كون صوكره
بوصباح اسكندريه لياننده شايان حيرت بروقه ظهور
ايتدى: مالطه عمله سنى حامل اولان كى عودت ايتمشدى.
هم ده نه صورتله بيلير ميسكز؟ بتون حامل اولديغى عمله يي
كرى كتر مك صورتيله! ... هر كس واپوره شتاب ايتدى،
بتون قىلبرده خاجانلى بر تجسس واردى. قپوداندن
استيضاح ايتديلر. قپودانك جوابى پك بسيط اولدى،
ديدى كه: « مالطه يوق ... »

بتون سفرده بولنانلر كولديلر. قپودان ايضاح
ايتدى:

— اوله بيلير، ديدى؛ حسابلرني شاشير مشلردر؛
بر كره ياكشلق باشلانجه آرتق تصحيح و اصلاح پك مشكل
اولوز. كمينك زده بولنديغى بيلنه مز. اونلرده كندى
حسابلرنجه مالطه آطه سنك بولنديغى نقطه يه كيتمشلر؛
حال بوكه حسابلرى ياكش اولديغى ايچون آرادقلى
نقطه ده آطه يي بوله ماينجه: « آطه يوق، مالطه يوق... »
ديمشلر، آرامشلر، آرامشلر، عودت ايتمشلردر...
كيم بيلير؟ بلكه پوصله لرى، بلكه پارا كته لرى بوزوقدى؛
بلكه هوانك قپانقلانغى ده بوكا منضم اولمشدى...

صکړه سکوت .. دها صکړه ینه فیرطنه حکایه لری ،
 دها مدهشلری ، دها خلجان اورلری ...
 يمك ماصه سنی ترك ايتديكمز زمان قبلر من برهيجان
 هراس ايله مشخون ایدی . رمزی بك ميرلاندی :
 — اوف ، بوقورقونج حکایه لر ...
 صوکره :

— دعوت نسیان ایچون سزه برسرگذشت مضحک
 نقل ایدیم ، دیدی :
 بز رجالر ، تشکرلر ایتدک ؛ اوحکایه سرگذشته
 باشلادی :

— آثار ادبیه نه قدر مراقلی اولدیغی بنی
 بیلنلرک هپسی بیلیر ... حال بوکه اوقادینک قدرت
 قلمیه سی اوقدر ثنا ارنیوردی که مطلقا بر اثر قلمیسنی ،
 اوافق بر سطر یازیسنی کورمک آرزوسنه دوشدم . اوزمان
 برصیفیه ده اقامت ایدیوردیم که بواقامت موقته اوقادینله
 آره مزده برده قومشولق مناسبتی حاصل ایتشدی .
 مع مافیه یمین ایده بیلیرم که بن کندیسنی هیچ کورمدم .
 هیچ طانیازدم ؛ اونک بر اثرینی اوقومق آرزوسی بو
 مجهولیته رغماً آرتوب کیدیوردی . نهایت نه اولدی
 بیلیرمیسکز ؟ .. برکون اعلان عشقی متضمن برشی ،

اما آتشین کله لردن مرکب بر تقلید نامه صمیمیت ،
 اگر جعلیتی بیلنسه پک کولنج اوله حق برشی یازدم ؛
 کندیسنه کوندردم . بوندن باشقه چاره تصور ایدمه -
 مشدم ؛ کندی کندیمه دییوردم که : « بوکا مطلقا بر
 جواب ویره جک .. شبهه سز شدتلی بر جواب رد ؛
 فقط هر حالده بر جواب ؛ بکاده لازم اولان بودکلی ؛
 بو محاکمه جک کفایت ایدیوردی ؛ دها شیمیدین
 سونیور ، الیریمی اوغوشدیوردم . نهایت اونک بر
 اثرینی ، او قدر مدح اولنان قلمنی کوره جکدم ؛ بو نیم
 ایچون بر موفقیت کافیه ایدی . براستلذاذ قبل التذوقله
 دیلمی شایرداتیوردم ... بر کون کچدی ، جواب یوق ؛
 ایکی کون کچدی ، ینه یوق ؛ اوچنجی کونی ایدی ،
 آمان یاربی ، او کونی ، اودقیقه یی اونو تمق احتمال یوقدر ؛
 اونک اوشاغی النده بر مکتوب ایله قارشیمده کورونجه
 نه قدر ، امانه قدر سوینمشدم . بعض تجسس لر اولور که
 برانفعال نفسانی نسبتی آلیر ؛ نیم مراقمه بو درجه یی
 بولمشدی . سزی تأمین ایدرم که مکتوبی آلمق اوزره
 اوزاتدیغم ال بر خزان پیراخی کبی تتره یوردی . صوکره
 عین رعشه ، عین خلجان ایله آچدم ... نه کوره جکدم ؛
 یا برزاکت متهوره ایله مملو برردیه ، یا خود ... اوح !

بوایکنجی فرضیه یی دوشونمک بیله ایسته میوردم ؛ ذاتاً مقصود دکلدی ... صکره او قومغه باشلادم : حیرت ! نه کوریور ، نه لر او قویوردم ؛ کوزلرم آچیلمش اولمیدر ؛ مدهش برقهقهه یی دودا قلمله صیقیور ، ایصیریور ، کیزلمکه چالیشیوردم . آح ، اوتاثری آکلامق ایچون او مکتوبی اوزمان بنمله برلکده او قوملی ایدیکز .. بزم مراقزی تشدید ایچون سکوت ایتدی . صکره براستعجال مضحکه دوام ایلدی :

— باقکز ، عزیزم ، مکتوب برصیره مقفا القابدن عبارت کی ایدی : تنده جانم ، غنچه دهانم ، تازه فدانم ، قاشی کمانم ، طوطی زبانم .. قائمه جزئدانم ، شکوفه شکوفه دانم ، زمین و آسمانم ، باغ و بوستانم ، شمعمله شمعدانم ، یناقله یورغانم ، کپچمله قزغانم ، دیوارمله طوانم ... دهها بیلیم نه هذیانلر ونهایت : مزید محبتلو بکم افندم ... بوالقاب مضحکه دن صکره ده عادی ، اما توپیری اورپرته جک درجه ده عادی ، بر محبتنامه ... بو قرائت بنی متحیر ایتشدی . کوزلرمی قالدیروب ده قارشیمده کی اوشاغی حالا منتظر کورونجه بر جواب لزومنی حس ایتدم . بوکا ، یومدهش عادیلکه قارشنی نه یازه بیلیردم . صوکره عقلمه کلدی ؛ یازدم :

« ٻٽون مقصدم سٺڪ اسلوب مشهور ڪڙي ڪوڙمڪه
منحصردى. سوداى ادبى ايله اختيار ايتديڪم بوڪستاخلى
عفو ابدىڪڙ. جوابنامه ڪڙي لفاً اعاده ايتكى موافق
عفت ڪوردم. باقى قبول معذرتى نياز ايدرم. » ايشته
بو قدر. آره دن بيلم نه قدر ڪڍدى ؛ برڪون اونڪ
اوشاغنه ، اومتوبى ڪٿر نه تصادف ايتدم ؛ عارسرجه
صيريتهرق يانمه صوقولدى: « بكم، سٺڪ عشقداشغڪڙ
بزه طوقوندى .. یرمدن اولدم .. » دیدى. صوڪره
بر آناطولى ڪويلوسى شيوهسيهه ڪهايه. ايتدى ڪه اونڪ
ويرديكى مکتوبى نعلسه اوشاق غائب ايتمش ؛ بوصاو -
روقلغنى تضمين ايجون يڪى جامع حوليسنده ڪى يازيچيلردن
برينه مراجعت ايتمش ، چونڪه جوابنامه نڪ نه دن باحث
اوله جغنى تخمين ايلش ايتمش ؛ بكا ڪٿيرديكى اعجوبه
قلميه اوتہ ڪينڪ ، اوقادينڪ قلمى دڪل .. يڪى جامع
اولوسى ادباستدن برينڪ اثرى ايتمش ...

بز ڪوليوردق. رمزى بڪ علاوه ايتدى :

— غريب دڪلى ؛ بوڪون آرتق اوقادينڪ اسلوب
قلمى حقنده هيچ بر ميلم يوقدر. صانيورم ڪه اونڪ
افادهسى اوکاغده ڪى مضحڪات انشائيہ دن عبارتدر ...

بواعتماد بر کرم حاصل اولدی، آرتق اونی دکیشدیره -

میورم . اعتقاد ! غریب قوت ...

وایور طالغملر آره سنده یوارلاتیور ، ایپراوتیور ،

روز کار گاه اولویور ، گاه حایقیریوردی .

یارین صباح ، اوت ! یارین صباح اسکندریه ده

بولنه جغز .



بشنجی مکتوب

اسکندریہ دن .

استانبولدن حرکت مزك دردنجی کونی صباحلین
« القاہرہ » واپورینک کوکرتہ سنہ چیقدیغم زمان آفریقا
ساحلنہ تقرب ایتمش ایدک . واقعا واصل اولدیغمز قطعہ
بنم ایچون بالکلیہ مجهول دکلدی . بن اورایہ خرسٹوف
قولومبک آمریقایہ کیتدیکی کبی کیتیموردیم . اورایہ دائر
سیاحتنامہ لر اوقومش ، فوطوغرافیار کورمش ، حکایہ لر
ایشتمشدم . بومعلومات ، بومسموعات ومشاهدات بکا
اوراسی حقندہ بر فکر ویرمشدی ؛ مع مافیہ ، لیس الخبر
کالعیان ، بر کرہ اورایی کوزلرملہ کورمک ایستیوردیم .
اوٹوز ساعتدنبیری بزی قوجاغندہ صارصان دکر
کسب سکونت ایتمش ، بر یحق کوندنبیری قمارہ لرنده
اضطراب چکن یولجیلرہ آرتق مساعده کوسترمشدی .
کوکرتہ ، اضطرابلہ ساعتلر کچیرمش چہرہ لرلہ مملوایدی ؛
هرکس بی صبرانہ ساحلہ نصب نگاه اشتیاق ایدیوردی .
صیجاق بر جنوب روزکاری ساحلی اوقشایہ رق کلیور ،
کوکرتہ دہ کی بتون یورغون باشلری طارییوردی . افقدہ

- برضای زرین ایچنده براخکر مدور کبی - کونش
طوغیوردی : ایشته صباح ، آفریقانک صاف وربیی
برصباحی ...

واپور بر دائره عرضی تعقیب ایدرک قائما جنوبه
طوغرو اینیور ، بتون نظرلر ساحلده بر نشانه حیات
آرامغه چالیشیوردی . صوکره برسرور برخلجان ایله
هرکس بری برینه : « ایشته ، ایشته ! » دیدی ؛ بدنلر
اکیلیور ، یوکولیور ، باشلر متاعب اشیادن قورتولمق
ایچون برطرفه یاتیور ، پارمقلر اوزاقده بر نقطه یی
کوسترییوردی : برنهال رقیق و سهی طرزنده اسکندریه
فناری کورونمشدی ...

اسکی رومالیلر اسکندریه « ساحل سفید » دیرلر مش ؛
فی الحقیقه شهر اوزاقدن بیاض قوم رنکنده برخط افقی
منتظم کبی کورونیور . براز صوکره بریرنکی مهیمیت
ایچنده بعض شکلر فرق اولمغه باشلادی : صولغون ،
فقط رقیق و نازک برهما آلتنده برقاج خرما آغاجی ، برقاج
یل دکرمنی خیال میال حس اولئیوردی . کندی کندیمه
دیئوردم که : « بوراسی دریای آب ، اوتوسی دریای
ریک .. بوایکی دریا آره سنده اسکندریه بر جسر ذی
حیات ... » صوکره بر خولیای جولان بتون روحی

زیرین قانادلری اوستنه آلیور . بر خموشی مضی ایله بر
وسعت پر سراب ایچنده طولاشدیریوردی : نامتناهی
حجرالر ایچنده کونشه قارشی رعشه دار ضیا صولر ، تأثیر
حرارتله تتره یین سرابلر ، پریشان صاحلرینی صاللایان
سکودلر ، کوللر ، چاملر آره سندن کچور ، منور بر حقیقت
بخاریه آره سنده بر سیاحت خیالیه اجرا ایدیوردم ؛
صوکره بو عالم صمت و ضیایی بیک بر کیجه حکایه لرنده کی
نا که ظهور پر یلرله طولدیره رق بر قاچ دقیقه ده بر جهان
سحر و ذهب ایچنده یاشایوردم ...

شدتلی بر ضربۀ باد ، ایری دانه لی بر حمله باران بتون
یو جیلری برایکی دقیقه ایچون شاشیرتدی ؛ برایکی دقیقه ده
عادتا ایصلا نمشدق . صوکره ینه یابس بر سما آلتنه کیردک ؛
آرتق لیانه بتون بتون یاقلاشمشدق ؛ واپور فنار آطه سی
اوکنده ایدی . بو آطه دائرۀ مرسانک قوس خار جیسنی
رسم ایدیور و بر زمان « اپتاستاد » دنیلن طاش دو کنتیسی
ایله قره یه باغلانیور .

شیمدی شور اچقده ، شواسکندریه لیمانک مدخلنده
قطعه مصریه حقنده کی معلوما تمی ذهنأ تلفیق و تکراره
چالیشیوردم : بو قطعه منته یی ادبای غرب و شرق دن
یک چوغی تصویره اوزنمش و با خصوص فرانسز ارباب

قلمنك اك مشهورلرندن ژه رار دونروال ، ته ئوفيل
غوتيه ، ادمون آبو ، پيه رلوتى اورايه دائر اونوتماز
كتابلر تأليف ايلشلدردر ؛ مع مافيه بو آثار متأخره نك
هيچ بريسى بوندن اون اوج عصر اول جناب عمرو
بن العاصك قلمه آلدیغى بر نامه تصويرينك درجه
مكملتته ارتقا ايدمه مشدر . بونی ينه ادبای عرب
تسليم ایدیور ، بوجته ، اونامه بی نظیره ينه عودت
ايدجكز .

آرتق صاغنده خرما آغاچلری آره سنه صیقشمش
قومدن برقاج تپه جكله متوفى سعيد پاشانك ساحلخانه
متروكى ، صولده — اسکندريه لیلره برمه يره صيفيه
اولان — رمله ساحلی ، بونلرک آره سنده اصل اسکندريه
شهری کورونیوردی ... براز صوکره کنیش بر قوس
دائرة رسم ایدهرک فنار آطه سیله ساحل آره سندن لیانه
داخل اولدق . بوراده بری دیگرینه یاصلامش کبی
طوران برچوق یلکن کیسی ، برقاج پوسته واپوری ،
ایکی سفینه حربیه واردی . بوکوچک ، بوکوزل لیانك
یالکز موضع مدخلی شایسته انتقاد اوله بیلیر ؛ زیرا
ساحل جهتنده درکه بوموقعک فیرطنه اثناسنده کیلرک
دخولنی اشکال ایتمی ضروریدر . لیانك برطرفنده

فراغه قديمه نك ذخيره انبارلريني اخطار ايدن جسيم،
آغير، بسيط بنالر .. برطرفنده شهر ك قسم ساحايسى،
وار. قره دن ابهام امتزاج ايچنده چكيچ كورولتورلى،
دستره سسلرى، مقاره غيرلريلرى، باغيريشمه لر ..
بتون برانين حيات، بتون برغمغه زندكى كليوردى .
بردنبه واپورمرك لسكر آهينى برولوله رعديه ايله
قعر درياه سقوط ايتدى؛ برقاق ثانيه ايچون بتون اوتنه كى
صدالر ايشيدلر اولدى .

نهايت اسكندريه واصل اولمشدق؛ بو موفقيت
هر كسك كوزنده علنى برابتمن منونيت حاصل ايدىوردى .
فقط قايق، صندال، قرديه چيغه حق بر واسطه يوقى ؟
بر آز صبر ايدكز، شيمدى اونلر سزه عجيب ولطيف
برمنظره، « آفريكه ن » اوپراسنك اوچنجه پرده سنى
آنديرر بر صحنه حاضر ليورلر ...

اوت ! بردنبه شاشيره جقسكز؛ بز اويله اولدق .
نا كهان يوزلر جه صندال ساحل دن قوپيور، هپسى لبالب ...
حمل، ترجمان، رهبر، خانجى، اوتاجى، كور كجى ..
هپسى اوصندال لك ايچنده . مدهش بر طراقة تشويق ايله
باغيريشيورلر، كور كجى لر بتون زور بدنلرينى بازولرينه
طوپلامشلر؛ بر غيرت مسابقه ايچنده چيرينه رق واپورمزه

طوغری صندالترینی سووروکلیورلر .. آرتق حیرتمز
مندفع اولدی ؛ اوچ کون سورن بر موجودیت آشتی
پروارنه ایچنده اویوشمش اولان اعصابمزه رزم حیاتک
بوطیعی شماته سنی دیکلمک خوش کلیوردی . واپورک
کنارنده کوردکاری برلقمه اکی بری دیکرندن اول
قایمق ایچون قوشان ، حایقران ، بتون مساعی عضلیه سنی
صرف ایدن بو آجلرک منظره رنگارنکی - چونکه یشیل ،
آل ، مور .. نظره اک کسکین کلن بتون رنگلر اونلرک
قیافتلرینی تشکیل ایدیوردی - حزین بر استفاده ایله
تماشا اولیوردی ...

برایکی دقیقه ظرفنده صندالر واپورک کنارینه قدر
کلدی . بتون صندالده کیلر واپوره هجوم ایتدیلر . امان
یاربی ، اونه مهاجمه ایدی ! عجب واسقودوغامانک کیسنه
تعرض ایدن وحشی قورصانلر دها باشقه درلومی حرکت ایتمش
ایدیلر ؟ شیمدی کدی کبی ماهر وچالاک بریغین انسان
هر طرفندن واپوره طرمانیور ، بربری اوزرندن آتلايور ،
حایقیریور ، بری دیکرینی دوشوریور ، هر بری انک
یتشدیکی شیئه طوتونیور .. مردیونلره ، کوبشته لره ،
حالا طلره صاریلیورلر . زعفران ، تونج ، سودلو قهوه ،
چیولاته ، کستانه وحتی مداد سیاه رنگنده اولان بو آدملر

واپوره کیردکری زمان جبهه لری تراچنده، نفسلری کسلمش
ایدی . یورغون ، ناتوان ایدیلر ؛ فقط دیکلنه جک ، نفس
آله جق و قتلری یوقدی . قماره لره کیریورلر ، چیقورلر ،
یولجیلری اتکلرندن چکیورلر ، ایتیورلر ، قاقیورلر ؛
برسیاحک شمسیه سنه ، اوته کینک باستوننه ، بر دیکرینک
شابقه قوطوسنه صاریلیورلر ؛ دوداقلری آره سنده
ایتالیانجه یی ، روحه یی ، فرانسزجه یی ، انکلیزجه یی ، ترجمه یی ،
عربجه یی چیکنه یرک بری اوتلی ، بری صندالی ،
بری لوقطه سنی ، بری ترجمانلغی ثنا ایدیور ؛ بری
قطعات مصریه یی هر کسدن ایی بیلدیکنی و چونکه بتون
اجدادی مصرلی اولوب حتی سلسله سنک فراغه قدیمه یه
رسیده اولدیغی سویلیور ؛ اوته کی تاریخه وقوفدن باشلا یه رق
مصرک بتون آثار عتیقه سنی کندی پالطوسنک جیبی
کی طانیدیغی آکلاتیوردی . بونلر آغیر بر تر قوقوسی
نشر ایدرک آره مزده طولاشدقلری صیره ده یولجی
ارککلر چانطه لرینی محافظه ایدیور ، قادینلر اتکلرینی
طویلیورلردی .

صوکره یولجیلرک بتون اشیا سی مردیونلردن یوارلانمغه
باشلادی . زیرا برنجی وایکنجی موقع یولجیلرینه رجارلر ،
توصیه لر ایدن حماللر کوکرته مشتریلرینه جبرلر ، امرلر

ایدیور. اونلرک رأی و آرزوسنه قولاق بیله آصمقسزین
یاتاغنی، هکبه سنی یوکلنوب یورو یویریورلردی. یولجیلر
بونلری تعقیبه مجبورلردی .

یانمزدہ کیلردن بریسی دیدی که :

— هریرده یولجیلر اوکدن، حاملر آرقه دن کیدرلر.
بوراده عکسی واقع اولیور .. بوغیر قابل تصویر تذبذب
ایچنده بزده کندی رهبر منی تعیین ایتشدک : سراپا
بیاض بر بورنوسه بورونمش اوزون بویلو، سیاه بر مصری که
اسکی روما ایمراطورلغنک اعیانندن بری حالنده؛ او قدر
وقور، او قدر شدید النظر ایدی . بو آغیر باشلی
رهبری تعقیب ایدهرک مردیوندن ایندک؛ ماوی انتاری،
بیاض صاریق، صاری یلک، صاری پاپوچلو برقایقچینک
بارقه سی ایچنده ساحله کلدک . بوراده پولیس و کمرک
دائرلری واردی . مرور تذکره لرینه باقیلیور، اشیا
معاینه اولونیوردی، آرتق بتون معاملات رسمیه ختام
بولمشدی . برچفت ضعیف آتک ظهر ناتواننده قامچی
شاقلاتان چپلاق سیاه باجاقلی بر عربہ جی یه :

— اوتل بوناز! ..

دیدک، بزہ بالوجوه مناسب اولق اوزره اوراستی
توصیه ایتشلردی .

یولده بنالرك طبیعت معماریه‌سنی ، سوقاقلری املای
ایدن خلقك اجناس واشكالى معاینه ایدیوردم . نه
نظرله تفتیش ایدیلیرسه ایدلسون بوشهرك بر طبیعت خصوص
صیه‌سی یوقدر : عین سوقاقدده بر جامع شریفه ؛ بر کلیسایه ،
بر سیناغوغه ، بر قبطی مبدینه .. درت بش ملتك
عبادتخانه‌سنه تصادف اولونیور ؛ بر بیوك جاده‌ده پنجره‌لری
مشریه‌لی بر اسکی خانیه‌ی بر بیوك ، بر یکی بولوار بناسی
تعقیب ایدیور ؛ بر سوقاق طار ، مردار ، قرانلق ..
یاننده کی سوقاق کنیش ، تمیز ، هوا غازی فنارلریله مجهز
شوراده بر مصری سبزوات صاتیور ، یاننده بر آوروپالی
ترزیلک ایدیور ، اوتده بر هندلی آثار نادره صاتیور ،
بریده بر انکلز بریرا خانه آچمش ، اونك یاننده بر عرب
یازمچینك باراقه‌سی ؛ عین دكانده هم پاپوج هم مجوهرات
صاتیلیور ، آرانلسه سولفاتوده بولونیور ، سورلسه
امیل زولانك رومانیه‌ده یوق دكل ...

سوقاقلرده شیمدی سیاه چارشافلی برقادینه تصادف
ایدیورسكز که بیوك بر صو دستیسنی کوموش بیله زیكلی
سیاه قوللریله طوتمش ، باشی اوستنده طاشیور ، صوکره
اوچ مغربی درویش کورویورسكز که بر دیوار دیننده
تسبیح چکیورلر ؛ دهاصوکره سرعتلی خطوه‌لرله کیدن

ایکی بدوی به راست کلیورسکز که بدنلرینک بتون
اورتوسی ماوی برانتاریدن عبارت ... بونلرک آره سنده
سوسلنمش آوروپا قادینلری ، فسار ، صاریقلر ،
جا کتار ، ره دینغوتلر ، هر شکله شایقه لرده وار ...
قره کوی کوپریسندن کچرکن قارناواله تصادف ایتدیکنی
ظن ایدن فرنک بوراده او قدر شاشیره جقدر که هیچ
بر تخمینه محالی قالمیه جقدر .

ایلك تأثیر اوزرینه شو حکمی ویردم : بوراسی
نه غرب ، نه شرق ، نه بتون بتون آوروپا ، نه بتون بتون
آفریقا ... بوراسی مختلط ، متوسط برشی که درت پیشلی
قماش انتاری اوستنه اسطوانی بر شایقه کیمش بر آدمی ، یا خود
سیاه پانطولون ، سیاه فراق اوزرینه بیاض بر کیجه لک تقیه سی
قوندوران بر شخصی اخطار ایدیور .. نسبت سزلکی کولنج ،
فقط الوان و اشکالی شایان تماشا ؛ نظر بو تماشا لردن هیچ
یورولمور ، چونکه دئما منظره باشقه لشمقده . بورالرده
طولاشیرکن انسان کن دیسنی بر صبین اوکنده اوینایور
ظن ایدیور ، زیرا هر خطوده بر باشقه حال ، بر باشقه
حیات ، بر باشقه جهان بولیور ...

اك صوکره بر جاده دن کچدک که آروپانک بیوک
شهرلرده کی سوقاقلرک مثلی ایدی : اوزون ، بیاض

کوملکلی یاخود ماوی انتاریلی آدملر بویوک چادهیه
برخاصه میزه تشکیل ایدیورلردی . بویوک چادهیه بر
کوزل میدان آچلدی ؛ بوراسی « منشیه » ایمش . ایکی
آدیم صوکره عربهمز ، قیوسی اوکنده « غرانداوتل
بونار » لوحهسی آصیلی ، بیوک بربنانک پیشکاهنده توقف
ایتدی ...

اوله کیردیکم ، ثابت بر او طه سی ایچنده بولندیغ
زمان باشمده خفیف بردونمه حس ایتدم ، کویا طور دیغ
یرک آلتنده بر بحر مهور واردی : اوتوز بو قدر ساعت
سورن واپور صالتیسنک دوام تأثیری بنی بو حس کاذب
ایچنده بولندیریوردی ...

شیمدی بحر سفیده ناظر بر او طه ده بتون بوسیاحت
نوطه لرینی قاره لیه رق بتون مشاهداتی تخطرہ چالیشیورم :
صبح کونشنک تازه شعاعاتی آلتنده قاینایان او خلق
صدرنکی ، او عالم اصوات والوانی ... برر ابنوسپاره
خنده کار حالنده اولان عرب چوجقلرینی .. کنزلری
سیاه بویالی کوزلری .. یاریم هندستان جویری بیوکلکنده کی
عجیب فسلی .. انتاریلی عربہ جیلری .. بتون بررؤیای
نوینی یادمدن کچیریورم .

آرتق اوکلن طعامی وقتی کلدی . طعامدن صوکره

پروگرامی ترتیب ایدہ رک اوکا کورہ شہری دور و تماشہ
 ایدہ جکم . بورادہ کی مدت اقامتہ آنجق اوچ کون
 سورہ بیلاہ جکندن غائب ایدہ جک زمانہ ہیچ یوقدر ...



آلتنجی مکتوب

اسکندریه دن

بوکون آقشامه قدر شهری طولاشدم . بیوک بر
تعب عضلی ایچنده مشهود اتمی یازه جم . بتون کوردکرم —
احاطه ایتدکری تموجات حیاتیه اعتباریله — شایان قید
ایدی . بتون خلق سـوقاقلرده برکروان بین الملل کبی
آقوب کیدیور . بیکلرجه هوام طیاره نك ویزلتیسیله
مملو اولان چارشولرده بیکلرجه رنك وشکلده اشخاص
طولاشیور ، قارشیشیور ، اوچ ربعی امراض عینیله
ایله معلول اولدیغندن چارپیشیور ، باغریشیور ... بریانده
اك روحفریب شعشعه سیله زینت وسفاهت ، بریانده
اك دلخراش بر منظره فقر وسفالت . شیمدی چیلاق
بردیلتنجی کوریورسکز ، کندیسنه آجیمق ایستیورسکز :
اوسزه اوضاع وحرکاتنده اوילה بروقار کوستریورکه
آنجق سوسلنمك ایچون دیلتنجی قیافته کیردیکنه ذاهب
اولیورسکز . اسکندریه خلغنك رنك وشکله ، بر
شاعریت ظاهریه دیمك اولان شیرله جبلی بر محبت
وارتباطی وار : برسمای کبودفام آلتده ، برافق آتشیله

قارشى ياشايان ، بتون الوان ضيائي عكس ايتديرن بر
 خاك متجانس اوزرنده طولاشان ، برضايى براق ايچنده
 بتون تفصيل اشكالى تماشا ايلين بر آدمك بوحيط مستنايه
 لايق برقيافت رنكينه بورونمى ، بوپارلاق تياترو ايله
 متناسب بر آقتور اولمى لازم گلزمى؛ ايشته بونك ايچون
 اسكندريه ليلر تزييد ملاحظه خادم نه وارسه هپسنى
 استعماله هوسكار درلر؛ بومملكتك خانه سنده ، دكاننده ،
 سوقاقلرنده ، ميدانلرنده بتون برشعر آرايش وار. فقط بو
 آرايش هنوز پك ظاهرى ، پك جعلى برشى: اورانك
 خصوصيت مصريه سى همان همان غائب اولمش ، اوروپا ليلغى
 دها بتون بتون ميدانه چيقه مامش ؛ دوه قوشى كې نه
 دوهيه بكنزيور ، نه قوشه ...

بن بونلرى سير ايده رك ، بونلرى كوره رك محموديه
 قنانه طوغرى ايلريليلوردم . هوا پك كوزل ، سما بتون
 بتون براق!.. ايشته ماوى ، كنش ، متموج برانتارى
 ايچنده كوچك وجودينك كوچك برپارچه سنى صاقلايان
 برعرب چوجنى ؛ ايشته قوللرى كوموش بورمه بيله -
 زيكارله بوغوق ، قولاقلرى كنش حلقه لرله دليك ،
 كوزلرى مكحل قيز چوجقلر .. ايشته قوجه صاريقى
 برمصرىء سالدیده كه مینی مینی برمركبك قویروغنه یقین

بر نقطه سینه قورولمش ، صیق و قیصه خطوه لرله کیدیور..
ایشته بر قهوه اوکنده باجقلرینی بری بری اوزرنده
چاپرازیلهرق نارکیله لرینی غورولداتان کیف مراقیلیری ،
بتون بوشیلر طار بر طوپراق سوراقغک یردن قالقان
توزلری ایچنده بوغولیور ؛ صاری پابوجلر بیاضه ،
بیاض صاریقلر سیاهه یاقلاشیوردی ...

صوکره بومشاهداته فیکرک بر حرکت مجبوریه سی
نتیجه سی اولهرق تخطرات تاریخیه قاریشیور : بوکون
کوزمک اوکنده کنیش بر جمع الاضداد تشکیل ایدن بو
یلده مختلفه الحقایق زمان قدیمک اک کوزل شهری دکللی
ایدی ؟ اوزمانک بتون امصار موجوده سی بر غبطه رقیبانه
ایله اسکندر یه باقیورلرمی ایدی ؟ ادوار منسیه نك
اعاظم اصحاب فن و ادبی روحلرینی بورانک نسیم معتدلی
ایچنده تهزیز ایتمک آرزوسنه مقاومت ایده مه مشلردی ؛
اسکندریه بردارالقرار فحول اولمشدی . اوماضی یی
کوز اوکنه کتیرکز : بوشهرده بر فیضانکاه معارف
بوله جقسکز . صوکره برده قله ثوپاترای دوشونکز :
بتون شومیدانلری کوزل برقادینک اجنحه خیالی آلتنده
طاتلی بر کولکیه ، مکتوم وخفی بر ذوقه طالمش ، حسن
وجاذبه دن متولد بروقار دلفریب ایچنده کوره جکسکز ..

تخطرده دوام ایدیکز : ایواہ ، بر زمان اولیور که لیلہ
 نسیان بوشهر لطیف و مفید اوسته دوشیور ؛ بتون
 کتبخانه لری یسوعیلرک نار جهل و تعصبی برکتله رما
 صحنه مدنیتدن کیدیور .. برکت ویرسون که بوافراق
 پک موقت برشی اولیور : موقع جغرافیسنک اهمیت
 امداده یتیشیور ؛ اسکندریه قوجه بحرسفیدک حق
 نکهبانسی مکافاتی اوله رق تاریکی منسیتدن قورتولیور ؛
 اوراده ینه غیرت ، ینه تجارت ، ینه حیات باشلايور.

راکب اولدیغم عربہ محمودیه قتالک صاغ ساحلی
 تعقیبه باشلادی. اسمندن اکلاشیله بیله جکی اوزره بوقال
 خاقان جنتمکان سلطان محمود خان حضرتلری زماننده
 آچلمشدر . اوزمان قطعه مصریه نک محصولات داخلیه سنه
 بر معبر طبیعی آرامش ، قاهره یی اسکندریه یه ربط ایتک
 ایستلمش ، بوقال یدی بحق ملیون فرانق صرفیه بر
 سنه ظرفنده کشاد ایدلمش ایدی . بوکون قتالک کنار
 یمینی اسکندریه لیلرک الک کوزل تفرجگاهلرندن بریدر :
 بتون ساحل بونیجه لطیف آقاسیا آغاجلرینک معطر
 کولکه سی ایچندن کیدن عربہ بی نظیر باغچهلر ، بی نظیر
 صیفیه لراو کندن کچيور. باغچهلر خرما ، موز ، پورتقال ،
 لیمون ، فرنک اینجیرلری کی بزم نادرا کوردیکمز

نظر ربا آغا جلرله مملو ؛ اورالرده اوילה آغا جلر وار که
 دالری صالقم سکود طرزنده طوپراغه طوغرو آقهرق
 یره کومولیور ، کولکشوب یکیدن بر آغاج حالنی آلیور .
 بعض باغچه لرده آغا جلر او قدر صیقلاشیور که نظر
 بونلرک اوتہ طرفنه کچه میور . بوراسی بتون بر عالم
 ظل وخیال . . . برده قارشی طرفه اوتہ کی ساحله
 باقکز ؛ ایشته ینه تضاد قارشیکزه چیقدی : بوساحل
 پرزیب و ثروت ، قارشیکی ساحل — قطعہ مصریه پک
 مبدأ حقیقیسی ، — خراب و حقیر ... او طرفده فقیر
 عرب قریه لری که یریر دیزلمش طوپراق کلبه لردن ، بر
 مکعب ترابی اوسته ییغیلان قورو اوتلردن عبارت ...
 آمان یاربی ! تموز ، آغستوس آیلرنده بواقلم حارک بتون
 عناصر موجوده سی قایتادیخی صردهده بوابتدائی مساکنده
 نصل یاشانیر ؟ بومسا کن حقیره اوکنده ماوی ، اوزون
 کوملکلی ، معلول العیون قادینلر کاه قنالک کنارینه قدر
 اینه رک نیل صوینی ایله دستیلرینی املا ایدیورلر ، کاه
 آفریقانک شمس حارینه قارشی وجودلرینی دیکندیریورلر ؛
 بوقادینلرک آره سنده چبلاق ، سیاه چوجوقلر قوشو-
 شمقده ؛ تویلری دوکولمش بر کلب مریض بولندیخی
 نقطه ده کی قوملری اشهرک بر سو پرندی دینه سی آرامقده ...

بولو حهٔ سفالتدن یورولان نظر کزی دها ایلری سوق
ایدکز : مارهٔ ئوتیس کولنه قدر ممتد اولان بر صحرای
زمر دین کوزلر کزی ترویج ایده جک، اونک ماوراسنده کی
قطعهٔ سماویه نك کبودی شفافی روح کزه تسلیت ویره--
جکدر ... بر کرده شوایکی ساحل متباین آره سنده کی
راه سیال تجاری یه باقی کز: قنال اوزرنده متعدد ماحونه لر
وار که قالین خالاطر اعانه سیله باغلی اولدقلری دوه لری
تعقیب ایدیور؛ بودرت آیاقلی یدجیلر متوکلا نه بر باش
اهترازیله قارشیکی ساحلی چکینه یور. کاه و بیکاه بر دوه جینک
نعرهٔ تشویقی بتون بوراده کی هوای آشتی ایچنده طالغه لانیور؛
صوکره ینه سکوت، عمیق بر سکوت عودت ایدیور.
شیمدی بتون بو عالم نوین اوزرندن آره صره بر قوش
طابوری کچیر کز: ایشته محمودیه قتالی تمام اولدی،
بر آزده قاشی ساحله کچمک، بر آزده اوراده می
طولاشمق ایستیورسکز؟ اوکوستبک یوه لرینی ده کورمک
ایستیورمیسکز؟.. یالکز بر کلبه نك قاپوسندن باقمق
ندامت کزی دعوت ایچون کافیدر: زیرا ایلک استقبال کزه
شتاب ایده جک شی تأثیر حرارتله شدتلنن بر رایحهٔ کریهه در؛
اوندن صوکره چبلاقلق، آجلق، خسته لق، کورلک،
داء لفیل، جزام.. بواسباب فلاکتک هپسنی کوره جکسکز.

آرتق باشکزی چویرکز ؛ عربہ جی یه : « عودت ! ... »
 دیگز ... بودفعه یولکیز درت کوشه لی بیوک طاشلرله
 دوشنمش برکنیش جاده یه مصادف اوله جقدر ؛ طرفینده کی
 بنالربتون اوروپا اصولنده ، یوکسک ، متین ، محتشم ..
 بویول سزی بر اوروپا محله سی ایچنده منشیه میداننه قدر
 کتیرر . اورادن ساحله قدر اینوب بر قطع زائد شکلنده
 اولان اسکی لیمانی تماشا ایتک پک قولایدر : بومر سای
 متروکک کنارنده بوکون استردیه قابوقلریله اوینایان
 برقاق چوجوقدن ، آقشام تعلیمنی اجرا ایدن برایکی
 اونباشی طاقندن ، تعلیملری سیره چیقان برقاق اختیار
 قادیندن باشقه کیمسه یی کوره میه جکسکیز ؛ فقط بوتنهالغه
 مقابل قارشیکزده دکز ، طراوت دائمه سیله لاینقطع
 مغرورانہ صاللانان دکز وار ، اونک طالغهلرندن باشقه
 هرشی سکوت ایدیور ، بوراده بردقیقه جق اولسون
 طالغهلرک آهنگ بیانی دیکلیکزده صوکره دوشونکیز که
 عجایب سبعة عالمدن بری ، - اسکندریه فناری - قارشیسنده
 بولندیگکز بولطیف قویک بر حدینی تشکیل ایتشدی ؛
 شیمدی اونفیسۀ نادره دن آنجق - بحرسفیدک امواج
 وارده سنی کوپورتن - بر نقطۀ سنکین یادکار قالمشدر .
 بن شوراده ، شوساحل تنها اوزرنده بر کوچک

تاریخنامه دن اسکندریه نك حال سابقى تحرى ایدیوردم :
 شوكنج ، شوزنده شهرک غرب و شرقنده ایکی بیوک محله
 واردی که بوکون قوم ییغینلری آلتنده مدفون و مخفیدر .
 غرب طرفنده کی محله یه « راخوتیس » دیرلردی ؛ بو محله
 « اونوست » لیاننك کنارندن کوله قدر امتداد ایدردی .
 ایمپراطور ته ئودوزك امریله تخریب ایدیلن سراپیس معبد
 مشهوری راخوتیس داخلنده ایدی . مارق آتپوانك
 قله ئوپا تراپیه اهدا ایتدیکی کتابخانه معروف او معبد مشهورك
 یاننده ایدی . شرق طرفنده کی محله نك نامی « ویهبون »
 ایمش ، بو محله دن بوکون فرانسه وانکلتره ده کی ایکی ستون
 حجریدن باشقه یادکار قالمامشدر . بوستونلر نه ایدی ؟
 اسکندر کیرک بالذات ترسیم ایتدیکی قطعه نك « قله پائوترا
 ایکنه لری » دینلن عمودات افتخاری ...

زمان قدیم دن الیوم اسکندییه ده پك آزشیلر قالمشدر که
 بونلرک اک مهمی - رومالیلرک مصر داخلیدن نقل ایتد -
 کلری - پومپه ئی ستونیدر . بوستون مشهوری کورمک
 ایچون مطالعه منزویانه نه نهایت ویردم : ینه برعربه لازم ،
 چونکه نه مملکتی ، نه مملکتک لسانی بیلورم . بویله
 یرلرده برعربه جیدن صادق رهبر بولنه ماز . آتلیری
 حقنده پك آز رحیم اولان بورهبر قامچیسینی شاقلاتدقدن

برقاچ دقیقه صوکره پومپه ئی ستونی - نیچون بونام ویرلمش ؟
 مجهول ... - اوکنده بولنیوردم . آمان یاربی ، برزمان
 مدرسه فلاسفه اولان بوموقع بوکون نه قدر سفلی ، نه قدر
 نفرت آور برخدمته وقف ایدلمش ! بوراسی هیچدم
 کوروله جک بریر دکلش ؛ زحمتمه آجیدم . نادمانه بونار
 اوتلنه عودت ایتدم . روحم برحس غشیان ایله مشحون
 ایدی : پومپه ئی ستونک منظره کریمه سی بنی اوقدر
 متأثر ایتمشدی . ناپولیون اردوسندن مصرده وفات
 ایدنلرک بالترجیح بورایه نیچون دفن اولندقلرینی ده کندی
 کندیمه ایضاح ایده مدم . واقعا بر آثار عتیقه مراقلیسی
 ایچون بو ستون شایان زیارت اوله بیلیر ؛ زیرا او آدم بو
 ستونک یوز اون درت قدم ارتفاع عمومیسندن اولدیغنی
 وطقسان قدم طولنده ، طقوز قدم قطرنده یکپاره
 برطاش اونک اصلی تشکیل ایتدیکنی . . سراییس
 معبدینک انقاضندن اولسنی قویاً محتمل بولندیغنی ودها
 بوکی تفصیل تاریخیه و هندسیه یی اوکرنمکدن متلذذ
 اوله بیلیر ؛ فقط یولی اوستنده تصادف ایدیلن بلاد مشهورده
 برجولان تنزه اجرایی آرزوسنده اولانلری بویله تماشاالر
 پک آز ممنون ایدر . بن ایسه هیچ ممنون اولماشدم .
 عودت ایتدیکم زمان ساعت بعدالغروب یاریمه کلشدی ؛

اوتلك مقياس الحراره سى اون يدى درجه يى كوستريوردى .
 كانون ثانينك نصف اخيرنده اون يدى درجه بر حرارت
 ايجنده پك لطيف تنفس ايديليور .
 اوتلده اون ، اون ايكي كشي ايله برلكده پك كوزل
 براقشام طعامى ايتدك .

شيمدى دكزه ناظر براوطه نك آچيق پنجره سى
 اوكنده شونلرى يازييورم . قارشيمده آفريقانك لطيف
 يزكيجه سى ...



یدنجی مکتوب

اسکندریه دن

ایکنجی کون.

بوکون بعدالظهر رمله صیفیه لری آره سنده برجولان
اجراسی مقرر دی. فقط اوکنه قدر زمانی ینه حسن
تصرف ایتک ایستیوردم. اوتلک صاحبی اولان مادامه
صوردم:

— مادام، بوراده آثار عتیقه نوغدن کزیه جک،
کوروله جک یرلر نره لیدر؟
قادینک قالین دوداقلری مستخفانه بر تبسم رسم
ایتدی:

— بلکه یوز بیکنجی دفعه اوله رق ایشتدیکم بر
سؤال... فقط بن دأما عین جوابی ویریرم: بوراسی
بر خرابه دکل، معمور وتوانا بر شهر در؛ بوراده انقاض
معماریه، متروکات حجریه آراماملی. اکر بر بلده نک
مطلقة بر خاطره ماضیه صاقلامسی لازمه اسکندریه نک
بر تاریخی، پک شرفلی بر تاریخی وار. بورانک ابنیه سی

سوقاقلرده ، میدانلرده دکل کتاب صحیفه لرنده در .
 بطلمیوسلرک سرگذشت حیاتی اویمه طاشلردن قیمتسز -
 میدر ؟ ..

مادام بونار اوقادینلردن که شایان حیرت بر سهولت
 بیان ایله برسؤاله بیک جواب ویریرلر . مادام کوزلرینی
 کوزلریمه دیکدی ؛ نطقک ویردیکی تأثیری آرییوردی .
 صوکره ینه سوزه باشلادی :

— بورانک منتظم جاده لرینی ، کوزل میدانلرینی
 کزملی ؛ ساحله قدر اینهرک هوای بحرسفیدک تأثیر
 مفرحی ایچنده قالماملی ، اوندن صوکره طاتلی بریورغو -
 نلغک باجاقلرکزی بوکدیکنی حس ایدنجه اوطه کزه
 کیرملی ، بوبلدۀ قدیمه نك تاریخ مفیدینی او قوملی ...
 باقکز ، افندم ، تاریخ بنم اک سومدیکم بر مطاله ایدی ؛
 بر محبه عزیزه مک توصیه مصرانه سی اوزرینه جبر نفس
 ایدهرک مصر تاریخنی او قودم ... شیمدی تاریخ کتابلرینی
 الدن براقه من اولدم . آمونیوس ، پلون .. بونلر بنم
 رؤیالرمه قدر نفوذایتدیلر . آه ، موسیو ، تاریخ پک سحر
 بر مطالعه ...

اوکلن طعامنه قدر بسیط بر جولان تنزه یه قرار
 ویردم .

اوتل بونار هر وجهه شایان توصیه ؛ یالکز بر محذوری
 وار : موضوع اولدینی سوقاق !.. بوکنیش طریقک بر
 باشند بر باشه ایکی طرفی بیراخانه ؛ اورالرده خدمت
 ایدن تازه قادینلر — هر بری کندی لسانیه — کلنی
 کچنی دعوت ایدیور ؛ بوکا اجابت ایده جک ساده دل
 ارککلرده نادر دکل ... بو حیا سز قادینلر یالکز دعوت
 شفاهیه ایله ده قناعت ایتیه رک کستا خلقده قولکزدن
 طوتوب سزی ایچری چکمک درجه لرینه واریورلر ..
 اکر اسکندریه کیدوب ده اوتل بونار ایتسه کز اوتلک
 قپوسندن چیقار چیقماز صاغه صوله میل ایتمکسزین
 یولک اورتەسندن کیتمکزی توصیه ایدرم. منشیه میداننه
 وارنجهیه قدر هر لساندن : « بورایه کلکز ... »
 جمله سنی ایشیده جکسکز ...

منشیه میداننده قهوه ، باغچه ، هیکل ، بیوک بنالر ،
 بیوک مغازه لر .. برپارس حاده سنده کورولن هر شی وار ؛
 بورای آوروپادن آیران یالکز پک آلاجه لی ، پک کورولتولی
 بر خلق ... بوراده بر قهوه خانه نک یایا قالدیر ملری اوزرنده کی
 صندالیه لرندن برینی اشغال ایدکز : قارشیکزده کی جریان
 الوان و اصوات .. ایکنجی درجه ده بر شهر ایچنده بو قدر
 شدت حیات سزی متعجب ایده جکدر ؛ روز کار کی

کچن عربهلر ، شمسک کي اعوجاج ايدن قامچيلر سزي
 شاشيرته جق ... فقط بيلکزرکه سياسته قطعه مصريه نك
 مرکزى قاهره ايسه بتون اعتبارات سائر ايله اسکندريه در .
 نفوسى آنجق اوچ يوز بيکه بالغ اولان بوشهرده اوچ
 ميليون کشيلک بر حرکت و فعاليت وار : بونک سببي
 تجارتدر . بوراده برر خط مستقيم اوزره اوزايوب کيدن
 سوقاقلر هر کون طولور ، بوشاليور ، سوقاقلري تزين
 ايدن مغاره لر برزندکي اخذ و اعطا ايله دائماً مملو ... قطعه
 مصريه نك همان بتون ادخالات و اخراجاتى بو طريقدندر .
 بتون بوسوقاقلردن طاشان خلقک دماغى کار و ضرر
 حسابيله ، اندیشه تجارتله طولودر : بوراده بتون امتعه
 جهانک روش بازاريسى تعقيب اولنيور ؛ بورسهنک اک
 کوچک حرکتى خلقک قلبنده بر عکس العمل حاصل
 ايدنيور ... بونلر هپ اعلا ؛ يالکزي ابي اولمايان بر نقطه
 وار : بتون بوارباب تجارتک يوزده طقسان طقوزى
 اجنبى ؛ بتون جالب نظر مغازه لري اوروپادن ، آسيادن ،
 آمريقادن کلن يابانچيلر طولديرمش . اصل مصر خلقنک
 قسم اعظمه عربيه جيلق ، حاملق کي امور خسيسه
 قالمش . ذکي بر مصرلى ، شهبه سز بو حاله تلميحا :
 — شهرمز زنکينلشدکجه بز فقيرلشيورز ؛ غالباً
 شهرمز بزي طولانديرنيور !.

دیمشدی ...

نه اولورسه اولسون ، ملایم بر ضیای آفتاب آلتند
قاینایان بوخلقك منظره رنگا رنگی روحی اکلندیریور :
هر رنگ وار وحتی بعضاً بر شخص اوزرنده هر رنگ
وار . اك غریبی شوراسی که بیاضله ماویدن صوکره غلبه
صاری رنگه قالیور : چوللری ، اوبی حدود چوللری
ستر ایدن اولون خزایدن بوخلق دها اوصامامشدی ..
آره صره کچن قبطی قیزلر ، — بونلری قوللرنده ،
باجاقلرنده کی قالین ، آغیر بیله زیکلردن ، برصاری مقره
ایله بورونلری اوزرنده آسیلی سیاه پچه لردن ، ماوی
چارشافلردن طائیرسکز ، — صوکره اونلری تعقیب
ایدن کوزل ، اسکندریه نك کوزل قادینلری منظره یی
مینهلر ، چیچکلر .

بوتماشای جریان ایچنده وقت پك چابوق کچور :
ایشته اوکلن طعامیچون اوتله عودت زمانی کلدی ...



برسرعت شیدایانه ایله عربه جاده لری کچور ، خلق
آیریور ، برینك اوموزینه ، اوته کینك شمسیه سنه
چاره برق کیدیوردی ؛ قامچی لاینقطع شاقلا یور ، آنلر
عقورانه قوشیوردی ...

بن بومتهور عربہ ایچندہ متحیر، شاشقین .. نتیجہ یہ
منتظر دم: بو طیر بی شعور انک آدی «مسیرہ یہ کیدیش» دی .
اوکندن کچدیکمز بنالر عادتا دونیوردی ؛ بن کندی
کندیہ : «نه اولیورز؟ ..» دییوردم ؛ نیتده رملہ صیفیہ لری
آرہ سندہ برجولاندن باشقہ برشی یوقکن بو تلاشک
سببنی آ کلایہ میوردم ...

شیعبدی آرتق آتلیر کوپورمش ، ترلہ مش ، عربہ جینک
حدت تازیانه سی کچمشدی . شہردن چیقمش ، اوزون ،
مستقیم ، ایکی طرفی آغاجلی بریولہ داخل اولمشدق ..
یول اوزون ، تنہا ، آنجق عجمی بر بیسقلت مراقیلینی
خشنود ایدہ بیلہ جک بر حالده ایدی ؛ شکر قامشی یوکلو
برمرکی تعقیب ایدن بر بدوی ، بر کوشک عربہ سیلہ
عودت ایدن مغرور بر مادام ، ای بر سواری اولمدیغی
دیزکین طوتیشندن آ کلاشیلان فسلی بر دلیقانی نظر
تجسس اقع ایدہ میوردی . قلبمدہ بر حس ، بویتمز توکنمز
یولی کچمک ، او قدر ثنای حسنی ایشیتدیکم حدائق
صیفیہ یی کورمک ایچون استعجال ایدیوردی ؛ فقط
آرتق آتلیر یورولمش ، ترلہ مش ، اشتہاسز بر طیریسہ
دوشمشدی . سما صاف ، عادتا بر شیشہ پارلاقلیلہ مجلا

ایدی ؛ صانکه خرما آغاچلرینک کنیش یاپراقلری بتون
بولولطلری سوپورمشدی ...

یول دها دوام ایتدی ، دوام ایتدی ؛ ونهایت صفیهلر
آره سنه نفوذ ایده بیلدی .

آه ، بوراده هر کسک خسیاتندن نیچون آیرلدم ؟
نیچون ، اوواسع باغچه لرك منظره مزینه سنده هر کسک
بولدینی کوزللكی نیچون بوله مدم ؟..

اوراده بردقت هندسیه ایله دیکلمش ، متناظر ،
متقابل ، کاه متوازی ، کاه بیضی آغاچ ییغینلری ..
بویغینلر آره سنده معلومات ضیائییه مستند بر حساب فی
ایله سرپیلمش پنبه ، صاری ، ماوی ، قیرمزی ، کوزل ،
نادر چیچکلر .. صاری ، قیرمزی کل داللرندن یاپیلمش
سایه دار ، معطر قمریهلر .. خرما ، باؤباب ، آقاسیا
آغاچلریله تحدید ایدلمش سرین یوللر .. روحنواز برزمزمه
ایله برچوجوق کبی کندی کندینه سویلنن دلنشین
فسقیهلر ، مرمر حوضلر .. یشیل ، مزهر داللر .. صوکره
بتون بونلری برترانه حیات ایله غیجقلایان قوشلر ،
رنکین ونظر ربا قوشلر ، دیار حاره قوشلری .. پک لطیف
شیلر ، پک چوق لطیف شیلر واردی . بتون بونظر پیرا
شیلرک قعرنده اویولمش ، بچلمش ، براویونجاق کبی

ایشلنمش ، قیرمه لی ، دانتلالی بر بنا کولکه لنیوردی ..
 اوراده بتون بر فن ، بتون برزینت واردی ؛ هیچ
 طبیعت و حقیقت قالمامشدی . اوراده آغا جلری بر حذایه
 کتیرمک ایچون کسمش لر ، قیرمش لر ، یچمش لر .. رنگلری
 ایستدکلری کبی مزج ایتمش لر .. دالره برر شکل هندسی
 ویرمش لر .. طبیعتی اکمش لر ، بوکمش لر ، بروضعیت جبرییه
 قویمش لر .. بوموازنه ریاضیه آلتنده ازیلن بواشیای
 طبیعیه آره سنه شکرمله جی شاتوسی کبی فیستولی ، بویالی ،
 نقشلی برشی بنا ایتمش لردی .. بونلری یاپدیرانلرک ذوق
 غالباً یوز ویرلمش برچوجوق کبی ایدی ...

یان یانه زینت ، قارشی قارشییه آرایش ؛ هپ او ،
 هپ او ایدی : کوشکلری برر برر کچوردق ، کیدیوردق ،
 کیدیوردق ؛ دائماً اونمایش ثروت ، دائماً اورقابت زینتدی .
 رمله صیفیه لری بکارومه ئو ژولیه ت او پراسنک بر پرده -
 سنده کی نوبهار ده قورینی اخطارایتدی ؛ اونلر حقیقت
 و طبیعتدن او قدر اوزاقدی ؛ بکا اویله کلیوردی که بو عالم
 صناعی ایچنده صمیمی بر حس یاشایه ماز ..

برکت ویرسون که بوباغچه لرک مهندس لری بر غیرت
 کیمیا پرستانه ایله چیچکلرک قوقولرینی تعدیله اوزنمه مشلردی ؛
 وراده یالکنز او طبیعی ایدی . بر هوای معطرک نفحات

تسلیه سی ایچنده ساحل بحره قدر کلدك : بوراسی آرتق
 رمله دکلدی ؛ بورایه « سان استه فانو » دیورلر ؛ بوراسی
 غازینوسی ، کوچك دکنر حاملری ایله کوزل برپلاژ ..
 دکنری کوردیکم ، اونك نازا بدیسنی طالغهلرك زمزمه
 شکایاتی صورتنده حس ایتدیکم زمان کندی کندیمه :
 « ایشته طبیعت .. کوزل ، مغنی طبیعت ... » دیدم . کنارده
 کوپورن موجه لر شیمدی روحه بر رشاشه طراوت دو کیور ،
 رمله باغچه لری آره سنده مبالغه زینتدن یورولان روحی
 صانکه یی قایوردی ...



عودت ایتدیکم زمان آرتق آقشام اولمش ، هوا
 غازلری سواقا قلرده کی خطوط مضیئه سنی دیزمش ، رنگلر
 بر بخار سنجابی ایچنده غائب اولمش ، قاپولر قاپانمش ؛
 آنجق قهوه خانه لر ، بیراخانه لر ، دها کورولتولو ، دها
 مهلك یرلر آچیق طور ییوردی . کجیکمش ارککلر
 سریع خطوه لرله اولرینه دونیورلردی ؛ کوندوزکی
 ولوله یی شیمدی بر سکوت بی تابانه تعقیب ایتمشدی .
 عزیز یولداشم حسین بکله برلکده بز بوکیجه مزى
 بر مشاهده مفیده ایله اشغال ایده جاك ایدك : مصر

رقاصه‌لرینی کوره‌جکدک ؛ بونلرک برسمت مخصوصده
اولدقلرینی اوکرشمشدک ...

مصر رقصه‌سی ، فراغنه قديمه‌نی غشی حظوظ
ایچنده براقان اوپری شوق و اهتزاز... اونی بزشمیدی ،
یمکدن صوکره کوره‌جکدک: بوفکر بزی آقشام طعامنده
تعجیل ایدیوردی . بتون اسکی کتابلرده اورقصه‌لرک
قصیده شهرتی اوقومامشمی ایدک ؛ اونلر بزم خیالزده
برحسن متموج کبی انطباع ایتهمشمی ایدی ؛ اونلرک
شیمیدی بتون مهارت و ملاحظتی نظر استغراقزله احاطه
ایده‌جک ، ذهنمزده کی اسکی برخیال ملیحی قارشیمزده
رقصان و ذی حیات کوره‌جکدک . بز بوتصوله عادتاً
قبل الطعام طویمشدد ...

پک عجله‌ایله بر آقشام طعامی ایتدیکمزی اونو تیه‌جغم ..
صوکره سوقاغه چیققدق : کیجه‌نک هوا ی سیاهی هرشیدی
بتون بتون مص ایتمشدی ؛ آنجق غازلرک صاری شعله‌سی
یریر برر نقطه منوره کبی مرئی اولیوردی . قافه‌شانتا -
نلرک قپولری آچیلمش ، موسیقه سسلری باشلامشدی .
برقاج دقیقه‌ده بیوک جاده‌لری مستعرضاً قطع ایتدک ؛
آرتق یولار قاراریور ؛ قانبورلاشیوردی ؛ آیاق سسلری
بتون بتون کسيلمشدی ... بوتنها ، مظلم طولانب-اج ،

عارضه‌لی ، طار سوقاقلرده دوشمه‌مک ایچون آرقداشمه
قول قوله طوتوشمشدق . مستکره بررایحه چرکاب
دیوارلردن صیزیور ، سرین بره‌وای متعفن نیلانقاوی
سوقاقلری طولاشیوردی ... گاه و بیگاه بر سس اودن
اوه ، دیواردن دیواره عکس ایدیور ، کویا هب
اوا یصنر سوقاقلری ، سراپا شهری طولاشیوردی : بوسس
برر بیوک بیاض صندیق ایچنده قاپو اوکلرنده یانان
بکجیلرک پارولاسی ایدی ؛ بوسسه او یومادقلرینی آکلاتمق
ایستیورلردی .

حسین بك دیدی که :

— بوسسلری بر اجنبی سیاح نه ظن ایتمش ، بیلیر -

میسک ؟.

— نه ظن ایتمش ؟...

دیدم . حسین بك آکلاتدی :

— مؤذن سسلری ظن ایتمش ... صوکرده

سیاحتنامه‌سنده دیمش که : مصر لیلر قدر تقوی پرور بر
خلق کورمدم ؛ کوندوزلری آقشامه قدر امناره‌لرده آوازه
تکیر ایله هوای نسیمی یی املا ایدن مؤذنلر کیجه‌لری
صباحه قدر قاپو اوکلرنده ، برر بیاض صندیق ایچنده
تهلیل و عبادتله مشغول اولیورلر ...

بن :

— اولوریا ، دیدم ، هر کسک خصوصی بر کوروشی ،
خصوصی بر آ کلاشی وار ...

بویول کیتدجه صرپلاشیور ، حالا بیتمیوردی . بر
آرهلق حسین بك سندهلدی :

— آزقالدی ، یووارلانیوردم ...

دیدی . بن جواب ویردم :

— ضرر یوق ، یولیوس قیصر کبی : « ایشته شیمدی

آفریقا آوو جمده ... » دیمه که بروسیله اولوردی ...

او ، استیضاح ایتدی . بن آ کلاتدم :

— یولیوس قیصر قطعه مصریه بی ضبط ایتدکن

صکره بر کره رومادن اسکندریه کیش ؛ اسکله دن

چیقارکن نصلسه آیاغی قایمش ، دوشمش ؛ دها کندیسی

یردن قالمه دن اطرافنده طوپلانا نلره دیمش که : « ایشته

شیمدی آفریقا آوو جمده ... »

بز آرتق سوقاقلرنده باصه جق بر تمیز نقطه اولمایان

سمت لوث آلوده وارمشدق . « جنین » یعنی رقصخانه لرك

بولندیغی محله بوراسی ایدی . بز تخمین خیالیمزده آلدای

ندیغمزی آ کلامشدق ؛ رقاصه لر بی شبهه بزم ظن ایتدی کمز

کبی برر پری شوق و اهتزاز دکلدی . مع مافیہ برسوزن
تجسس بزی ینه سوق ای دیوردی ...

بر صره کوچک جام فنار لر ایچنده یانان یاغ موملرینک
سیسلی ضیالرتدن یاپیلمش بر طاق حزین — رقصخانهک
مدخلنی کوستریوردی ؛ آغزندن پترول بخارینی آندیرر
بر اسپرتو قوقوسی نشر ایدن شیشمان بر حریف قاپونک
یاریسنی طولدیرمش ، خوموردانیوردی :

— اتنین غرش ، اتنین غرش ...

عربیده نه قدر قوتلی اولورسه کز اولیکز ، بوخومور-
دائمه نک معناسنی آ کلایه مز سکز . بز آ کلا دق ، چونکه
بیلیوردق : دخولیه ایکی غروش .. آرقداشمله برلکده
درد مصر غروشی ویردک ؛ ایچری کیردک .

آمان یاربی ، او نه مردار منظره ایدی : ییلاشمش
برایس ایچنده آغلایان اخشاب طاواندن اللی قدر زنجیر
صارقیور ، بونلرک اوچنده صاللانان پترول لامبه لری
حضارک باشنه صاری ، متعفن ، صفراوی بر ضیا
قوصیوردی . حضارده بوندن باشقه بر آیدینلغه لایق
دکلدی : اوراده خطوط مستقیمه اوزره دیزلمش بر چوق
تقیه لر آره لرنده — چشید اولق ایچون — بر قاج چبلاق
باش ، بر ایکی یاغلی شاپقه واردی ؛ حضار بونلردی .

قدح‌لر، فنجانلر، مارپوچلر، چوبوقلر خیشومی هجالرله
 ادا اولنان ملاطفات غلیظه. بی ادبانه قهقهه‌لر، نارکیله لرك
 سیکیره طوقونان غرغره‌سی، آره‌صره پاتلایان غازوزلرك
 پاتیردییسی، مشوش فیصلتیلر، مدهش برتنافر اصوات،
 بوغیجی بردومان، اسپرتو، توتون، دارچین، کیمیون،
 آنیسون، ترودها بیلیم نصل قوقولر بوتماشا خانہ‌یی
 طولدیریوردی. دماغلر بتون تهی، منتظردی؛ چونکه
 رقص و آهنگ باشلامق اوزره ایدی... برر، برر پارلاق
 قاش انتاریلی، اینجه آبانی صاریقلی، اسمر چالغیجیلر
 اوتیه، تا حضارک قارشیدینده یوکسک برمندر اوستنه
 دیزلایلر؛ کنج برعودی تللری ته‌یزه باشلای. اوزمان
 بتون حضار صوصدی، بتون آغیزلر آچیلدی؛ هرکس
 بر استماع مستغر قانه‌یه حاضرلندی: یالکز آره‌صره بر
 غازوز شیشه‌سی آچیلیور، برنارکیله غیرلیدیوردی...
 صوکره دف، طنبور، بتون چالغیلر عوده قاریشمغه،
 بتون چالغیجیلر بوغوق برسسله باغیرمغه باشلادیلر؛
 بو عربجه کفته، عربجه بسته ایدی. فقط غالباپک مؤثردی:
 چونکه آره‌صره بتون کوکسلردن درین، اوزون بر:
 «آح...» چیقیور، بو حرف ندایی ککیرنلر برر بطن
 طولوسی تأثر ایچنده کورونیورلردی... ده‌ها صوکره

برشی اولدی ؛ برباقیر شاقیرتسی قوپدی : بوسفر بتون
 تماشا خانه ایچنده بر : « هاه ...! » یووارلاتدی ، رقاصه
 اورتیه چیقمشدی ... مردار ، شیشمان ، چرکین ،
 حرکتی بطی ، اوضاعی صوؤق ، نازی جالب غشیان بر
 قاری ؛ اوف ؛ نه ملوث مخلوق ... بتون عضلاتی تقلصات
 جبرییه ایچنده ازییور ؛ بطننه کاه برزلزله جلدیه ، کام
 براعوجاج خلاف الطبیعه ، کاه بررعه غلیان ویریور ؛
 قیورانیور ، بورونتولو برخسته حالی آلیور ؛ بویالی
 کوزلرینی مبالغه لی برسوز کونلک ، ، ماوی دوداقلرینی
 - اوت ، دوداقلر ماوییه بویالی - ساخته برتبسم ایچنده
 بوکیور ؛ الده برچفت زیل ؛ آیاغی بررقص کریه ایله
 لرزان ...

تصور ایدکز : قوجه بطننک اسمر سختیانی هوایه
 آچیق براقش برقادین ؛ بتون کوکسی قرون وسطی
 سحاره لری کبی - صاری یالدرلی معادن سفلیه دن
 معمول - تمساح ، پاره ، قوش ، طاراق ، طیرناق ،
 بالق ، هلال ، بوینوز ، زنجیر ودها بیامم هانکی شیلرک
 یچمسز ، نسبتسز تقلیدلریله مستور ؛ بتون بوآره لرنده
 هیچ برتناسب وقرابت اولیان اشیا آهنکسز برشاقیردی
 ایله زیلک قعقه نخاسیه سنه یاردم ایدیور ...

لوحه یی تکمیل ایتک ایستر ایسه کز بومستکره
قادینی — تمارض ایتکه چالیشدیغی — بر صرعه اشها
توبته تسلیم ایدکز .

بو غشیان آور لوحه یی تماشا ایدنلر هیچ سزک
حسباتکزه اشتراک ایتیمورلردی ، اونلر بوندن ذوقیاب
اولیورلر . آره صره رقاصه یی درین ، اوزون بر : « آح ... » ایله
آلایشلا یورلر ، ایکلیورلردی ...
بن حسین بکه دیدم که :

— تحفشی ، هر مملکتک بر اصول تقدیری ،
بر طرز تحسینی وار ، بوراده ده ایکلیورلر ...
او ، کولدی :

— او یله یا .. ماوی دوداق نصل آلایشلانیر ؟
انین ایله ...

آرتق « آح ... » لر صیقلاشیور ، ذیل کورولتوسی
تحملسوز برنسبت آلیور ، رقاصه نک بطنی کیتدجه
آچیلیوردی .

آرقداشم قولاغمه اکیلدی :

— چیقلم ...

بن بو تکلیفه منتظردم ؛ چیققد . بو هوای لوٹ
وفضاحت بڑی اخلاق ایدیوردی .

سكزنجى مكتوب

قاهرەدن

نیم مضی ، بیوک بر آولو ایچنده چانطه لر، صندیقلر،
دنککلر پک غیر منتظم اهراملر تشکیل اییدیور؛ آغیر
یوکلر آلتنده حامللرک قیویرجق صاحیلری ترلیور، طار
نفسلری ایکیلیور، کوزلری خون تحمل ایچنده قیزار-
یوردی؛ ترجمانلر بر نزاکت مغفله ایله سیاح ماداملر
اوکنده باش کسیور، یالیزلی شابقه لرینی الارنده صالایه رق
دلاتلر وعد اییدیورلردی؛ قورو، اسمر مأمورلر
کرینه رک براوطه دن چیقیور، بر سیاحک استیضاحه
اسنیه رک قیصه، کسیک بر جواب ویریور، دفترله
باقمقدن یورولان کوزلرینی اوغوشدیره رق بر باشقه اوطه یه
کچوردی. کوکسلرنده ایکی قایش — یان چانطه سنک
قایشی ایله دورین چانطه سنک قایشی — چاپرازلاشان
یولجیلر برهراس تأخرله بر پنجره دن اوته کنه قوشیور،
برحماله: « دقت! .. »، اوته کنه: « یاواش ... »
دیوردی ... بو بیوک آولو بر غلیان حرکتله طولو
ایدی: بوراسی اسکندریه غاری ایدی ...

اوت ، ایکی کون کزد کدن ، برکون استراحت
 ایتد کدن صو کره کو کلمده کوچک بر تأسف افتراق اولدیغی
 حالده اسکندریه یی ترک ایدیوردم ...
 اوراده ، اونیم مزی آولو ایچنده کی خلجان ازدحام
 باش دوندیریوردی ؛ غارک کزینتی یرینه چیقدم .
 بوراده شاقاغنده قورشون قلمی صوقولو بر مأمور تلاش
 ایله آشاغی یوقاری کزینیور ؛ صو کره طورویور ؛ برالی
 بلنده ، ایکی پارماغی آغزنده ، یاناقلرینی شیشیریور ،
 بر ایصلق چالیوردی . کوچک بر لوقوموتیف مأمورک
 ایصلغنه ینه ایصلقله جواب ویریور ؛ بردومان قوقوسی ،
 بردومان طبقه سی ایچنده دمیر یوللری غیجرداته رق ،
 چاتیرداته رق طولاشیور ؛ تا اوزاقلره کوتوره جکی تره نی
 آرییوردی ... اوزمان ایصلق چالان مأمور یان کوزیله
 بتون تازه ماداملره باقیور ، یوزنده کی خنده غرور
 وممنونیتی بتون یولجیلره کوسترمک ایستیوردی ؛ زواللی
 صانیوردی که قوجه ماکنه نك جئه کراتنی تحریک ایدن
 شی کندی دوداقلری آره سندن چیقان صغیر خفیفدر .
 بن بومأمور سبکسره باقیور ، کندی کندیمه : « ایشته
 انسانک بتون ضعف وقوتی ... » دییوردم .
 اوکله دن اوچ ساعت اول یولجیلر چفته جاملی ،

مضبوط واغونلره کیردیلر . صوکره لوقوموتیف منتظم
 فاصله لی براوکسوروك خیرلتیسیله نفس آلهرق بتون
 تره نی سوروکلکه باشلادی ؛ واغونلرك ایچریسی —
 تکرلکلرك رأیلری ازمه سندن متحصل — بر طراقه
 معدنیه ایله طولدی . بتون یولجیلرك وجودی براهتاز
 خفیف ایچنده ایدی . غاردن چیققد . . . سریع المرور
 برشرید اوستنده کی پانوراما کی شهرک صوک ابنه سی
 برر برر یولجیلرك نظر وداعنی سلاملیوردی .

آرتق اسکندریه بی بتون بتون ترك ایتدک ؛ شیمدی تره ن
 مزروع برقطعه مستویه اورتیه سنده کیدیور : اکینلر شوراده
 یشیل ، اوتده بر زردی کمال ایچنده ، دها اوتده
 یچیلیور . خفیف بر روزکار بتون مزروعاتی یلپازه لیور ؛
 اکینلر برتموج زمزمه کار ایچنده روزکارله برلکده یورر
 کی کورونیور . هورکوجلی ، ایری ، قیر اوکوزلر
 اوزون بر بویوندوروق آلتنده تازه طوپراقلری اشیور ،
 کاه بیکاه معناسز قوجه بر نظرله تره نه ، یانندن کچن
 واغونلره باقیور ، اوتده بریده قورو چاموردن بر قبه
 ایکی بیوک تارلا آره سنده بر قوس یبوست کوستیریور ؛
 یوقبه لر بی شبهه اکینجیلرك مأوالری اوله حق ...

اکینلر آره سنده شیمدی چپلاق بر عرب چوجوغی ،

صوکره باشندہ بردوہ یوکی باشاق طاشیان برقادین ،
دھا صوکرہ یوزی بر برقع سیاہ ایلہ اورتولو بر بدوی
تازہ سی ، برسرعت خاطفہ ایلہ آتنی سورن بر سواری
ونہایت پک صبورانہ خطوہ لرلہ یکدیگری تعقیب ایدن
بردیزی دوه کوروپورز .

صوکرہ افقدہ کی برخط سنجابی بو مناظر طراوتہ
خاتمہ چکیور : چول باشلایور ؛ بتون دائرہ نظر پک
حزین ، پک چپلاق قالپور ...

سما صاف ؛ چول - کوز یتشدیکی قدرواسع برقوم
دریاسی حالندہ - دوام ایدوب کیدیور . نہ کوک یوزندہ
بربولوط ، نہ یردہ برنبات وار . نادراً وحدتکزین بر
خرما آغاجی بتون بو عریانی بی آفاق کدورت غیر
متناہیہ سنہ تاثیرسز بر نقطہ سبزین تسلیت وضع ایدیور .
هیچ برطرفدہ بر اثر یقظہ یوق ، کویا ہرشی بر خواب
عمیق ایچندہ ؛ صانکہ ہرطرف ، اعصار ابتدائیہ دنبری
طلوع وغروب ایدن برشمس آتشینک اشعہ محرقہ سی
آلتدہ یاٹمش ، صانکہ بتون بو اراضی مغموہ غیر محدود
بر صحرای رماد حالی آلمش ... آرہ صرہ سنجابی کلبہ لری
قومہ باٹمش ، فقر وحرارتدن خراب اولمش بر کوی
یورالک انسانیتلہ مناسبتنہ برنشانیہ پرفتور اولیور .

برقاج ساعتده آنجق بر کره بر علامت زندگی کورولیور:
 دوه لر! ... شدید بر باران ضیا آلتنده برینک باشی
 اوته کینک قویروغنی تعقیب ایدن بو درت آیاقلی چول
 دیوژنلری، اوزرنده کزن دکلری قومک چیتردیسندن
 باشقه برشی دیکله مزلر؛ یانلرندن کچن قوجه تره نک ولوله-
 سندن بیله بی خبر کورونورلر؛ اونلر چول اوستنده
 بر سر منزل مجهوله طوغرو یوررلر، دائماً یوررلر ...
 دوه لرک رنک رمادیسی زمینک ریک نامتاهیسيله حزین
 برامتراج لونی حاصل ایدیور.

بو عالم بی حیات اچنده سوروکلندیکی مدتجه ترنک
 بتون کورولتوسی حزین ویک آهنگ بر چیتردی یه منحصر
 قالمشدی. سما فوقزده صاف و براق، برضیای کبودایله
 مملو، پر نشئه حیات ایدی؛ نظر، بوزنده آسمانک زیرنده کی
 زمین مرده یه عودت ایتک ایسته میوردی. مع مافیه
 اوزمین اوزرنده کیدیوردق ... مقدمه تاریخک اعصار
 باعصار محکوک و محرر اولدینی بو صحیفه ارضیه اوزرنده
 - قله نو پاترالرک کلکون دوداقلری کنارنده کوچک
 برالتوای خشنودی حاصل ایده بیلیمک هوسیه یاپدیرلدینی
 کونده ییقدیریلان - ابنیه تاریخیه بی تخیل ایده رک کیدیور،
 بوصاریشین تموجات رملیه آره سنده تره نک سرعت
 آتشین ایله لاینقطع کیدیوردق ...

زمین ایله سما آره سنی رقیق ، پک رقیق ، عادتاً شفاف بر سحاب غبار املاییدیوردی . پنجره لری ، قپولری ، هر طرفی قاپالی اولان واغونلرک بتون مساماتندن اوسحاب غبار نفوذایده رک ایچریده کی اشیا اوزرنده قالین ، صاری بر طبقه تشکیل ایدیور ؛ تره نک ایچریسنده کی رنک ایله خارجک لون عمومیسى آره سنده پک آفرق قالیور ... یولجیلر بر سکوت و سکون ایله برر کوشه یه بوزولمش قوم کتله لرینی آ کدیریور ...

کیرپیکلرده تراکم ایدن قوم ذراتی حرارت موقعیه نک ویردیکی رخاوت عضلیه یه انضمام ایدنجه کوزلر عادتاً میخانیکی بر صورتده قاپانیور ؛ اوزمان چشم روح بر رؤیت خیالیه ایله مشغول قالیور : انسانه اوایله کلیور که شووا- غونلرک ایچنده بر کردباد زرین تشکیل ایدن ذرات رملیه دن هر بری بر بیوک عصرک ریزه یادکاریدر ؛ بورادن ، بوسخنه وسیعه دن کچن هر نفخه ریاح شوکینه ریکدانه لر اوزرنده بتون دارات فراغه نک غبار تار مارینی کورویور . صوکره فکره معالی قدسیه نک ابدی خاطره لری عودت اییدیور : جناب کلیمک کهواره مواجنه ناصیه سوده تمجید اولان سازلر ، حضرت کنعانه دارالامان اولان غارنهان ، مبارک پای نبوینک اثر مطبوعیه مبعجل اولان

سنگ مستثنی .. بتون قطعه مصریه نك بر پیرایه سرمدیسی
اولان بومقدس یادکارلر — فکرك بيلم نصل بر حرکت
رجیه سی ايله — صره سیله روحه کلیور ، روحی بر احترام
نوشین ايله مشحون ایدیور ...

هرشی کی چولک ، قومك تأثیری ده هر کسه کوره
باشقه اولیور : بریولجی لال ومتوکل دوشونور کن اوته کی
چولدن ، قومدن یکی بروسيله لعب وهوس چیقارمغه
چالیشیور ، پارماغيله اوستنه ، باشنه کندی آدینی یازیور ،
اوطوردینی یره : « بوراسی بنم یرمدر ... » مألنده
برشی نقش ایدیور ، کولیور ، کولدوریور ... هرشی
کی مصرک بیتمز توکنمز توزی ده برینه بر بهانه حزن
وفتور ، دیکرینه بر ذریعه نشاط وانبساط اولیور .

صوکره « محطه » لر یکدیگرینی تعقیب ایدیور .
بزم « شمندوفر موقفی » دیدیکمز یره عربلر « محطه »
دیورلرکه بوکله « یوک یوکلدیلر جک یر » دیمکمز .
محطه لر غره غره لی ، مساماتلی دستیلر ایچنده نیل صوی
صاتان چوجوقلر ، مانداریناجیلر ، پورتقالجیلر ، حامللر ،
رهبرلر ، ترجمانلرله مملو ... بونلر علی العاده هر استاسیونده
کورولن شیلردر ؛ فقط دنیا ده هیچ براستاسیونده
کورولمهش برشی وارکه قطعه مصریه مخصوص : بعض

محطه لرده برقاج عرب چو جوغي اللرنده تويدن يلبازمه لر
اولديغي حالده مروته باغلي بر بخشش مقابلي اوله رق
واغونلرده كي اشخاص واشيانك توزلريني سيلكيورلر ؛
شو توز ييغيني آلتدن بر چانطه ، اوته كينك آلتدن
بر چو جوق ، دها اوته كينك آلتدن بر يمك سپتي چيقيور .
الك مضحك نتيجه لر انسانلري سترواخفا ايدن توزيغينلري
آلتنده صاقللي : اويكرنك انسان يچملري ايكي يلبازه
ضربه سندن صوكره شوراده بم بياض بر آورو پاچه ره سنه ،
اوتوده سيم سياه بر آفريقالي يوزينه منقلب اوليوي ريبور .
برقاج موقف كچلمشدي ؛ بغته برسياح :

— ايشته سراب ... ديدى و پارماغيله صاغ طرفي
كوستردى ؛ بتون يولجیلر او طرفده كي پنجره لره قوشديلر .
امان ياربي ! اونه مغفل مناظر لطيفه ايدى ؛ كندى
كنديمه : « ايشته زمين مستويى ، كوللري ، اورمانلري ،
نزوا كاهلري ايله بتون بر مملكت .. ايشته شوراده ده
وقلي قله لريله بر جرمانيا شهري .. ايشته اوتوده صولري
آغاچلري ، كولكه لري ، نارين صندالري ، سيال
ايقلري ايله كو كصونك بر پارچه سي .. » ديوردم . اگرچه
تون بو اجسام مرئيه ده بر لون بخاريدن باشقه رنك
وقدى ، اگرچه حدود اشياك مبهمدى ، فقط خيالات

خیالات سرا بیه‌ده کی تقلید حقیقت میلی او قدر قوتلی ،
 اشیای مرئیه‌ده مشابہت شکلیه او قدر تام ، او قدر مغفل
 ایدی که قلباً : « عجبا ؟ . . . » دیمه مک ممکن دکلدی .
 اوزمان دوشوندم : هر کون بو مناظر مغفله قارشیسنده
 بررؤیای دائمی ایچنده یاشایان عرب شاعرلری شعشعه
 فکریه ایله ممتاز برر خیالپرور صافدل اولماق ممکنمی
 ایدی ؟ بر عالم خیالی یه بکزه‌ین بر محیط مستثنی ایچنده
 طولاشان او شاعرلرک سوزلری خیال ایله مملو ، روحلری
 خیال کبی سریع السیر اولماق نصل ممکن اوله بیلیردی ؟
 هر شیئی بر آینه شعر و سراب ایچنده تماشا ایدن آدم ،
 محاسن طبعیه اوزرنده تشریحات فنیه اجراسنه لزوم حس
 اتمیه جک قدر مفتون طبیعت اولورده بتون نفائس کائناتی
 عظمت مرئیه‌سیله تنفس ایده جک ، ملاحظت بالغه‌سیله
 حس ایلیه جک اولورسه او آدم شاعر اولیه بیلیرمی ؟
 چولک یبوست مغمو مانه‌سندن قور تولمشدق ؛ شیمدی
 ماره ئوتیس کولنک سازلری آرهنده کیدی وردق .
 اوزاقده کول قاباریور ، کوپوریوردی . طالع‌لر تره‌نک
 کنارینه قدر سرپلیوزدی . کندی کنیمه : « دوه
 قافله‌سندن سوکره ، ایشه بوراده‌ده قافله امواج ... »
 دیدم ؛ زیرا طالع‌لر یکدیگرینی تعقیب ایده‌رک ساحله

متوجه برسلسله متحرکه تشکیل ایتمکده ایدی اوزاقده ،
 طالغهلرک ولوله خروشانى ایچنده قالان بر قایا اوزرنده
 صولر چارپیشیور ، پارچه لانیور ، برقار دخمه سی طرزنده
 هوالرہ طاعیلیور . صوکرہ برشلاله حالنده تکرار
 دوکولیور ، صویک انحنات موجیه سی اوستنده اینجه ،
 بیاض برکوپو کدن عبارت قالیور ، نهایت بر طالغهنک
 دوش رقصاننده بزه طوغرو کلیوردی ...

بوواسع کولدن آیریلہ لی پک چوق اولمامشدی که
 شن ، شوخ کوزلری خطوط قهقهه ایچنده غائب اولمش
 بریولجی ، مبدأ حرکتمزدنبری بری کولدیرن بر آدم
 پارماغیله پنجره نک دیشاریسنده بر موقعی کوستره رک :

— افندیلر ؛ کوکر جین کویلرینی تماشا ایدیکنز ..

دیدى ؛ هرکس کولدى ، چونکه بو برلطیفه ظن
 اولتمشدى . حالبوکه بوپک جدی ایدی : فى الحقیقه
 سنه لردنبری اوراده بری بری اوزرینه یاپیلمش کوکر جین
 یووہلری او قدر چوق ، او قدر چوق ایدی که عادتاً بر
 کوی تشکیل ایدیوردی . بو یووہلردن مرکب ابنیه
 آری قووانلرنندن بیوک ، برعادی کلبه دن کوچک ایدی ..
 صوکره ینه آثار زراعت کورونمکه ، طوپراق ینه
 بر حیات شباب ایچنده کوزلشمکه باشلادی . پنجره لری

آچدق؛ بوراده کی توز تحمل اولنه بیلیر بر درجه ده ایدی .
 زمین یشیل رنکک غریب بر امتزاج در جاتیله عادتاً
 یشیل نقشلی ، یشیل زمینلی بر ایران قالیچه سی حالتی
 آلمشدی ؛ هوا تازه اکیئرلرک تازه رایحه سیله مشبوع ..
 افق لر کبود و خنده ناک ایدی . بوراده اکیئور لر ، شوراده
 ییئور لر ، و ته ده خرمن .. زیر ا بوارض مستشاده صیف
 و بهار شایان حیرت بر ازدواج ایله برلشیور ؛ شتا ، آلام
 برودت بوراچه کلیاً مجهول ..

کنیش بر صو اوزرندن کچدک : بوراسی نیل ایدی ،
 نیل مبارک ... بونک کنارنده کمال امنیتله چو جو قار
 قوشوشیور ، نهرک عظمت و قورانه سی اونلری قورقو تیمو -
 ردی . ایری ، حیران کوزلو ماندالر بر کنارده قارنلری
 اصلا تیور لر ، بر کنارده قادیئر دستیلرینی طولدیر ییور لر دی ..
 بر مدت بو بیوک نهرک صول ساحلنی تعقیب ایتدک :

منظره هپ لطیف و خندان ، هپ ذی حیات ایدی ..
 صو کرهینه چوله کیردک . فقط بودفعه چول بزى
 اتعاب ایتدی ، چونکه افقنده اهراملر بلیریوردی ؛
 کیم بیلیر ، بلکه ده ناپولیونک دیدیکی کبی او اهراملر
 فوقدن قرق عصر بزى تماشا ایدیور ، او توز طوپراق
 ایچنده کی قیافتمزله اکلنیوردی .



طقوزنجی مکتوب

قاهره دن

مقصود سز بر جولان عمومیدن آئینش مبهم بر تأثر
بو مکتوبی املا ایده جک ...

هانیا بر یکی کتابک یا پراقلرینی کسر کن هر صحیفه ده
کوزه چارپان بر ایکی کله یی او قویش واردر : ایشته
اونک کی بوکون قاهره یی مختلف استقامتده قطع ایده رک
بر نوع دیباجه جولان ترتیب ایتدم .

بتون بوجولان ائناسنده بکا رفاقت ایدن لا قیدی

روحمدی ؛ کوروپور ، اکلیور ، هرشیدن بی طرفانه بر

حصه خاطره آلوب کچوردم . بر سیاحتدن جدی بر فائده

ملحوظ اولمدیغی زمان لا قیدی روحدن ایی بر همراه

اوله ماز ؛ او یله سیاحتلره چیقانلر کوکسارینک بر طرفنه

دورین چانطه لرینی آصارکن قنلرندن بتون قیود

طرفکیرانه یی چیقاروب بر اقالی . صحراده ، دکزده ،

خیال واستغراقه مساعد یرلرده فکری قلندرانه بر

لا ابالیدکله بر مستی حسی ایچنده ترک ایتک لازم کلدیکی

کی بتون کورولمه مش ، یکی شیلرله مشحون بر شهرده ده

رفیق طریق بر زندیء فلسفیدن باشقه برشی اولماق
اقتضا ایدیور .

بوراده جابجا تصادف ایتدیککز خرابه لر اثبات
ایدیور که اسکی ، پک اسکی برشهرده بولنیورسکز .
برهوب آتشین ایله هرشیئی سوپورن چول قاصیرغهری
اسکی ابنیه نك بتون نقوش رقیقه سنی آلمش ، کوتورمش ،
ازمنه قدیمه نك یادکار معمارییی اوله رق برقاج بنادن ،
برقاج خرابه دن باشقه برشی قالماش . ابنیه جدیده تاریخی
کاشانه لرك انقاض پرغباری اوستنده تریور ؛ بویکی
بنالرده متانتدن زیاده زینت وار : طیشنده براز ایشلمه ،
برقاج اویمه ، بش اون نقش بولنسون ؛ صاحبك
هوسات وخیالاتی رصایع کونا کون صورتنده بنانك
روی خارجیسنه انطباع ایتسین ، منظره ظاهرده بر
ذوق وظرافت ، برنشئه رقت کولومسه سین .. ایشته
بو قدری ابنیه مصریه ایچون کافی کورولیور . انشاآت
غریبه ده کی قوت و رصاتی بوراده آراماییکز ؛
بوراده خانه لرك ریاح فردایه قارشی زور تحملی داخل
حساب اولیور . بو آثار معماریه دن خلقلک انهماکات
فکریه سنه استدلال ایتمک لازم کلیرسه دینیله بیلیر که بوراده
حیات و ممات هر کون تکرر ایدن برنوع نوم ویقظه کی

عتبار اولمش ؛ بتون شتون حیاتیه برر رؤیای مغفل
کی باقیلیور ؛ ایام زندگانی بر طاقم حوادث غیر مأموله
یله مملو اوله رق کلیر ، کچر ؛ صحنه موجودیتده براستغراب
ائمی یه منتظر اولمالیدر . بواقلم حارک عمر پرضیاسندن
چلرک اک شدید احتیاجی اللرنده برر دمت چیچک
ولندور مق ؛ فانتازیه ...

غالبا بوسوسدن یاپیلمش دیوارلر ایچنده بر نوع
سیره معیشتی هوسگذار جریان اولیور ؛ اوراده یاشایانلر
کندیلرینی — آقشامه طویلانمق اوزره صباحلین —
خوشجریان بر دره کنارنده قورولمش بر خیمه کلکون
یچنده صانیورلر . کتاب آتییه بر آینه اسکندر
طوتهرق متین ومستحکم بر سد چینی ایچنده یاشامق
ولاد مصریه نک کاری دکل ؛ اونلرک مزاجی بادهوسات
وکنده یورولونجهیه قدر قوشمق ، صوکره خفیف
ظریف بر خیمه موقته ایچنده کسلان حیاتی دیکلمک
یستیور ...

فقط نور وحرارتدن یاپیلمش بر جهان مستثنی
یچنده یاشایان بر قوم ایچون بومیل واستعداد پک طبعی
کلیدر ؛ غریب بر تصادف : بوشهرک وسیله بناسی بیله
رچادر اولمشدر . بو تصادفی ایضاح ایتملیم : عمرو

بن العاص نهر نیلک صاغ ساحلی اوزرنده جبل مقطمه
 مستند اولان بابل قلعه سنی ضبط ایتشدی ؛ ایرانیلرک
 بنا کرده سی اولان اونقظه مستحکمه بی قولایجه اله کچیردکن
 صوکره آرتق مظفریات جدیده یولی آچلمش دیمکدی .
 جناب سردار ایلری یه طوغرو حرکت امرینی ویردی ؛
 چادرلر قالدیرلمغه باشلادی ؛ نوبت خیمه سرداره کلنجه
 اوراده ، چادرک اوستنده یووه یاپمشدی . اوزمان سردار
 کندی چادرینک قالدیرلمسنه محالفت ایتدی ؛ دیدی که :
 — برمسلمان بر مخلوق ذی حیاتدن دریغ حمایت
 ایتسین ، کمال امنیتله سایه مهماننوازا سنه التجا ایدن
 بر مخلوق اله اعظمه رعایت ایتسین ، معاذالله !.. بوقوشلر
 بزم مسافر مزدر ، اونلره حرمت ایتلی یز . اسکندریه دن
 عودتمه قدر بوچادر بویله جه قالسین ...

چادر او یله جه قالدی ؛ وحتى بعض حوادث جوییه
 مقاومت ایده بیلیمک اوزره تقویه بیله ایدلدی .
 ایشته برچفت کوکرجینه آشیانه محبت اولان بوچادر
 مصر القاهره نک رکن لطیف اولینی اولدی : سردار
 عودتنده اورایه بیوک دائره لر ، بیوک بنالر ، بتون برشهر
 وضع ایتدی ... عمرو بن العاص مزاجاً مائل اعتدال ،
 فکرآ وسعت واحاطه یه مالک ایدی ؛ بتون زماننده کی

انشا آتده زینت و متانت متوازن قالدی . صوکره زینت
 آهسته آهسته حصه متاتی یونتمغه باشلادی . احمد بن طولونک
 اوغلی زماننده زینت حد اعظمه واصل اولدی : مورخین
 عربہ اینانمق لازم کلیرسه اوزمان برکاشانه بی مثال انشا
 اولمش که باغچه سننده کی آغاچلر آلتون یالیزلی بررغلاف
 معدنی ایچنده محفوظ ایمش ؛ صولر داللرک الکر قیق
 نقطه لرینه چیقار ، اورالرده کوپو کدن چیچکلر کی فوران
 ایدرمش ؛ مینای مزرکشدن یاپیلیمش دائرلر ایچنده بتون
 طیور لطیفه اوچار ، اوتر ، منقار بر منقار تلاقا کلیریمش .
 مرصع هیکلر ، قیمتدار قماشلر ایچنده محافظه قیام ایدر ،
 حیوانات وحشیہ دمیر پارمقلقلر ایچنده قانلی بر لوحه
 مجادله تشکیل ایلریمش ؛ یوکسک بر بالقون مناظر نیلی ،
 حدائق مصری ، صحرای قاهره یی ، اهراملری ، مناره -
 لری ، هر شیئی احاطه نظارتنه آلیریمش ، هله اللی انحنالی
 بر حوض وسیع واریمش که جیوه ایله مملو ، وکوموشدن
 باشقلی مرمر ستونلرله محاط ایمش ، بو حوض سیاب
 اوزرنده هوا ایله طولو ، بیوک برفراش نعیم کاه یوزر ،
 کاه ایپک خالاط - لرله کنار حوضه باغلی طور ویمش ؛
 مقمر و مکوکب کیجه لرده ، حوض زیبقی بر انجلای نظر
 ربا ایله بتون سمای مضیی آیینه آغوشنه آلدیغی زمان

صاحب کاشانه او فراش نعیمه اوزانیر ، ملایم برباد لیلی
ایچنده ، سمای حقیقی ایله سمای معکوس آرسینده ،
رؤیائی بر حیات بختیارانه نك نوازش فوق الوصالیله اكلنه رك
افول مهتابه قدر طولاشیرمش ..!

بو بهشت سفاهتدن بو کون بر ریزه خاطره بولمق ممکن
دکدر ؛ او عالم خارق العاده دن آنجق بر سمای حقیقی ایله
مقمر و مکوکب کیجه لر باقی قالمشدر ... کچلم .

قاهره بتون دنیاده کی اجناس عدیده یه قابولرینی
آچیق طوتدیغیچون یکی شیلر کورمک آرزوسنده اكل
مشکلپسند اولانلری نمون ایده بیلیر ؛ فقط آوروپالیلرله
مسکون اولان یکی محله لردن اسکی عرب محله لرینه کچملی ،
اسماعیلییه و اوزبکیه طرفلرینی آتلاملی ؛ زیرا بوصول ایکی
طرف بتون بتون آوروپادر . بورالره - علی الخصوص
اوزبکیه باغچه سینه آقشام اوستی دیکلنمک ایچون
عودت ایتملی ...

فراعنه مصریه دن بری موریس کولنک تامرکزنده
غرانیت طاشندن بیوک بر بنا انشا ایتدیرمش ؛ روایت
تاریخییه نظر آ بوبنانک او طه لری ، دهلیزلری او قدر
چوق ، او قدر طار ، طولاشیق ، قاریشیق ایمش که
ایچریسنده رهبرسنز طولاشمق ممکن دکش ! ایشته

قاہرہ نك عرب محلہ لری مطلقا اوبنائی مشہوری انشا
 ایدن معمارك تلامذہ احفادی طرفندن طرح وترتیب
 اولمشدر ؛ بتون اورانك سوقاق و محلہ ترتیب اتندہ مدہش
 بر عدم انتظام دستور ہندسی اتخاذ ایدلمش : یوللر
 لاینقطع صاغہ صولہ میل ایدیور ؛ چیقماز سوقاقلر ،
 کچیدلر ، طولامباجلر عادتاً بردمت صاچ کبی اوست اوستہ
 اورولیور ؛ بر سوقاچی چیقماز ظن ایدیورسکز ،
 حال بوکہ اوسوقاغك بیوک بر امتدادی وار ؛
 اوتہ کی سوقاچی بر جادہ صانیورسکز ، درت
 آدیم صوکرہ بر خانہ نك آلولسندہ طیقانوب قالدیغنی
 کوریورسکز . بعضاً ہیچ صاپہ جق بریر کورہ میہرک
 کری دونه جك اولیورسکز ، اوتردد اثناسندہ بر اوک
 کنارندہ اینجہ بر کچی یولی کوزکزہ ایلیشیور ، دوام
 ایدیورسکز ، بعضاً بتون براوک آلتندن کچیور ، یکی
 بریولہ چیقیورسکز کہ اسکی یولک مابعدندن باشقہ برشی
 دکل . کزیور ، کزیور ، دونیور ، طولاشیورسکز ؛
 علی الاکثرینہ کچدیگکز سوقاغہ عودت ایدیورسکز .
 یورودیگکز مدتجہ نرہدہ اولدیگیزی ، نہ طرفہ
 کیتدیگیزی بیلیمک ، آکلامق ، تعیین ایتک محال !..
 بتون بر اورکو تشکیل ایدن بوطارہ معوج ،

بوقارغه جق بورغه جق شکنده کی عجائب سوقاقلرده کاه
 درین آشتی عزتله برلکده حزین بر سکوت ، کاه پریشان
 برولوله قیامت محسوس اولیور . بویول چنکلیرینک
 بریسندن قورتوله رق اوته کنه طاقیلنجه بردنبره بتون
 شکل حیاته برتبدل اساسی کلیور: اوته کی سوقاقلده هیچ
 کیمسه یوقدی ؛ بوسوقاقلده عادتاً بین الملل بر پنایرک
 بتون طراقة موجودیتی قولاقلیر ایکتیور، اوته کی یول
 بر حریق هائی متعاقب ترک اولنمش بر عرصه تنها کی
 بی حیات ایدی ؛ شیمدی بویول بر قاچ طابورک موعد
 ملاقاتی کی اصوات زندکانی ایله مملو ! اوتوسی عادی
 بر چولدی ؛ بوراسی غلبه للق بر شهر . بوسوقاقلده تحته لر،
 طاشلر ، بتون مالزمه انشائییه - ییقلامش بر بنانک انقاضی
 کی - پریشان بر حالده طوپراقلره یاییلمشدی ، اوراده
 آیرلمش چاتیلر صاللانان تمللر اوزرنده بر لوحه انهدام
 عرض ایدیوردی ؛ بوانقاض آره سندن کاه و بیگاه سیاه
 پچه لی برقادین چیقیور ، کمال سکوت ایله بر قاچ آدیم
 کیدیور ، اوته ده یاریم بر دیواره آصیلی کهنه بر باغچه
 قاپوسندن بر قومشو اوینه کچیوردی ؛ بوسوقاقلده
 هیچ بر سس ، هیچ براهتزاز موجودیت یوقدی ،
 بوسکوت و سکون اوستنده خراب بر مناره نك قرمری

طاشلری بر اندیشه سقوط ایله رعشه دار هراس
کورونیوردی ؛ بتون بومحله نی را کد بر هوای شیخوخت
احاطه ایتشدی ... صوکره بردنبره یول کنیشلدی ؛
ایکی طرفی دکانلی برجاده یه چیقدم . بورایی یانغره لی بر
غلبه لق املا ایدیوردی ؛ قادین ، ارکک ، چوجوق ،
هرکس حایقیریوردی . قادینلر باشلرنده طاشیدقلری
سبزه لری صاتیورلر ، چوجوقلر اویناشیورلر ، بر قسم
خلق یالکز طولاشیوردی . دکانلرده یکدیکریله هیج
برنسبت وقرابتی اولمایان اشیا صاتیلغه چیقارلمش : خالی
دسته لری پکسماد ییغینلرینه تماس ایدیور ؛ فس ستونلری
قرمزی ، بیاض دستیلرک یاننده دیکیلی طاشلر کبی
طورویور ؛ موز دمترلری پابوج دیزیلریله قارشى قارشى یه
کولوشیور ؛ باقیرقازانلرله ایپک قماشلر یان یانه پارلدا یور ؛
پاموق دنکلری پرنج قزه ویلری آلتنده ازیلیور ؛ سیاه
زیتون فیچیلری اوستنده نارسپتلری قرمزی دیشلرینی
کوستیریور . بودکانده چوخه پارچه لری آره سنده دیز چو کش
برترزی لاینقطع دیکیور ؛ اوته کنده بر دمیرجی اورسندن
شراره لر صاحیور ؛ دها اوته کنده بر قالایجی پارلاتدیغی
برتجیره یی ضیای شمسه قارشى اویروب چویریور ؛
بریکی دکانده ایکی بدوی قوتلی بازولریله بیوک برقهوه

دکرمئی تحریک ایدیورلر ، دها بریده برقبطی یازیجیسی
 برعرب قاریس-نک مکتوبنی تیسیض ایدیور؛ شوراده
 برحلاق — اوراده بربرلره حلاق دیورلر. — سیاه
 پارلاق برکویلونک باشی ، صقالنی کوپورتمش ، شیمدی
 اوستره سنی قایشدن کچیریور ؛ براز ص-وکره کوویلونک
 باشی چیریل ، چپلاق — ایکی اوموز اوستنه قونمش —
 بر هندستان جویری کی قویو دارچینی برادای حزین
 ایله میدانه چیه جق .

لوحه بی اتمام ایتک اینترسه کز بتون شو پریشانلق
 اوستنه برقچ میلیرسینک ، برقچ یوز اشکجی علاوه
 ایدکز ، آمان اوسینکلر ، آمان اواشکجیلر !.. حالا
 تخطر ایتدکجه یاقا سیلکیورم : سینکلر اوراده عادتلا
 قاصیرغلر یاپیور . مزعج بر ویزلتی ایله هواده دونه رک
 اطرافده بولوطلر تشکیل ایدیوردی ؛ بن ، عاجز
 ومتحیر ، اللرمی قوللرمی صاوورده رق اونلری قوویور ،
 کندی کندیمه شکایتلر ایدیوردم ... بو ائشاده اشکجیلر
 هر طرفی احاطه ایتشدی ؛ بری ایتکی چکیور ، بری
 قولدن طوتیور ، بری اوکی کس دیریوردی ؛ بر
 آغزدن :

— هذا راحوان ... راحوان هذا !..

دیهه رك اشكرینی کوستریورلردی . بن لاینقطع :
« موش لازم ، موش لازم ...! »

دیهه حایقیریور ، قورتولمغه چالیشیوردم . قاهرهیه
کیده جك اولان مطلقاً بو « موش لازم ... » ی بلله ملی ؛
اورانك اشكجیلرینه قارشى — لزومی یوق ، تقدیرنده
اولان — او تعیردن باشقه سلاح مدافعه یوقدر ... بو
اشكلر اوستنده محافظه وقع ووقار ممکن دكل : بونلر
اوستنده ضعیف سواریلر دون کیشوته ، سمیزلر سانشو
پانصایه دونیور ؛ اوزته حالیلرده هیچ برشیئه بکزه -
مه مکدن زیاده بر موفقیت قازانه میور .

بتون ممالك حاره اهایسی کبی مصرلیلرده کونشك
شعاعات آتشنا کندن آزاده قالمغه چالیشیورلر : او کوچك
یوللرك اکثریسی یلکن بزلی ، تخته لر ، قفسلرله
اورتولو ایدی ؛ بونلر ضیای شمسی الهیور ، حضار
اوستنه ملایم برآیدینلق دوکیوردی . بوخفیف وموقت
طاوانلر اوستنده بعضاً غریب رسملر ، بعضاً پرده لر ،
تانتورلر وار ؛ بعضاًده بتون کونشك مرورینه مساعد
جسیم یرتیقلر ...

قاهره سوقاقلرنده اك صیق تصادف اولنان برشیده
قهوه خانه لردر ؛ بونلردن بعضیلری تصور اولنه میه جق

درجدهده بسیط . اوستی آچیق بر سواقده دیواره
 طایادلش ایکی تخته پیکه ، پیکه لر اوکنده برقاچ تخته
 ماصه ، ماصه لر اطرافنده بش اون حصیر اسکمله ،
 برطرفده سیاه برقهوه اوجاغی ؛ ایشته بتون قهوه خانه
 بوندن عبارت ... بوبسیط قهوه خانه لرک بسیط پیکه لری
 اوستنده باغداش قورمش برخلق — حالنده بیتمز ،
 توکنمز بریورغونلق ، کوزلرنده درین برمعنای لاقیدی ،
 وضعنده بتون انظار خارجیه قارشی بر عدم حرمت
 اولدینی حالد — قهوه ، سیغاره ، نارکیله ، غازوز
 ایچور ، بعضیلری برخولیای تنپورانه ایچنده بایلمش
 کی ، بعضیلری اسقانیل ، طاوله ، دومینو ، شطرنج
 ایله مشغول ...

اهالی مصریده انواع مساویدن اک زیاده قماره
 انهماک وار . حتی سنه قبطیه برقمار سایه سنده عددایامنی
 اوچ یوز آلتش بشه ابلاغ ایده بیلمش !.. اوت ،
 برروایت اساطیریه کوره سنه قبطیه ابتدای امرده اوچ
 یوز آلتش کوندن عبارت ایکن آلهات مصریه دن
 « طوط » ک قمرله اوینادینی بر داما اویوننی قازانمسی
 اوزرینه اوچ یوز آلتش بشه بالغ اولمشدر . مصرلیلر
 بوخرافه نی حکایه ایده رک : « بزه قمار پک اسکی زماندن

قالە بر میرا ئدر ... « دیرلر . بورادە بیوک کوچک ،
 زنکین ، فقیر ، همان هرکس سیئە قمارە مبتلا : دینجی
 چوجوقلری یا یا قالدیرملری اوستندە زار آتەرق
 سوقاقلردن طوپلادقلری سیغارە باشلرینی تضعیفە
 چالیشیورلر ؛ بعض سوقاقلردە آچیق ، علنی دائرەلر
 وارکە بورالردە بشون بر خلق رولت ماصە سنک اطرافندە
 طالع و تصادفدن ثروت بکلیور ...

قهوہ خانەلردە قمار اوینامیانلر اوکارندن کچن سیل
 اشکالی تماشا ایله امرار ساعات ایدیورلر : غریب بر
 ندای شکایتلە بر کچندن مصرانە پارە ایستەین قارە کوزلو،
 بیاض دیشلی ، قویرجق صاحلی پیس چوجوقلر ..
 چکەلری اوچ یشیل چیزکی ایله توشیم اولمش ، طرناقلری
 خندان قیزارمش ، کوزلری توتیادن قارارمش قادینلر ..
 برشکر قامیشنی کمیرن آچ کوزلو بردلیقانی .. آغیر بر
 باستونە طایانەرق آغیر خطوہ لرلە ، محزون و متوکل
 غلبەلغی یاران بر علیل .. عربە جیلر ، خار و بجیلر ، تسبیح جیلر ،
 قوندرە بویا بجیلر بر کردباد ذباب ایچندە یکدیگرینی قاقان ،
 باغیران ، قوشان ، کولن بتون ایشسزلراوقهوہ پیکەلرندە
 اوطورانلری اکئندیریور .

ایشتە آرتق آقشامدە اولیور : جامع قاپولرندە یانان

بيوك فنارلر طار سوقاقلره برضاي محزون دوكيور ،
 بعض قرانلق يوللرك كدورت نهاريه سي تضاعف ايدييور ،
 انقاص آره سنده قالان يقيق ديوارلر ، مائل انهدام
 ستونلر اوستنه لوحه غروبك رنك مغمومي انعكاس ايدنجه
 اطراف بر خرابه متروكه ده كي تاثير تنهائي بي حائر كورونيور ؛
 عادتا اورالري قرون اولي فاجعه لرندن برينه ميدان جريان
 اولور كي بر حال آليور . انسان صانيور كه نهرونك
 روماده اي قاع ايتديكي بيوك حريقك صوك لوحه اضمحلالني
 تماشا ايدييور ...

بو آقشام ساعتلرني اوزبكيه باغچه سنده امرارا ايتمليدز .
 قاهره ده آوروپاليلره مخصوص محلاتك مركزي
 اوزبكيه باغچه سيدر ؛ حتي ناپولئون قاهره يه كلديكي زمان
 زمان اوراده اقامت ايتمشدي . بو باغچه شيمدي يه قدر بله كه
 يكرمي كره شكلني دكيشدير مش ، وقتيله بر بيوك حوض
 ايكن نهايت بوكونكي حالي آلمشدر . هر طرفه اشجار
 محليه دن باشقه آفريقاي وسطادن كلن غريب آغاچلر
 خفيف ، كيزلي وعادتا صميمي بر قوقونشرايده رك قوملره
 سايه ساز اوليور ؛ آقشامك ضيائ ملايمي يپراقلر آره سنده
 نظر نواز بر طاقم انعكاسات ايله پارلدييور .. فقط ، بيلمم
 نيچون ، قاهره ليلر بو حديقه لطيفه يه پك آزر غبت ايدييورلر :

گاه آیدا اوپراسنک پست و حزین الحانی ، گاه مادام آلفونک
 مرقص نقراتی ایله باغچه یی طولدوران مصر عسکری
 باندوسی بیله جلب اهلایه کفایت ایده میور ، بتون
 اونغماتی قعر سماده اوچان طیور وحشیه ایله چوجوق
 نادیلرندن ، بوش اسکمله لردن باشقه دیکلین یوق .. گاه و بیکاه
 سیاه چارشافلی برقادین خیابانلری تعقیب ایده رک آغاجلر
 آره سنده غائب اولیور ؛ اوتده بریده برقاج اجنبی سیاحی
 طولاشیور ، نادر آستره لی ، پانطالونلو ، فرنک کوملکلی ،
 فقط قراواتسز برقاهره دلیقانلیسی : ایشته بو قدر ! ..
 وتنهالق بتون بتون کیجه اولوب ده موسیقی سکوت ایدنجیه
 در دوام ایدر ؛ مصریلر موسیقی غربی بی سوه میورلر .
 یجه اولوب ده باغچه نک هر طرفنده هوا غازلری یانجه
 لمهلق باشلا یور ؛ باغچه نک اوته سنده بریسنده برر باراقه
 مانده طوران عرب قافه شانتانلری طولیور ؛ بو قافه
 شانتانلرده اسکندریه ده کیلرک عینی . بوراده ده النی
 اقاغنه طایامش ، وار قوتیله حایقیران بر خواننده ،
 ردار بررقاصه ، سامعه خراش بر طاربوقا کورولتوسی
 ر ؛ بوراده کوره جکمز یکی ، خصوصی برشی یوق ..
 کیجه ساعتلرنده بو باغچه ده چرکین ، اما پک چرکین
 شی کورولیور : اجنبی ، یرلی ارککالر آره سنده بی پروا

پياسه ايدن چارشافلى قادينلر ... قاهره ليلر او قادينلر
قبطى قيزلرى اولدقلىنى اخبار ايدهر ك بو چركينلىكى
تخفيف ايتمك ايسئورلر ؛ اكر او خفيف الاخلاق قادينلر
فى الحقيقه قبطى قيزلرى ايسه زى نسوان اسلامده كز مه لرينه
نيچون مساعده اوليور ؟ او قادينلر كافى درجه ده ادب
وظرافتى حائز اولسه لردى او مساعده چوق كورلميه .
بيليردى ؛ فقط ، خاير ، اونلرده ايكرنج بر فضا حندن
باشقه برشى يوق . بعضيلرينك شابقه لى ار ككلردن سيغاره
ايسئدكلىنى كوردم ؛ بعضيلرى علناً بيرا ايچيورلر ؛
دها ، سويليه ميه حكيم ، بيك درلو حياسزلق ...

حيفا كه كوندوز موسيقتينك جلب ايدمه ديكي خلقى
كيجه بو — موجوديت عضليه لرينى صاتان — قادينلر
اورايه طويلايور . صرف حيوانى برتزلزل عصبيه قارشى
بو قدر ضعف وانجذاب ؟ ...

باغچه دن چيقدم . شيمدى بر بنائك قارشيسنده
بولنيوردم كه اوزرنده : « شه پردس اوتل » يازيلي ايدى .
اوتلك قپوسى او كنده قيصه چاكت ، كنش پانطالون ،
قيرمى فسلى ترجمانلر يكي كلنلره معلومات ويريوردى ؛
قوللرى ، باجاقلىر چپلاق ، آهو كوزلو حبش چو جوقلىرى
سياحلردن امر بكليور . قواصلر پارماقلىرى آره سنده

یالیزیلی باستونلرینی چویره رک وقت انتظار کچیوریور...
 صایجیلر کفیهلری ، توپلری ، خالیلری ، آرزوق
 ساخته آنتیقهلری اوتل مسافرلرینک پیش نظر رغبتنه
 دوکیوردی .

کونش غروب ایدلی بر ساعتدن زیاده اولدینی حالده
 سوقاقلر ... پارسک مشهور ریوولی سوقاغنی آندیران
 آرقادلی سوقاقلر حالا حنجا حنج طولو ایدی . ناکهان
 بوغلبه لنی ایکی کشی یاردی : بونلرک اللرنده کوموش
 تپلی برر اوزون باستون واردی ؛ قوتلی طولومباچیلر
 کبی قوشیورلردی ؛ رجلاک ! ظهرك ! یمینک ! شمالک ...
 باغیریورلردی . بونلره بوراده « سائس » دییورلرکه
 بیوک حرم عربهلری اوکنده قوشه رق یول آچیورلر ؛
 سائسلرک اکثری حبش ؛ قیافتلری آکر براز اوپرا-
 قومیق قیافته بکزه مسه حقیقه پک کوزل : صیرمه
 ایشلمه لی قطیفه بریلک ، برینه زار کوملک ، بیاض بر
 شالوار ، برقرمزى فس ، بله قدر اینن ایپک بر ماوی
 یوسکول ... باجاقلر چپلاق ، سیم سیاه ، برجلائی آهینن
 ایله پارلایور ، کوزلر بادم شککنده ، نفوذ وشدله مملو ،
 بوی اوزون ، اندام پک لطیف ، قوشوشده بر وزن
 وانتظام وار ... بونلر یورولمق بیلنزمش ؛ ایچلرنده

آتمش کیلو مترولق برمسافه‌یی بربارداق صو ایچر کبی
کمال سهولتله قطع ایدنلر وارمش ؛ فقط بو مدهش
قوشوجیلر بر معتاد اوتوز یاشنده صحتلرینی غائب ایدر ،
قرق یاشلرینه طوغرو برمرض صدریدن هلاک اولور -
لر مش . قوش ، قوش ، زواللی سائس ؛ ینه قوش ،
حالا قوش ! شو عمر محدودی بر سرچه کبی اوچهرق
کچیر ؛ برکون یورغونلقدن — آرتق بردها قالماق
اوزره — دوشونجه‌یه قدر قوش ...

مکلف یرعربه ایچنده برغرور ظریفانه‌ایله اوزانمش
بر خانم سائسلی تعقیب ایتدی ؛ بر آن سعادت کبی
کچدی ؛ غلبه‌لق ینه تموج معتادینی آلدی ..

شیمدی غلبه‌لق ایچنده بر قاق کنج قیز نظر دقتی
جلب ایدیوردی ؛ بونلرک باشلرنده بررسیت واردی ؛
سپتیرک ایچی بار کیرلرک سوقاقلره یادکار براققلری
ماده‌لرله طولو ایدی . مصرده یاقه‌جق اودون پک آز ،
پک بهالی اولدینی ایچون چوجو قلر بار کیرلرک قویرو قلرندن
آیریه‌میورلر ، هپسی اوفرسته منتظر ! .. بیلیم ، قاهره
یلدیه‌سی بوچوجو قلره معاش فلان ویریورمی ؛ چونکه
طوغروسی شهرک تنظیفاتی خصوصنده بونلرک خدمتی
هر کسیدن زیاده ! ..

صوکره ینه تنها سوقاقلره طالهرق غودت ایتدم :
هر خطوده یایاقلدیرملرینه اوزانمش دینلجیلره تصادف
ایدیورددم ، بو حقیرکتله لرك سوپرون تو ییغینلرندن فرقی
پك آزدی .



اونجی مکتوب

قاهره دن

محمد علی پاشا جامعی اتکندن صباح قاهره یی تماشا
هرسیاح شاعرك پرشوق وشتاب ایستیه جکی برذریعه
استغراقدر : کونش هیچ بر مقدمه لونیله چهره آسمانده
بر نشانه طلوع کوستر مکسزین « جبل مقطم » آرقه سنده کی
کنار افقیدن اشراق ایده رک بتون هوای نسیمی یی زرین
بر حریق نامتناهی ایلله فروزان ایدیور . شهر اوزرنده نازک
بر خموری خواب کی لرزان اولان شفاف بر بوغونا کهان
اریور ، سمانک کلکونی قبل الطلوعیله صوکره کی رنگ
صفوتی آره سنده آنجق بر قاچ کوچک دقیقه کجه بیلیور .
بواثناده شهر ایچنده کی یقظه حیاتک ولوله اولینی
اطرافک بتون زمزمه زندکانیسنه قاریشه رق تا اوزاقلرده
بولوطلره ، مسافه لره صارلمش برکوک کورولتوسی کی ،
بر تموج دورادور ایلله غلطان اولیور . اوزمان بیوک
اهراملر ، قطعه مصریه نک بررنکه بان ابدیسی کی غرور
ایلله سمایه طوغرو قیام ایدن بیوک اهراملر .. اوتده
منفیس خرابه لرینی ستر ایدن خرما آغاقلقلری .. صاعده کی
هلیوپولیس صحراسی که بتون شعبات معرفت وصنعتک

مایهٔ اصلیمی بورادن چیقمشدی .. « جیزه » نك برخنده
 طراوتله مملو چمنزارلری .. بتون مصر قدیم خرابه‌لری ،
 ییقلمش قبه‌لر ، متروک دکرمنلر ، سالدیده بایقوشلر ..
 دها بریده بر محشر بیوت حالنده پیش نظرده قرنجهلانان
 قاهره شهری .. باغچه‌لر ، میدانلر ، هریر ، هرشی ابر فیضان
 انوار ایچنده قالیور . ضیای طلوع اوتوده ، نیل اوستنده
 بر آسودکی بختیارانه ایله قایوب کیدن ظریف « ذهابیه » لرك
 بیاض یلکنلری اوزرنده بر طفل هوسکذارکی بیکلرجه
 ملاعب رنگا رنگ ایله اویالانیور . چول خفیف ماوی
 کولکلی بر کلکونی خفیف ایچنده امتداد نظر قدر
 اوزایوب کیدیور . چبلاق یرلر لون وضیا ایله مستور ،
 اک بی حیات قطعه‌لر براهتاز روح ایله مسحون کورو-
 نیور . شهر ایچنده سنک وضیا ، ضلال وجلا ، تراب
 وذهب غریب بر شعشعه ضدیتله منظور اولیور ؛ بر منقاش
 هوسکذارک اویدینی بر قبه نقوش اوزرندن بر حلزون
 صنعت و ظرافت کی بر نارین مناره فوران ایدیور .
 اوتوده ، واسع قبرستانلرده ، او طریق سیاه ممات اوزرنده ،
 تازه مزارلر آره‌سنده سراپا سیپوش قادینلر بر سایه ماتم
 کی طولانیورلر ..

بتون منظره بر شعر عرب ، بر خیال سراب کی ،

بردیوانخانه نور وبری کبی لطیف و غریب ... کاشانه لر ،
 خرابه لر ، عصر کلیمدن قالمه شیر ، غبار اعصار ایله اورتولو
 یرلر ، هر لوحه انهدام ، بتون نقوش وانقاض ، سحاب
 ابعاد ایچنده نیم منظور افق لر ، نیل مبارک ، هرشی ،
 هریر بر حرارت معتدله ایله بر ضیای شدید آلتنده رعشه دار
 ذوق حیات ...

« بولاق » موزه خانه سنه کیرمک اوزره بو پر یخانه
 پرضیادن چیق دم : قطعه مصریه ده مدفون اولان اسکی
 ثروتلرک قسم اعظمی برر طریق ایله اوروپایه انتقال ایتمش
 اولدیغندن بولاق موزه خانه سنده بوکون جسیم بر نادره
 اعصار قدیمیه تصادف ایدیله مز . مع مافیه نیل کنارنده کی
 اوبنای لطیفی طولدران شیر آره سنده او یله نفائس متخبه
 واردرکه انسان اونلرک قارشیسنده بتون فکر جسماتی
 اونوتور . اونفائس آره سنده اکثریتی ، اعصار قدیمه
 قرالترینک بر حیات ایکن یاپدیروبده عالم مدفونیتده بر
 بقای مادی آرامق احتراض مشرکانه سیله بی حدود چولک
 دور ونهان برکوشه سنه کومدوردکلری هیا کل شخصیه
 تشکیل ایدر . طاشدن ، معدندن ، هرشیدن هیکلر وار
 هله تختهدن مصنوع بر هیکل ظریف وارکه شخصیتی
 تعین اولنه مامش و آنجق غریب بر تصادف اثری اوله رق

برقریه شیخنه بکزه دیکندن نامنه «شیخ البلد» دینلمش...
 علم آثار عتیقه دن کلیاً بی بهره اولدیغ اچون بو
 زنکین موزه خانه نك محتویات ثمنیه سی حقنده ویره بیله حکم
 معلومات برامیتلی رهبرك اخطارات سریره سندن فکرمدہ
 قالان پریشان شیلره منحصر قاله جقدر: اوراده قرالیچه
 «آ آح - حوتپ» ك اوتوز قرق عصر اول یاشایان
 بو قادینك یوزوکلری، کوستکلری، بیله زیکلری،
 کوپهلری، کردنقلری وارمش، هپسی ده اینجیدن، مینه دن،
 آلتوندن یاپلمش، ناقابل تقلید بررقت و ظرافتله ایشلنمش،
 حقیقه پك کوزل شیلر. او قادین بونلرله میلاد کلیمدن
 اول سوسلنیرمش... بونلردن باشقه ادوار ظنون
 وابطیلدن قاله هیا کل اصنام پك مهم بر موقع اشغال
 ایدیوردی؛ بونلر آره سنده غرانیتمدن. طونجیدن یاپلمش
 بیوک هیکلر، رقیق مینه دن دوکلش فیروزه کی ماوی،
 زمرد کی یشیل کوچك، صنمیر واردی... بریرده
 طراقلری، ایکنهلری، خاتملری ایله اسکی نسوان مصریه؛
 بریرده زارلری، شطرنجلری ایله ازمنه قدیمه قماربازلری؛
 بریرده بتون آلات وادواتی ایله ادوار سابقه عمله سی
 کورولیوردی... اوتهدده بریده اعظم قرون اولی
 هیکلری که بعضیلری قعودده، بعضیلری قیامده، بعضیلرینك

النده یازیلرله طولو برپایروس ، بعضیلری حضور ابدیته
 چیقورمش کبی اللرینی حرمتله کوکسنه قاووشدرمش ،
 بعضیلری برخطوة سنکین ایله یکیدن عالم حیاته کیرمک
 ایستورمش کبی صول آیاغنی ایلری آتمش ... بویالی
 طاشدن جسامت طبعیهده ایکی هیکل وارکه کرک
 اسکیلک و کرک کوزللك اعتباریله بالخصوص شایان نظر:
 بری پرنسس « نهفرت » ه ، دیکری زوجی یاخود
 برادری پرنس « راحوتپ » ه عائد بوایکی نفیسه صنعت
 بیوک اهراملردن برسنه اول یاپیلدقلری حالد اخیراً کشف
 و اخراج اولمش وغیری شوکه هیچ برطرفلرنده بر اثر
 خرابی کورولمه مشدر ؛ بونلردون یاپلمش کبی تام و تازه ایدیلر ؛
 برر چفت کره بلوریدن یاپیلمش کوزلرنده شعاعات ضیا
 مددهش برر نظر حقیقت کبی انجلا ایدیور ، مغفل بر
 منظره حیات ویریوردی ... دهها صوکره فراغنهك ،
 عیال فراغنهك تابوتلری ایله مومیالری : نامتناهی
 بوکلوملر ایچنده هویتلری خیال میال کورولن بو آثار
 عتیقهك برقاق یوز عصره مقاومت ایتسی نه قدر شایان
 تعجب ایسه منظره لری ده اوقدر چرکین ؛ بتون بونلر
 تخنیط ایدلمش ، یالکنز نعلیلری ، جسدلری دکل ،
 البسه لری ، قوندوره لری ، ییه جکلری ، طاقمه صاحلری ،

اتلر ، سبزهلر ، یمشلر ، هرشی برلکده تخنیط ایدلش .
 بونلر آره سنده اک مهمی ایکنجی رامسسک مومیاسی
 ایمش ...

برندن دیکرینه کچیلن اوکنیش صالونلرده بر قاج
 زائرک آیاق سسندن ، بر ایکی رهبرک میرلتیسندن باشقه
 براهتراز یوقدی ؛ ولوله حیاتلریله دیباجه تاریخی املا
 ایدن بوصباح انساویت قهرمانلرینک رکود ساکتانه سنده
 بر معنای وعظ وتهدید مندج کی ایدی . بونلرک قارشیسنده
 روح بر منکنه ایله ازیلیور کی اولیور ؛ وجود بتون
 پرودت فانی حس ایدیور ؛ وجود ایچنده کی قوه
 حیاتیه بر لرزه هراس ایله اوینخته هیجان قالیور . بواسکی
 منظرهلرک منافع تاریخیه سی اولدیغی بیلیردم ؛ فقط
 تأثیرات اخلاقیه سنی حس ایتدم . دوشونه جک قدر
 ذی حیات اولان بر دماغ ایچون بر موزه خانه ده بتون
 بر درس عبرت وار ...



« شوبرا » حدیقه سنده بر تنزهله بوکونکی جولانه
 نهایت ویره جکم : بو باغچه بر مسیره درکه جمعه وپازار
 کونلری قادین ، ارکک بتون قاهره کبارلری علی الاکثر
 اوراده تفرج ایدرلر . شوبرایه کیدن یول کوزل ،

اوقدر کوزلدرکه ارض اوزرنده بی مثالدر ، دینلسه
 روادری : نیل ساحلنده یوکسک بر شوسه تشکیل ایدن
 اویولک ایکی طرفی جسیم ، سایه دار آغاچلر ، عربلرک
 «جمیز» دیدکلری بر نوع یابانی اینجیر آغاچلریله محاطدر ؛ بو
 بیوک ، برکوزل آغاچلر ایکی طرفدن قاووشه رق شوسه
 اوستنده برقبه زمردین تشکیل ایدیور ، آغاچلرک
 کوتوکلری صاغه صوله برهوس غرا بجویانه ایله بوکولمش
 برستون متین حالنده ؛ یول بو آغاچلرک آلتنده برکهواره
 ظلال کبی دلا رام ، یاپراقلر آره سندن نفوذایدن شعاعات
 نادره ضیا پیش نظرده برر خط غبار زرین کبی لرزان ..
 بوکون جمعه . شو بر ایولی عربهلر ، لاندولر ، فایطونلر ،
 جنس آتلی ، طیریس کیدن مرکبلرله مملو ؛ متنزهلر آره سنه
 نادراً بردوه قطاری قاریشیور . شوسه نك جواری هان
 باشند باشه شکر قامشقلری ، دهها اوتته ده قاهره نك قرای
 مجاوره سندن بعضیلری ، نهایت صاری ، صولغون برخط
 صورتنده کورونن افق صحراوی ... آره ده صره ده ،
 فقط نادراً کبار کوشکلرینه تصادف اولنیور ؛ بونلر میاننده
 مزین برقصر خدیوی بیله وار .

عربهلر برراوق کبی سرعتله کیدیور . اطراف
 جاملی ، کنیش لاندولرده مخدرات اسلامیه ، بریقلمده ،

فایطونلرده خفیف تووالتلی ماداملر ، آتلرده علی الا کثر ضابطلر ، مرکبلرده علی الا کثر انکلینر سیاحلری .. آرده برقاچده وهلوسیدلی دلیقانی . بتون بوخلق برشتاب مخصوص ایله آقور ، رقیق برتوز طبقه سی هرشیئی احاطه ایدیور . بوروحنواز یولک حرارت ملایمه سنی آهسته آهسته تنفس ایدهرک کیتمک ، بتون بدایع جواردن برره یجان لذیذ طوپلامق وارکن برکسوف آنی تماشاسنه آتیلیر کبی یکدیگرینی ازهرک قوشمقده کی معنای آکلایه مدم .

یول جوارنده کی کوشک باغچه لری هندوچینک اشجار نادره سی ، برهمنلرک سیوری یاپراقلی مقدس آغاچلری ، صاری چیچکللی آقاسیالر ، برر بار زرین آلتنده اکیلیمش پورتقال ، لیمون ، ماندارین داللری ، آچمش کلبنلر ، لعل یاپراقلی نظر فریب نباتلر - که غالباً « پووانزتیا » دیرلر - ایله مستور ...

بوسایبان طبعی ایچنده بتون اونوادر نباتیه پانورا - ماسنی تماشا ، اونلرک خفیف قوقولرینی تنفس ایدهرک - صانکه معطر برروئیای ربیعی ایچنده - شو برایه کلدیم . متوفی خدیو محمد علی پاشانک یادکاری اولان بوباغچه ده دفعه جلب نظر ایدن شی ، حزین برحال متروکیت در : اورته ده کی

بیوک ، مرمر حوض ، - سنکین تمساخلرک آچیق آغز -
لرندن طاشان صولرله دائماً طولو حوض - ، بونک
اطرافنده کی شیر ، هر طرف آهسته آهسته خراب اولوب
کیدییور ؛ مدھش بر ثروت وکلفت سایه سنده یاپیلان
اوکوزل شیرلی یاواش یاواش غبار زمان اورتیور ؛ هر
یر اوسته دلخراش برسیاهلق چوکمش .. یالکز چیچکلر ،
آغاچلر - او اوروپاده لیونقلر ایچنده بر رویقونت کی ناز
حرارت ونعیم ضیا آره سنده یتشدیریلن اقالیم حاره ازهار
واشجاری - دائماً کوزل ، یالکز صوداا تازہ !

بومنظره انهدام ایچنده طولاشان خیابانلری قادینلر ،
چو جو قلر ، ارککلر طولدوریور ؛ لاینقطع کلنلر ، کیدنلر
وار . بنده بو صوک قافله یه قاریشدم ؛ چونکه آرتق
آقشام اولمشدی .

عودتده یولی دها غلبهلق بولدم ؛ کلنلر عودت
ایدنلردن زیاده ایدی . مسیره لره کیچ وقتلرده کملکده
بوراحه بر عادت اولمالی .

کونش افقده ، بیوک بر هاله لعل وزرین ایچنده
غروب یاقلاشمشدی ؛ بتون چول طاتلی بر صاریلق
ایچنده قالمشدی . افقی ضیالر همیز آغاچلرینک کوزل
یاپراقلری آره سنده آلتون ورقلر کی کورونیوردی .

افقده کی احتراق مضيئه قارشى اهراملك جثه احتشامى
 صوؤق برماويلكده غائب اولمش كې قالیوردى .
 حرارت ياواش ياواش دوشيور؛ هوا عادتاسرينلدى ؛
 صانكه برقاج ساعتده بر موسم دكيشدير دك ...



اون برنجی مکتوب

قاهره دن .

صباحلین ، کونش هنوز طوغارکن ، افق دها
مائیلکنی غائب ایتمه دن ، چولک خطوط حدودی لمعات
شدیده نهاریه ایچنده بوغولمه دن ، یشیلککلر شبنم سپیده
دمله یر یر پیرایه دار طراوت ایکن اهراملره قدررسیده
اوله حق برتنزه مقصدیله « خیزه » یولنی طوتمقده برذوق
روحانی وار .

بوتنزه ایچون وسائط نقلیه نك اك مناسبی بر بیاض
مرکبدر : بونده بتون سیاح میسلرله جنتلمنلرک رأی
متفق . بوراده کی مرکبلر بزم دیارک مرکبلرینه بکزه مز ،
بونلر عادتاً یاریش مرکبی . باشلرینی کمال غرور ایله
هوالاندیرلر ، کمال ظرافتله اشینیرلر ، عرب آتلی
سرعتنده هجوم درت نعللری یاپارلر ؛ حلیم ومطیع ،
ذکی وچالاکدرلر . بر ساعتده اون ایکی کیلومترولق
یر مسافه یی بالسهوله قطع ایدرلر . بونلر قاهره ده شایان
دقت برغضر عضوی تشکیل ایدیورلر ؛ بونلر سز
قاهره قاپلیجه سز بروسه یه دونه جک ...

مرکبکړک یا لکز بر محذوری وار ؟ صاحب‌لری !..
 ظن ایتمه ییکز که یننه جککز مرکب اوزرنده برحق
 آمریتی حائز اوله جقسکز: بو حق آنجق مرکبک صاحبنه
 ویرلمشدر که طولایسیله سزک اوزر کزده ده برحق آمریت
 آلیر ... بر مرکب صاحبی هیچ بر زمان مشتری سندن
 استمزاجه لزوم حس ایتمز: لایق قطع کن‌دیسی، قوشار،
 مرکب‌نی قوشدورر. آرده صرده شاقلا تدیغی تازیانه
 تشویق‌دن بالتأثر زواللی مرکب‌اویله غیر منتظم صجرایشلر
 اجرا ایدر که اوزرنده کی سوار ی دائماً متبصر و متیقظ
 بولمغه، دائماً صرف مهارته مجبور اولور، والا اون آدمده
 بر کره قوملره یو وار لانیر... مرکب صاحبی، اکر وور مازسه،
 هرایکی دقیقه ده بر کره صدر شکایتدن خشین و عمیق بر:
 «آخ...» و اوایل سی چیقاریر؛ بوندای خیشومیده
 بتون بر تهدید، بتون بر مقدمه ضرب و جرح واردر.
 بونی ایشیدن مرکب پک شدتلی بر قامچی یمش کی بتون
 قوتیله درت نعله قالقیور. بوسرعتی تعدیل ایچون
 سوارینک:

— شوی، شوی [شوایه، شوایه] ...

دیهه حایقیرمی لازم کلیور. غریبی شوکه الا کثر
 سواری: «شوی، شوی» دیهه باغیرر کن مرکب

صاحبی ده : « آخ ، آخ ... » یایغره سنده دوام ایدیور .
 اوزمان بویکی متباین قوماندا آره سنده قالان زواللی
 حیوان نه یه اوغرا دیغنی ، نه یایه جغنی شاشیره رق کمنی
 آزی یه آلمش بریاریش قیصراغی کبی کن دیسنی قاپوب
 قویویریور . راست کلدیکی شیئه چارپیور ، یاره لیور ،
 یاره لانیور ، نهایت نفسی کیسلنجیه قدر مضمحل
 و پر خون قالیور . مع مافیه حیوانک هیج قباحتی بوق ،
 بتون او حرکات بی شعورانه نك مسئول و مسببی مرکب
 صاحبی ...

برای تنزه کرا لایه جغکز مرکبک صاحبی آرقه کز
 صره کلمه مسنی شروط استیجاره داخل ایتلی : بوشروط
 تحتنده مصر مرکبی جداً پک الویریشلی برواسطه نقلیه ..
 قاهره دن اهراملره کیدن یول حقیقه پک کوزل :
 بتون یولک امتدادنجه شفاف برسا آلتنده ، صاف برهوا
 ایچنده ، رکود آسایشله مملو بردائرة ارضیه اوزرنده ،
 لطیف آقاسیا آغاجلری آره سنده بولنیورسکز .
 قصرانیل دیدکلری جسم کوپری واسطه سیله نه ری
 کچدکدن صوکره برمدت صول ساحلی تعقیب ایده رک
 خرما اورمانلرینک سرین هواسنی تنفس ، قاهره نك صباح
 سیسی ایچنده پارالایان مناره لرینی تماشا ایدیورسکز ،

صره سیله جیزه حدیقه دلاراسنی ، موزه خانه بی کچورسکزه .
 صوکره یول بردنبره دونیور ، برخط مستقیم اوزره .
 اهراملرک جسیم جته لرینه توجه ایدیور . یولک بوصوک
 پارچه سی کنیش ، آغاچلرله محاط ، مکمل برشوسه . روایتیه
 نظراً بو اوزون - برقاج کیلومتر و طولنده - شوسه بی متوفی
 خدیو اسماعیل پاشا بیکلرجه عمله جمع ایدهرک برقاج کون
 ایچنده یابدیریورمش ؛ سبی ده سویش قنالنک رسم
 کسادی مناسبتیه اجرا اولنه جق شنلک کرده حاضر بولمق
 اوزره مصره کلن ایمراطوریجه اوژهنی حضر تلرینک
 اهراملری کورمک آرزوسنه دوشمسی اولمش ...

بوسایه دار شوسه پاموق ومصر تارلاری آره سنده .
 تا اوزاقده کی اهراملره طوغرو کیدیور . او تارلاری
 صولامق ایچون نیلدن آریلان بر قنال یولک یانی صره .
 کلیور ؛ قنالك بولانق صولرنده خرما آغاچلرینک مبهم
 کولکه لری اهتزاز ایدیور . نهرک فیضان دمبدمندن
 قور تولق ایچون اوزاقده تپه لره قورولمش سنجابی قریه لر
 باصیق کلبه لرله قات قات منظور اولیور . تارلارده یاری
 چیلانق چیفتجیلرک عضلی قوللری صاپانلری اداره
 ایدیور . براوزون دکنکه طایانه رق بر خوشی متوکلا نه
 ایله یورون عربک اوکنده یوکلور بدوه آهسته وموزون .

خطوه لرله شهره طوغرو کلیور . اوزاقده آفتاب
 نوطلوعك تازه یالديزلریله پارلایان چول بر جاذبه غالبه
 ايله نظر تماشایی جلب ایدرک اقلیم خضارتك حد
 منتهاسنی ، دریای ریکك کنار آتشناکنی کوسترییور .
 آقاسیا آغاچلرینك اینجه داللری آرمسند نامتناهی
 بر قوم چارچوه سی ایچنده برر هیولای سنجابی کبی گاه
 و بیگاه نهان و عیان اولان اوچ اهرام ، یول قطع اولندجه ،
 پیش نظرده کسب جسامت ایدیور . ایشته آرتق
 کورونیور که اهراملرک سطحلری تخمین و تصور ایتدی کمز
 کبی مستوی دکل ؛ بالعکس پک کبریتیلی ، حقیقتیلی ،
 پک مزوا ، عادتاً قاعده سندن تپه سنه قدر ایری قیالردن
 یایامش بر جسم مردیون کبی ؛ بر مردیون کبی که
 قدمه لری کنیش ، فقط غیر منتظم ، میلی مدھش بر
 راقله سایه طوغرو یوکسلیور . . . قاهره نك نقاط
 مرتفعه سندن کورولدیکی زمان روح اوزرنده بر انطباع
 شدید حاصل ایدمین اهراملر یقیندن منتقمانه بر شدت
 تأثیر ايله بتون ملکات حیاتیه یی لرزه دار هیجان
 ایدیور .

یولك اك مفید اولق لازم کلن بو صوك قطعه سنده
 اطرافکزی بر شرذمه سفالت احاطه ایدر : بتون بتون

چیلایق ، یاخود مردار پاچاوارالره یاری اورتولو سیاه
چوجوقلر یولک صوک کیلو متورلرنده سزى تحملسوز
بردائرة محاصره آلتنه آلهرق هر طرفدن اوزانان تترهک
الریله بتون عروق مرحتکزه بر غلیان تهور القا
ایدرلر ؛ قوشارلر ، مرکبلردن زیاده قوشارلر ؛ هپسی
یورغونلقدن ، آق جکرلرک حرکات مفرطه سندن متولد
برخیشومیت صدا ایله حایقیره رق : باقشیش!... نعره
سؤالنک ایکی هجاسنی آیررلر ؛ هپسنگ بردن اشتراک
ایتدکلری بوانین تسئل بتون اعصابکیز اوستنه بر دسته
سوزن کبی باتار ، سمع روحی تخریش ایدر ؛ اوته کیلر
یوتأثرکزک فرقه واره جق اولورلر سه مروءه یایغره لرینی
تضعیف ایدرلر... ظن ایتیکز که کنیش بر حرکت
جوانمردانه سزى بومعجزلرک الندن قورتاره بیلیر ؛
بالعکس اون دانه سنک دست استعطافی بوش چویرمه مک
بصیرتسنزلکنده بولنه جق اولورسه کز یوز دانه سی —
قوملرک ، آغا جلرک آره سندن ، تارالارک ایچندن ،
اوتهدن ، بریدن ، اک او مادیغکزیرلردن چیقار ، محیر العقول
برسر عتله طویلانیلر ؛ یینه اولکی دینمه قونسری — فقط
یودفعه اون مثلی شدتله — تکرار باشلار و بواشکنجه
اهراملرک یاننه واریخیه قدر دوام ایدر... صوکره

بوکابوس یاواش یاواش طاغیلیر ، بر آملق کنیش بر شہیق
من و خلاص کوکسکزی کنیشلتیر ؛ من غیر اختیار درین
بر : « اوح ! . » دیرسکز ، صانیرسکز که آرتق
او مزعج یاشقانلردن قورتیلدکز .. هیہات ! ایکنجی
برکنیش نفس آلمه کزه وقت براققسزین یکی بر کروہک
دائرہ تقاضاسنه دوشرسکز : بودفعه کی مهاجملر آرتق
چو جو قلردکل صاحلی صاقاللی آدملردر ؛ بونلر با « قشیش »
ایسته مزلر ، رهبرک تکلیف ایدرلر . رد ایدرسه کز
اصرار ایدرلر ، قوغارسه کز کولرلر ، بالکلیه مایوس
اولنجیه قدر تقاضاده ثبات کوسترلر . بونلر بر قبیلہ
مخصوصه نك افرادی ایمش که وظیفه لری اهراملره قارشی
بکجیلک ، زیارتجیلره قارشی سولوکلک ! . برنجی وظیفه لری
نہ درجه یه قدر ادا ایتدکلرینی بیلیم ، فقط ایکنجی
وظیفه لرندہ طوغروسی هیچ تکاسلری یوق . بیلدیکمز
عادی سولوکلردن فرقلری شوکه انسانک قانی امیورلر ،
یالکز قور و تمقله اکتفا ایدیورلر ...

سزک اصرار دفعیکزه قارشی بر آرهلق بوسولوکلرده
چکیلیور ؛ بر آن ایچون برجوف کلی ایچنده بولنیورسکز ،
صوکره بردنبره اهرام قارشیکزه چیقیور ؛ نظرك بتون
قوة تحملیه سنی جسامتیه ازر کی اولیور ؛ سزک ایچون

سما ، مسافه ، افق ، هرشی اوقارشیکزده ضیای صباح
ایله یالیزلانان عظمت حجریه دن مشکل قالیور ؛ بوجمی
حوصله خیالکنزله احاطه ایچون صرف ایتدیککز مساعی
سزه عادتالمر ویریور ؛ هله بو هیولای هندسینک
یاشنی دوشونمک سزه بر محال عقلی کی کورونیور. اهراملر
هیکل مادیلری اعتباریله نه قدر مهیب و مفید ایسه لر
ذهنده احیا ایتدکلری خاطرات تاریخیه اعتباریله ده مهم
ومده شدرلر. فی الواقع بر شکل هندسی اوزره یوکسله رک
بولو طلره رسیده اولان بواعجوبه انشائییه بتون دائره
مدنیت مصریه نك نقطه مرکزیه سی دکیدر ؛ ایکی قرن
اول تاریخنک اکثر وقایع کیره سی او نقطه مرکزیه
حولنده دوران و جریان ایتمه مشمی ایدی ؟ .. نظره
اولاده هر زاری آغیر بر هوای تعجب ایچنده بوغان
بویوکسک طاش ییغینی بر فرعونک قبه مزاردن باشقه
برشی اولمدینی دوشونولنجه کرک بونی یاپدیرانک ،
کرک یاپانلرک بتون میلان روحی بر معمای معنوی کی
فکر تحلیلله قارشی کرانسر وکردنکش قالیور ؛ نیچون
یاپدیرلمش ، نیچون اوغراشمش لر ، بو غرایت قایالری
ییغمش لر ؟ بتون مجهول ، ناقابل ایضاح ، هر سؤالک
جوابی بر خفای سر بسته ... هر قوه مخربه نك نیچه تعرضنه

بو قدر زماندنبری مقاومت ایدن بوبنای مخوف هراعتبار
ایله روح زائری ازییور. هرشیئی تخریب ایدن ییوست
بوعظیم غرانت کومه لری ایچون بالعکس برواسطه حیاتیه
اولمش ؛ هرشیئی برنعش حالنده کوسترن بی حیات چول
بونلر ایچون بالعکس پک زنده ، پک مناسب بر چرچوه
شکلنی آلمش . چول ایله اهرام او ایکی بی حیات
برلشنجه ابدیتیه طوغرو اوزانمغه چالیشان بر عمر
جمادی تحق ایدیور . بودیارک شمس آتشینی آلتنده طاش
ییغینلری آنجق قوملر ایچنده یشایه بیلیور . اهراملرک
موضعلرنده کی ارتفاع ده اولنلری صلصال نیلک طبقات
مترا کمه سندن قورتارمش . شیمدی بو یادکار فراغنه
اوکنده کی امواج نیل ایله آرقه سننده کی دریایی ریکه عین
نظرتهمکمله نکران اولیور .

بوعجائب عالم ، ازمنه سالفه نك بواک مشهور ابنیه سی
اولهجه ، چولک سکوت بی روحانه سیله نهرنیلک زمزمه
امواجی آره سننده ، مغروروتنها نشین قالمالی ایدیلر ؛ بونلرک
یاننه ابنیه جدیده صوقوله ماملی ایدی . فقط انسانیتک
برقسم مهمنی یاقوب قاووران حمای تجارت بونکته حرمتی
اونوتدیرمش ؛ اورایه ، اهراملرک یاننه بر اوتل - بر
« مناهاوز » - وضع اولنمش . بوکون اوراده کنج میسلر

ساعت بش چانی ایچیور ؛ تمرینات عضلیه مراقلیلری
 لاون ته نیس طاقملرینی بولیور .. آز قالسین ، یالکز بو
 اوتل ایله ده اکتفا اولنمیه رق اهرامک قاعده سندن تپه سنه
 قدر آصیلی بر تراموای خطی انشا اولنه چقمش ؛ بر شرکت
 صناعیه بو تکلیفه جسارت ایتمش ... برکت ویرسین که بو
 تکلیف بررد عمومیدن باشقه جوابه نائل اوله مامش .

اهراملرک قاعده سنه واردینغ زمان اوراده بکچی
 قبیله سنی تشکیل ایدن ماوی انتاریلی . بیاض تقیه لی عربلردن
 برقاج دوه دن ، برقاج مرکبدن باشقه یالکز ایکی اجنبی
 قادین واردی که بوقادینلر اهرامک اورته سنه قدر چیقمش
 اولان ایکی ارککه نصب نگاه ایتشدیلر . شبهه سز بوقادینلره
 منسوب ، اوایکی ارکک کوچولمش ، بر چوجوق نسبتی
 آلمشیدیلر ؛ بونلرک بیاض اثوابلری اطرافلرنده کی ماوی
 انتاریلی رهبرلردن کندیلرینی آیریوردی . اهرام مثلثینک
 برکوشه سندن چابوق چابوک یوکسلوردی . یاواش یاواش
 چوجوق نسبتی ده غائب ایتدیلر ؛ شیمدی آرتق ماوی
 سینکلر آره سنده ایکی بیاض سینک کی کورونیورلردی .
 دروه یه یاقلاشدیلر . قادینک آشاغیده سوینیورلر ، چیر-
 پینیورلردی ؛ کندیلرینه منسوب ایکی ارککک بوموفیقی
 اونلری مست ایدیوردی .

طوغروسی بن بوسمارسیده قایالغه طیرمانق هوسنده
 دکلم؛ ذروهیه قدر چیقوبده اوراده او یویان قرق عصری
 یحضور ایتک آرزوسی کوکلی تخریش ایتوردی . مع مافیه
 بو صعوده مجبور اولدم ؛ چونکه او ایکی اجنبی قادینی
 آره صره استبعاد آمیز بر نظرله بنی سوزیورلردی . خفیف
 بر معنای تجسسله قاریشیق بو نظر لر بکا : « نحیف دلیقانی ،
 سن ده بزم کبی متحسر قاله جقسک ، بزم ارککلر مزک
 یاپدیغنی یاپه میه جقسک ، سنک باجاقلر کده بو صعود قوتی
 یوق ! » دیور کبی کلیوردی . بو نظر لرده کی معنای مرحمت
 بنی عادتاً اغضاب ایتدی ؛ کندی کندیمه : « نه اولورسه
 اولسون اولسون ، چیقارم ! » دیدم .

دنیا ده دهشتله تحلفنی جمع ایدن شیلردن بری بیوک
 اهرامه صعوددر ؛ غذائی ایله اکلنجه سی معادل . تپهیه
 قدر چیقمقده مخاطره ممکنسه ده بو امکان مخوفی اونوتد .
 یره جق شیلر وار ؛ از آن جمله یورغونلق که بتون کیمکاری
 قیره جق ، بتون اتلری قیه جق بر درجهیه واریور .
 اهراملرک بکجیلکی ایله موظف ، علی التقرب
 آلتش نفردن مرکب بر بدوی قبیله سی طرف حکومتدن
 مقطوع بر فیأت - اون مصرغروشی که علی التقرب اون
 ایکی غروش - مقابلنده اصعاد ذواری در عهده ایدیور .

یوقیله نك بتون مدار معیشتی منحصر آ بو مكافات اصعادیه دن عبارت اولدیغندن بیچاره لرك كوزلری یولدن ایرلیور ؛ برزائر ك كلدیكنی کورونجه كوزلرنده ، برر کومور پارچه سی کی سیاه كوزلرنده شدید برانجلا ی شادمانی حاصل اولیور . قیله نك شیخی زائر ك یاننه کلیور ؛ مشاوره ایدیلیور ؛ قرار ویریلنجه شیخ افراد قیله دن ایکسینی مأمور ایدیلیور . بوا یکی کشی هر قضادن مسؤل قالیور . صوکره صعود قوم دیاسی باشلا یور . هر زائر بتون صعود ونزول مدتجه ایکی بدوینك کلیاً تحت آمریتده قالیور . عادتاً کوله سی کی اولیور .

بن شیخك تكلیفی اولار د ایتش اولدیغ ایچون شیمدی کندیسنه مراجعت ایتك بر آز کوچ کلدی . فقط باشقه برچاره صعود یوقدی . یا شیخه مراجعت ایتلی ، یاخود ایکی اجنبی قادینك نظر تهکمی آلتده ازیلملی ایدم . برنجی کوچكك وقارمه دهاسهل التحمل کلدی . شیخ ایکی بدوی ده بکاترفیق ایتدی ؛ بوا یکی بدوی ده ایکی ده یرلی عرب منضم اولدی که بونلردن بری النده طولو برصو دستیس ی طوتیوردی ، اوته کی رهبرك هوسنده ایدی . بش کشیدن مرکب برهیأت مختلفه سفریه حالنده بزم مضحکه صعودیه ابتدا ایتدی .

اهرامی تشکیل ایدن غرانیتلرایری ایری قایالرحالنده
اولدیغندن برقدمه دن اوته کنه کجه ییلمک ایچون اكاوزون
بویلو بر آدمک باجاقلری یتشمز؛ مع مافیه عربلر، بدویلر
حقیقورلر؛ اونلرک باجاقلری بو چکرکه معماسنی
آکلاشلماز بر صورتده حل ایدیوریریور. رفاقتسکزده کی
ایکی بدوی بر یوقاریکی قدمه یه صچرایورلر، سز بر طرفدن
قوللرکزی اونلرک اللرینه اوزاتیورسکز، دیکر طرفدن
باجاقلرکزی ممکن اولدیغی قدر آچهرق بر آیاغکزی
اوست قدمه یه یاقلاشدیریورسکز. بدویلر وار قوتیله
قوللرکزدن چکیورلر؛ رهبرکزاوموزی ایله وجودکزی
قالدیریور؛ سز یوکسلماک ایچون بتون چویکلککزی
طویلورسکز. بومساعی مشترکه ایله، هیامولا هیاصا.
برقدمه یوکسلورسکز... بوحرکت اهرامک تپه سینه
واصل اولنجه قدر علی التخمین ایکی یوز کره تکرار
ایدیور. آرتق اکلاسلککه انسان ذروه بنایه واصل
اولنجه نفسی اکسلماش، قوللری کریش، باجاقلری
بورغولماش. کیمکلی قیرلماش. یورغونلقدن بایلمشدره.
هله بوسیاحت صعودیه ده کی یول آرقداشلرکک نراکتی
سزه انجق بر چاشیر بو حچه سی معامله سنی روا کوره جک
درجه ده اولدیغی اکلاینه یورغونلغکک شدتندن
اورکمه باشلارسکز...

بن دها اورته قدمه لرده ایکن یورولمشدم ؛ فقط
 کندی کندیمه : « ضرر یوق ، دییورددم ، شو قادینلرک
 تخمیننی یالانجی چیقارددم یا ... » صکره او ایکی قادینک
 برده شیمدیکی معنای انظاریتی تحلیل ایچون آشاغی یه
 باقدم : ایواه ، اونلر کندی ارککلرینک انیشنی سیر
 ایتمک ایچون اهرامک اوتہ طرفنه کچمشلر ، نظردن نهان
 اولمشلردی ! بن اونلرک نظرندہ برحیرت تقدیریہ بولمق
 بویله جه بتون برمدہش یورغونلغک مکافاتنی کورمک
 ایستیورددم ؛ حال بوکہ اونلرک یرندہ قالان بوشلغک
 منظرہ مستہزیانہ سندن باشقه برشی کورہ مدم . اوزمان
 دوشوندیم : بلکہ بنم اوایکی قادینک نظرندہ کوردیکم
 شی بر لاقیدی جدیتدن باشقه بر معنایی حامل دکلدی ،
 اوکا اومعنای مرحمتی ، اورحم تہکم آمیز مألنی القا
 ایدن ینہ بن ایدم ، بنم کندیمدہ بیلدیکم عجز ونحافت
 حسی ایدی ؛ شہہ سز اونلر بکا باقنجه بن ظن ایتمشدم
 کہ بنم برہرکول اولمیدیغمی آکلادیلر ، بو حقیقتی کشف
 ایتدیلر ؛ شہہ سز بنی اولا بوطنہ ، صوکرہ بر سعی فوق -
 التحملہ سوق ایدن شی کندی ضعفمدی ؛ شہہ سز بن بر
 زال اوغلی اولسہ ایدم اوایکی قادین بکا ینہ عین نظرلہ
 باقہ جقدی ، چونکہ بن اونلر ایچون بر یابانچیدن باشقه

برشی دکلدم؛ اونلر بکا قارشى آنجق لاقيد اوله بيليرلردى.
شيمدى بن کندیمی بويورغونلق جزاسنه پک لایق
کوردم .

مع مافیه صعودده دوام ایتدم ؛ یوکسلدکجه اهرامک
ارتفاعی آرتیور کی اولیور . ایستر زمینه ایستر سهایه
باقیکز : بارد برر عشه دهشتک وجود کزده طولاشدیغی
حس ایدیورسکز . مدھش بر صورتده زمین آیاغکزک
آلتدن آشاغی یه طوغرو اوچیور کی کورونیور ؛
اهرامک ذروه سنی لاینقطع یوقاری یه طوغری قاحیور کی
کلیور .. باشکزه غریب بردونمه ، رو حکزه مؤثر بر صقتی
عارض اولیور .

اهرامک اورته سنه کلنجه ساخته بریورغونلق بهانه سیله
آرقداشلرکز براستراحت تکلیف ایدیورلر ، بر تکلیف که
ازدل و جان قبول ایدیورسکز . صانیورسکز که هم
دیکنه جک ، هم ده اطراف کزده کی واسع افقی تماشایه
فرصت بوله جقسکز .. هیئات ! ایلاک نفسکزی آلمه دن
یانکزده کی رهبر هر جبندن بر ساخته آنتیقه چیقاریور ،
هندو ایرانک بوکونکی پاره لرینی آنتیقه دیهرک سزه صاتمق
ایستیور ، « موغالی ، موغالی ... » دییور که ، بهالی دکل ،
اوجوز ، دیمک اوله جق . سز : « موش لازم ، موش

لازم ... « ديهه رك بونك النذن قورتيله يم ديركن برديكري
 آياقلا ركزي اوغمغه ، براوچنجيسي باشكزه صؤوق صو
 دوكمكه ، ونهايت دردنجيسي : « اناطيب .. » مقدمه
 فخريله سيله نبضكزي معينه يه قالقيشيور . سز : « لا ،
 ياشيخ ، موش لازم ... » جمله دفعه سيله ياقه كزي
 قورتارمغه چاليشيورسكز ، اونلر ينه اصرار ايدييورلر ؛
 حدتلييورسكز ، شاشيرييورسكز ؛ فقط اونلردن آريله -
 ميورسكز . چونكه كندی كنديكزه نه اينك امكاني
 وار نه چيقيمق ... اونلر سزك مغلوبيتكزي حس ايدنجه
 هپ بر آغزدن : باقشيش باقشيش ، ديه ميرلانييورلر .
 بوتقاضالره تحمل ايدم يوب الكزي جييكزه صوقسه كزده
 قورتيله مازسكز ؛ اونلر بتون مامللككزي آلسلر ينه
 طويمازلر ؛ ينه : باقشيش ! ديرلر . بوموقعده اك مدبرانه
 حركت يورغونلق ، بايغينلق وسيله سيله كوزلر كزي قاييوب
 اونلر ك ديدكلريني آكلاما مازلغه كلكدر ... بووقفه
 استراحت او دقيقه قدر دوام ايدييور ، بومدت ظرفنده
 يول ارقداشلر كزي سزي هيچ برطرفه باقدير ميورلر ؛
 او قدر روح صقييورلر كه انسان هرشيء اونوتيور ؛ يالكز
 شودرت همراهك النده براويونجاق اولديغني دوشونه رك
 آغلايه جنجى كليور ... صوكره اچلرندن برى ، « حاييه

! . . . « ديه حايقيرييور؛ هپسي بردن قالقيور ، تكرار
مساعي صعوديه به باشلانيور .

تهيه وارنجه يه قدر ايكي وقفه دهاوار؛ اونلرده ايلك
وقفه طرزنده كچيور، آياغكزك آلتنده برامتداد غيرمتهاي
ايله سريلى طوران منظره نادره دن برخاطره بصريه آلمه كز
محال . . . كوزحبسي، بين حبسي : درت رفيق سياحتكز
بونلك هپسنى خاطرده الى الابد محكوك قاله جق برغيرتله
اجرا ايدييورلر . . .

نهايت يوزاوتوزيدي مترولق ارتفاعى قطع ايدهدرك تهيه
واصل اوليورسكز . بورايه كلنجه بدويلر يوكسك سسله :
« براوو ! . . . » ديه براغزدن باغرييورلر؛ نيچون؟ مجهول!
سزيمي آقيشلايورلر، كريلرني مى آقيشلايورلر، تبريكى
تحسينى ، يوقسه ده يورغون سياحى آليقلاشديرمق
الچون بر حيله مى ، نه در . بيلم ! فقط طوغروسي
بن هم قورقدم . هم كولد . بونعره ناكهاني عقينده
ينه اطرافه طويلانديلر، ينه ساخته آنتيقلرچيقدى ؛
رهبر ، ينه بنم آكلايه بيله جكم بر عربجه ايله ، تعريفات
تاريخيه سنه باشلادى :

— نابيلون . . . اربعين اعصار . . . دلين واحد
واردعين اعصار . . .

یعنی :

— ناپولئون ...

قرق برعصر ...

دیوردی ؛ غالباً بو عزیز رهبرم حسابنی سنه هجریه
 اوزره یوروتیوردی ! ... بواشناده بدویلرک بری اون
 دقیقه ده بواهرامک تپه سندن قاعده سنه اینوب اوته کی
 اهرامک تپه سنه چیقه جغی ، بو قدر جست و چالاک اولدیغی
 آکلاتیور ؛ صوکره اونک بو آنیکلکی بنی مدیون براقیر-
 مش کی کولیور ، بویونتی بروضع ناز ایله برطرفه
 قیریور ، النی اوزاتیور ، باقشیش ! ... بردیکری
 قوللریمی چاریکله مک ایستیور ، ینه باقشیش ! دیور ...



اون ایکنجی مکتوب

قاهره دن

بوراده اهرام ایله ابوالهول دن صوکره شایان زیارت
و تماشا یرلر مراقد ملوک ایله جوامع شریفه در. بوجهته
قاهره یه مواصلتمزدک بواو چنجی کونخی اوز یارتلره تخصیص
ایتدک .

قاهره ده درت یوزه قدر صایدقلری جوامع شریفه نك
اساس معماریسی عربی واقسام و ترتیبات اعتباریله
علی التقریب بتون طانیدیغمز جامعلره مشاهددر : اولاً
اورته سنده منتظم برکثیر الاضلاع شکنده کی شادروانیله
بر میدان ، صوکره حصیر یا خودخالی دوشه لی بر محصوره ،
دها صوکره داخل جوامع شریف که دیوارلری بر معتاد
خط کوفی ایله منقوش آیات جلیله ایله مزین ، قبه سنده
بر سلسیل آهنین کبی ریزان اولان زنجیرلر اوچنده
قندیلر ، دوه قوشی یومورطه لری ، ایپک پوسکوللره ،
آویزه لر .. اورته ده منبر ، کعبه جهتنده محراب .

جوامع قاهره نك الكاسکیسی شهرک قسم قدیمنده کی
« جامع عمرو » در . اون اوچ عصر دنبری شایان بوجامع

شریف بوکون بر خرابه ، فقط بر نفیسه معماریه خرابه -
 سیدر . بر کوچک مورخ کچینن ترجمانلر حکایه
 ایدیورلرکه حضرت عمرو بن العاص بوجامع شریفی بنا
 ایتک اوزره مناسب بر موقع آرادینی صیره ده بولدیغی یر
 بر ثیب موسوینک عرصه موروثه سنه . تصادف ایتیش ؛
 بوقادین هر فیئاتی ، هر مکافاتی ردایده رک عرصه سنی محافظه ده
 اصرار ایلش ؛ اوزمان سردار شدتلی بر انفال ایله وسائط
 تجریه یه توسلدن اول خلیفه زمان حضر عمر الفارقه [ر . ع .]
 مراجعته قرار ویرمش ؛ جواباً اوزرنده بر خط مستقیم
 ایله بر خط منکسر چیزیلی بر کمیک قویون باشی آلمش ؛
 سردار بر معماری عدالتی حل ایتکده تأخر ایتمه مش ،
 کندی کندینه : « یا خلیفه ، حقک وار ؛ طریق الاهی
 اولان خط مستقیم تعقیب ، وطریق شیطان الرجیم اولان
 خط منکسر دن اجتناب ایتلی .. » دیش ؛ استعمال
 شداندن فی الحال واز کچهرک ثیب اسرا بلی یی چاغیرتمش ،
 عرصه سندن آنجق تازه کسيلمش براوکوزک پوستی قدر
 بریر ایسته مش ، موسوی قادینی بو طلبک ضمنده کی
 دقت و ظرافتی آکلا یه میهرق راضی اولمش ، بو واسطه
 شهادتله اسلامیت قطعه مصریه ده ایلك معبد منورینی اعلا
 ایتیش ... جامع عمرو بوکون ریزه ریزه بر سقوط وانهدام

حالنده اولمقله برابرینه روح زواره القای حیرتدن عاجز
 دکدر . یکپاره صوما کی یاخود غرانیته الی آتمش ستون
 حالا کمال عظمتله قبه بی طوتیور . وقتیه عددی یوزاللی یه
 چیقان بو ظریف ستونلر — رهبرک روایتنه کوره —
 معابد قدیمه دن جمع ایدلمش وحتی هپسی برار تفاعده
 اولدیغندن قیصه لری مختلف باشقلرله اوزاتیلمش . اوایمالی
 باشقلردن بر قسمی ایوم ، ییقیلان ستونلرک انقازی آره -
 سنده ، جامع شریفک اوته سنده بریسنده کورولیور .
 بوکون داخلده نه قنذیل ، نه حصیر ، نه خالی وار ؛ هرشیده
 بر منظره فرسوده کی محسوس اولیور . یالکز مدخلده کی
 ایکی ستون ایله محراب جهتنده کی ستون مخصوص حالا
 محافظه وضع و طراوت ایدیور .

جامع عمرو دن صوکره کاسکیسی «جامع طولون» در .
 احمد بن طولونک انشا ایتدیریکی بوبنای مقدس جوامع
 قاهره نک اکبویوکیدر : بانینک مقصدی غایت جسم و ناقابل
 انهدام برشی یاپدیر مقمش ؛ بو وظیفه بی محبوسین آره سنده کی
 خرستیان بر معماره حواله ایتمش ؛ محبوسک سییلنی تخلیه
 وذاتی خلعت مخصوصه ایله تلطیف ایتدکدن صوکره
 مصارف ابتداییه قارشیلق اولق اوزره یوزبیک دینار
 ویرمش وشدتله توصیه ایتمش که بوجامع بی مثالک ترکیب

انشائیسنده نه تخته ، نه دیرک ، قابل احتراق هیچ بر ماده
بولنیه جق ؛ یالکز طوغله ایله کیرچدن مرکب اوله جق ،
بوندن باشقه جامع شریف دروننده یالکز محراب جهته
قونیه جق ایکی ستوندن باشقه برعمود بولنیه جق ؛ خاتمه
تنیهات اوله رقده شونی دیمش : « برکون بتون شهر
یافیشان نیل ایله ویا حریق عمومی ایله کلیاً خراب اولسه ده
نم یاپدیر دیغم جامع برقرار قالمالی . ایشه بن بویله بر بنا
ایستیورم .. » بوبنای رصینک مناره سی رهبرلرک بویوک
بر سرمایه اظنا بیدر ؛ دوداقلرنده خفیف بر تبسم غرور
ایله آکلاتیورلر :

— احمد بن طواون غایت جدی بر ذات ایدی ؛
لهو و لعبه هیچ رغبت ایتز ، دائماً چالیشیر ، دائماً امور
مهمه ایله اشغال ایدردی . عمرنده یالکز مستثنی بر دقیقه
کچیردی : او آنده اوکنده کی بیاض دفترک بر یاراغنی
قوپارمش . کاغدی پارماقلری آره سنده بی خبرانه اکیور
بوکیور ، گاه بر پارچه سنی کسپور ، گاه کسیدیکی پارچه لردن
برایکی سنی کاغدک اوته سنه بریسنه یرلشدیر یوردی .
اطرافنده بولنانلر ابن طولونک بو حرکت غیر جدیه سنه
هیچ بر معنی ویره میورلر ، بوفائده سز مشغله نک سبینی
آکلایه میورلر ، متعجب اولیورلردی . بر آره لق احمد

طالبی یاریم اویقودن او یانیر کی اولدی ؛ کندی النده کی کاغذ پارچه سنی ، اطرافنده کیلرک یوزلرنده کی معنای عمومی حیرتی کورنجه عادت اوتانندی . بولعب خافلانیه بره مقصد ضمنی اسنات ایدهرک اطرافنده کیلری دها بویوک برحیرت تقدیرکارانه یه دوشورمک ایچون النده کی کاغذک شکلنی تنظیم واصلاحده دوام ایتدی ؛ صوکره جدی برطورایله : « معماری چاغیرسینلر ... » دیدی ؛ معمار کلنجه : « ایشته بنم جامعک مناره سنه ویره جکک شکل . بن بو نمونه یی کندی المله ترتیت ایتدم ؛ سن ده مناره نك انشاسنده بونی تقلید ایده جکسک .. » امرینی ویردی . معمار بوا مره نه درجه یه قدر اطاعت ایتدیکی معلوم دکلسه ده الیوم جامع شریف ده بوکون متروک و خرابدر : بوینای متینی بر آرهلق — کیم بیلیر هانکی احتیاج اوزرینه — خسته خانه عسکری یه قلب ایتمشلر ؛ دها صوکره متوفی اسماعیل پاشانک خدیوتی انشاسنده بر مدرسه بنات خدمتی کورددرمشلر .

بوکون جامع طولون بر جمع سئله حالنی آلمشدر . اسکی دیوارلرک پیرایه ذی مالی اولان خطوط کوفیه یرینه بوکون دیلنچی چو جو قلرینک کومور پارچه لر یله چیز — دکلری قابا کی رسملری قائم اولمشدر .

جوامع قاهره نك الك بر يوكى جامع طولون ايسه الك كوزه لى
« جامع حسن » در . روميه ميداننده كى بوجامع شريفك
محتشم قبه سى ، متين مناره سى ، يوكسك باشلقلى ديوار لرى
منظره لطيفه لريله دها خارجدن نظر دقتى ايقاظ ايدىيور .
بيلىكمز جوامع شريفه قاپولرنده بلكه ايكي كره يوكسك
برمدخل منقوشك قعرنده تونجندن بر آرمه ، كوچك
ستونلر ، يوالر ، اويمه لرله مزين بر قاپودن كيريليور .
جامع شريفك داخل دها لطيف ، دها حيرتفرمود :
ديوار لك هر طرفنده خط كوفى ايله آيات جليله — فقط
كورلمه مش بر بويوكلكده — حك اولمش ، خطوطك
آره سى ينه كورولمه مش بر جسامتده چيچكلرله طولدورلمش .
صوكره بورادن موضع مرقد كچيليور ؛ بوراده نظر
تماشايه بردواره استغراق عارض اوليور : تصورايد كزكه
على التخمين يوز متروار تفاعنده بر قبه آلتنده بولنيورسكنز ،
اطراف كزده كى ديوارلردن بويوك بر مهارت معماريه ايله
ساخته بر سقوط حالنده كوسترلمش طاش كو مجلر بر آويژه
سنيحات صورتنده صارقيور... مع مافيه بوجامع بينظيرده
ديكر لرى كى خرابه يوز طوتمش ، نقوش معماريه آره سنده
كوكر جينلر يوا يامش ، بتون اويمه لريره ميل ايتمش ؛
قاهره نك بواك كوزل جامعى ده غبار متروكيت آلتنده بر
ديباجه خرابه حالى آلمش ...

قاهره نك دوت يوز جامعى كزوب كورمك مشكل ،
 على الانفراد تصوير ايتك بويوك بر صبره محتاج اولديغندن
 بز يوزده بر حسابيله يالكز دوت جامع شريفى كورمكله
 اکتفا ايتك . صوك كورد يكمز جامع شريف ده « جامع
 ازهر » اولدى . هجرت نبويه نك اوچيوز الى طقوزنجى
 سته سنك جمادى الاولاسنده بر سردار فاطميه طرفندن
 انشا اولنان بوجامع كيير قطعه مصرينه نك اك بويوك مدر-
 سه سيدر : رمضان حلول ايتمش اولمق حسابيله جامع شريفى
 زيارتمز دور تعطيله مصادف اولديسه ده تحقيقا تمزه نظراً
 بوراده هر سته ، اون بيك طلبه علوم بولنورمش ...
 جامع شريفك غرب جهتنده كى بويوك قاپودن كييرلنجه عادتاً
 اوزون بر بازار يرينه چيقيليور : قصاب ، سبزواتجى ،
 بربر ، توتونجى ، هپسى موجود . بورادن كچيلدكن
 صوكره جامعك حوليسنه ، دها صوكره اصل جامع
 شريف داخلنه كييريليور : بوراسى عادتاً مرمرستونلردن
 ياپلمش براورمان حالنده ؛ كوز شاشيريور : ايكي ستون
 آره سندن بر مجراى نظر آچغه چاليشيور . همان همان اوچ
 بيك مترو مرمر بنده بر وسعت سطحيه سى اولان جامع
 ازهرك بالنسبه پنجره سى آز ، طاوانى باصيق اولمق
 حسابيله ايجريسي طار ، قارائلق ، هله اون بيك طلبه

علومك اقامتنه مطلقا غير مساعدكي كورونيور ...
 مراقد ملوك ، شهر خارجنده ، چولده بزم هيچ
 كورمديكمز ، هيچ تخيل ايدهميه جكمز طرزده جسيم ،
 زرین قوم ييغينلري آره سنده بر قبرستان تشكيل ايد -
 ييور. فراغه قديمه مدفيلريني چولده اهراملر آلتده
 كيزلدكلري كي ملوك مصريده خواب ابديلريني شهرك
 ولوله روزمره سيله اخلاص ايتك ايسته مه مشلر ، اونلرده
 منام سرمدي اوله رق بيابان بي پايانك بر كوشه سني انتخاب
 ايتمشلردر . بر طرفدن « جبل احمر » ديدكلري كوه
 آتشرنك ؛ بر طرفدن يوكسك مظلم ديوارلري كبود سمايه
 رسیده اولان حصار قديم ايله محاط بو قبرستان بتون
 يشيلاكدن محروم. قوملر اوستنده طاغيلمش اقسام
 ابنيه ايله مستوردردر . قبرستانك اورته لرينه كلنجه انسان
 كنديسني هر طرفدن بر باروي اصفه له محصور ، محبوس
 ومضطر صانيور ؛ بوخيال اضطرابي آنجق لاجوردی
 صفوتيله سما ازاله ايدو بيليور ... مراقد ملوكك بر
 خصوصيتي ده بيوك برمسيره كي دائما غايه لق اولماسيدر:
 صاعده ، صولده ، هر طرفده كمال شطارتله اويونلرينه طالمش
 يوزلرجه چوجوق كورييورسكيز. بتون بو هوای مقابله
 بسله نن ياري چيلاق چوجقلر مراقد بكجیلکی ایدن

بر كوچك قبيله نك محصوليدر. مزارلر آره سنده ياشايان
 بوقيله بار حياتي چو جوق يتشدير مك اكلنجه سييله تخفيف
 ايديور. دايما بوسكوتى ديكلمك ، دايما بوسارى قوم
 ييغىلري آره سنده آنجق سمانك بر قسمنى كوره رك ياشامق ،
 هر زمان تضيق عزلت ايچنده كوكس كچير مك ، نه سايه سنه
 التجا ايده جك بر آغاچ ، نه قوقلايه جق بر ياراق بوله مامق ،
 حياتي براوزون اولوم تماشاسيله امرار ايتك ، هر كون
 اثر حركت اوله رق بر كهنه قبرك بر رقيق پارچه سي دوشديكى
 كور مك مجبور يتنده اولان بو آدملر برر بهيمه تهوريله
 محبتك حظوظات غليظه سنده كي مستي نسيان فرموده
 التجا ايده رك زوجه لرني متواليا بارامومت آلتنده
 ازييورلر ؛ بو ، اونلر ايچون براكلنججا ، بر مشغله ،
 برواسطه نسيان وتسليت اوليور. اكر بونلرك روحلري
 اوزون بر تربيه صنعتله رقت لازمه ي قازانمش اولسه ايدي
 بلكه مراقده آره سنده كي انقاض منقوشه يي اونظر استغنا
 ايله كور مزلر ، بلكه هر كون كرباد فيفايله بر پارچه سي
 سقوط ايدن اونفائس رقيقه يي طوپلامق اونلره بي حساب
 چو جوق يتشدير مكدن دهاتسلي بخش بر مشغوليت اولوردى .
 فقط ، خاير ! اونلر بوقابل انكسار هوسات معماريه دن ،
 بوسنكين اوراق وازهاردن ، بونحيف ونازين خطوط

ونقوشدن هيچ برشى آكلاميورلر ؛ اوقدر كه انازك
 اويملرى دلهره دوه لر ينك يولار ينى كچيرمكدن چكنميورلر .
 مرقد برقوق - تيمورنك معاصرى ، - ايله قايت بلك
 مرقدى بتون اويمه پنجره لرى ، رقت و لطافتى ايله زوارى
 حيرته براقيور . باخصوص قايت بلك مرقدنده كى
 فيل ديشى و آبنوس قاقمه لى تحته اويملر ، يكدىكريله
 قوجا قلاشان طاش ايشلمه لى ، رنگارنگ پارچهلر ن مركب
 جاملر حقيقهً روحه جبرى برحس تقدير القا ايديور .
 مبارك پاى رسالتپناهينك اثر مقدسيه مباهى ايكي غرانيت
 مكعبى ده - برى سنجابى ، ديكرى كلگون ، - بوراده
 قايت بلك مرقد موشخنده محفوظدر ...

آرتق اقشام اولمشدى . اخرويات آره سنده چن
 بوكونك غروبى ده مراقده ملوكه مجاور برتپه دن تماشا
 ايتدم ، بوتماشا اثناسنده برقاق رقيقه مشاهده كچيردم كه
 اونوتمق ممكن دكلدر : شمس غاربك صوك اشعه افقيه سيلاه
 بتون قبه لر ، بتون مناره لر برر مشعله حالى آلدى ، جبل
 احمر بيوك بر كته خونين كى قيزاردى ، اوزاقده چول
 پارلادى ، اويلاه پارلادى كه بردرياي سيماب حالته كلدى ،
 بودرياي سيماب اوزرنده اهراملر شرقه ناظر سياه وجهلريلاه
 سماى آتسينه طوغرو يوكسليور ، نيلك - قله ئو پاترانك

سینه یأسنه صاپلادیغی افغای رنگین کی - چول اوستنده
 قیوریلان ماوی حدودینه نظارت ایدیوردی . قاهره
 بویوکسک شیلر آلتنده کولکه لره صاریلپور ، کیجه لره
 مخصوص قویو ماوی دومانلره بورونیوردی ...



اون اوچنجی مکتوب

قاهره دن .

یارین قاهره یی ترک ای دیورم ، دها یوزلرجه شایان
تماشا ، شایان دقت یرلر وار . بو قدر بویوک ، بو قدر اسکی
بر شهرده بش کونلک بر اقامت آنجق بر رؤیای سریع السیر
دیمکدر ؛ بورای کورمک ، بورانک حیاتنه دائر بر فکر
اجمالی ایدنمک ایچون بوراده هیج اولمزسه بتون بر قیش
کچیرمک لازم ... بوصول کونی کچیرمک ایچون «رهنا» لرده
الی التمشیر کورویورم : رهبری امواج نیل ایله کهواره
جناب کلیمک رسیده اولدینی جزیره ، حضرت کنعانک
کیزلندیکی غارنهان ، حیوانات باغچه سی ، جبل مقطم اتکنده
بر منکشه باغچه سنه کیزلنش خانقاه بکتاشیان ، اسکی قاهره ،
مطریه ، الی آخره .. دقیقه لر کچوردی ، عقده ترددی
حل ایتک ، برقرار انتخاب ویرمک لازم کلیوردی ،
کندی کندییه : « اسکی قاهره ایله مطریه .. » دیدم .

اسکی قبطی عائله لر یله مسکون اولان اسکی قاهره یه
کیتیمک ایچون کنار نیله واصل اولمق لازم کلیور . رمضان
اولمق مناسبتیله نیل ساحلی بوصباح پک تنها ایدی ؛ قوجه

نهر خرما آغاچلری آرەسەندە خفیف برزمزمە سحریە
ایله آقیور ، اطرافى برحیات شخورانه ایله رهین اهتزاز
ایدیوردی ؛ کیجهنک مائی کولکهسی دهانهرك کوچک
موجهلری اوزرندن چکیلەمش کبی ایدی . آفریقانک
بویوک کوللرندن بحر سفید سەحلە قدر بیک بش یوز
فرسخلق برمسافه اوزرندە صاری طالغەلرینی لاینقطع
یووارلایان بونهر مبارکک شوقیافت فجریه سەندە خیال
بشریتی رعشه دار ایدەجک برتأثیر عظمت واردی : ابوالمیاہ
دیدکلری بوجوی جسم بر معماری سیلاب حالندە اراضی
مجهوله دن قوپارق هر مانعه یەر غم آیفای بی حدودک دخر اش
یبوستنه بر خط منحنی تسلیت وضع ایدیور ؛ هر سەنە
بر موسم معیندە فیضان ایدەرك ، تا آفریقانک آیاق طو-
قونماش اورمانلرندن کتیردیکی صلصال محصولدار ایله
چول اورتەسەندە حدیقہ زراعت طرح طبعی سیلە مشغول
اولیور . هر سەنە درت آی دوام ایدن بوفیضان نیچون
اولیور ، نصل اولیور ، سوداندن قطعہ مصریە قدر
شلالەدن شلاله یە اتلا یەر ق دریای ریکە منصب اولان
بو هیولای مائی نیچون هر سەنەنک درت صیجاق آیندە
منتظماً قاباریور ، نیچون ؟ مجهول ... شوراسی معلوم
ومحقق که بونهر ، بوفیضان اولماسه بو کون وادی مصرک

اوته سنده بريسند بررخوشه سبزین ايله ترویج نگاه ایدن
 خرما آغا جلرندن حقیر صویونجه لرینه قدر نباتی نه لر وار سه
 هیچ یاشایه میه حق ، هر طرف چپلاق ، بی حیات ، غیر
 قابل اقامت قاله جقدی . سکان مصریه نك بویوك اندیشه -
 لرندن بری ده فیضان نیلك تأخیریدر ؛ بواندیشه نك درجه سنی
 تقدیر ایچون شو حکایه تاریخیه بی دیکلیکنز : بوقطعه نفیسه ده
 شمس هدای اسلامیه اشراق ایده لی آنجق برسنه اولمشدی ،
 اهالی قبطیه سردار حضرت عمر بن العاصه مراجعت ایتدیلر :
 — سردار ، نیله قارشى بزجه اسکیدن قاله برعادت
 برقانون واردر . بوکارعايت ایدلمدکجه نهرک صوینی یوکسلمز ،
 چول صولانماز ، محصولات زراعیه ادراک اولمز .

جناب سردار بوقانون حقنده استیضاح بیوردی ؛
 قبطیار ایضاح ایتدیلر :

— باعونه ماه قبطیسنك اون اوچنچی کونی کنج
 وکوزل برباکری جبراً بوینندن آلیر ، برکلین قیافتیله
 تزین ایدر ، نیلك بر موقع معینه آتارز .
 سردار جواباً :

— اسلامیتک دخولندن صوکره بوعادت جریان
 ایده مز .

دیدى . فقط کونلر کچور ، برجلوه قدرت اولمق

اوزره نهرک طبقه مائه سی یوکسلیموردی. اوزمان سردار ،
حضرت عمر الفاروقه (ر . ع .) مراجعت ایتدی ،
قارشیلق بر مکتوب آلدی که شومالی حاوی ایدی :

« بسم الله الرحمن الرحيم . عمر بن خطاب طرفندن نیل
مبارکه : اکر شمدی یه قدر سنک جریانک کندی اختیارکله
واقع ایسه تعطیل جریان ایت ، یوق اکر ، جناب خالق
اعظمک اوامر منیفه سنه تابع ایسهک حضرت الله اکبرک
ذات اکبریا پناهندن سنک فیضان تامکی تضرع و نیاز
ایدرز . »

عمر و بن العاص بونامه محترمی کمال توقیر و تحیل ایله نیله
القا ایتدی ، همان ایرتسی کون نهر قبارمغه باشلایه رق
اون آلتی زراع قدر یوکسلیدی که بوارتفاع حقیقه کمال
فیضان ایدی . بوکا قارشی قبطیلر لال حیرت قالدیلر .
بعدهما القای باکر راسمه سی تعدیل اولندی ، صویه قادین
شکلنده تختهدن بچلمش برشی آتلغه قرار ویرلدی .
بو قرار حالا بردوام جریاندر . : حالا هر سنه برعید مخصوص
کبی موسم القاحلول ایدر . اوزمان هر کس پرشوق و نشاط ،
کنار نیله طوپلانیر ، ترنم و تنزه ایدر مش ، اوزمان قادینلر
قوت و شفا امیدیه چوجقلرینی صویه صوقارلر ، نقاط
مخففهدن کلن مزمن خسته لقلیلر آب نیل ایله ییقانیرلر مش ...

بتون بومزایاسنه واقفمش کبی مغرورانہ ، آہستہ
 برجریان ایله بیتمز توکنمز انخالر رسم ایدرک نیل مبارک
 شمالہ طوغرو کیدرکن کاه برقوم تپہسی اوستندہ برطل
 قائم کبی کورونن برسودانلی عربی ، کاه برخرما آغاجی
 آلتندہ کی سرینلکی بتون صدرلریله تنفس ایدن برقاج
 کویلی یی ، کاه برعرب قریه سنک قریه سنک قروکیسیله
 مشغول بر آلمان سیاحنک طور عسکریسنی ، کاه انقاض
 ماضی ایله مملو برخرمایي ، کاه قورو چاموردن یاپلمش
 حقیر کلبه لردن مرکب کویلری ، کاه برشکل هندسی
 زمردین ایله اوزانان تارالاری ، فقط علی المعتاد ساکن
 وساکت ، یابس وتنہا ، بی حدود و حیات چولی تماشا ایدرہ
 بوسمانک بوشلغی اجرام مضمیئہ ، هوانک تنہالغی
 قوشلر احیا ایتدیکی کبی نیلک خالی سطحندہ بویوک ،
 مثلثی یلکنلی ذہابیہ لر ، قایقلر ، کیملر بر حرکت حیات
 ویریور : نہرک بولانیق موجهلری کبی نیل اوستندہ
 سفینہ لر لاینقطع برطرفدن کلیور ، برطرفہ کیدیور ،
 نظردن بری غائب اولمہ دن افقدن بردیگری چیقیور ؛
 صوکرہ بونی شیشکین یلکنلریله اوچنجیسی تعقیب ایدیور ،
 اوائنادہ برایکیسی دە جهت معکوسہ دن بونلری قارشیلیور ؛
 کویا اوزاقلردہ ، تا اوزاقلردہ کی نواحی غیر منکشفہ دە

موجود اولان نامحدود دستکاهلردن دائماً چیقهرق
 اراضی مجهولهیه طوغرو کیدیورلر ... کنیش ، بیاض
 قانادلرینی آچمش ، بویوک قوشلرکی بر آسایش مسعودانه
 ایچنده بیهراس واندیشه مرسای مقصودلرینه طوغرو
 ایلرلیورلر ؛ بونلر او قدر عروق وادیان ، او قدر هزیمت
 ومظفریت ، او قدر انهدام واعتملا قارشیسنده جریان
 لاقیدانه سنه دوام ایدن نهر جسیمک بر روح طیاری
 کیدرلر ، انسانله ، حیوانله اشیا ایله مملو اولدقلری حالده
 نیل اوزرنده اینرلر ، چیقارلر : بعضاً او قدر یوکلودرلر که
 کنالری صویه تماس ایدر ، عادتاً همان شیمدی باته جقلر
 طن اولنور . حقیقته مخالف اوله رق اوزاقدن دهارقیق
 وخفیف ، دهاظریف ومتناسب کورونیورلر ، کهنه لکلیری
 قابالقلری آنجق یقیندن حس اولنه بیلور . قارشیکزدن
 کچرکن کوریورسکز که بونلری نیلک صوی نوازش
 متمادیسیله خراب ایتمش ، شیمدی آغیر بر حمله آلتنده
 طاغیلویوره جک کی چاتیردایورلر ، ایکلیورلر ؛ ایکی اوچ
 کشینک سوق ایده بیله جکی بر قایغی یکر می اوتوزکشی بر چالاکی
 بی لزوم ایله بر باشدن بر باشه قوشه رق کوچ حال ایله اداره
 ایده بیلورلر . هر قایغی طولدیران دستی ، چاناق ، چوملک
 ییغینلری ، شکر قامشی دمتلری ، سبزه سپتلی ، ذخیره

چو والیری ، طاووق قفسلری ، بالیهر ، دنکله ، صندوقلر
 اوستنده یولجیلرک بر قسمی اویویور ، بر قسمی سویلشیور ،
 بری ماوال اوقیور ، بری نماز قیلیور ؛ جموعنک عددی
 کمی طائفه سنک عددی کبی مجهول ؛ مقدارلری ده
 کلدکلری یرلر ، کیده جکلری یرلر کبی نامعلوم ؛ هپسی
 بر صبر متوکلانه ایله نیلک جریانی ، روز کارک استقامتی ،
 دومنک میل ونفوذینی تعقیب اییدیور . بو هوسکدار
 یولجیلر کچرکن ساحلدن :

— السلام علیکم ...

دیه باغیریورلر ، اونلر بر معکس صوت کبی میخانیک
 اوله رق هپ بر آغیزدن :

— السلام علیک ...

دیورلر ؛ آب و سما آره سنده ساکن ، غافل ،
 ستریح اوله رق خواب و تقوی ، خیال و طعام ، ترنم
 تماشا ایله قوشلرله بالقلر آره سنده خصوصی بر صنف
 مخلوقات کبی امرار حیات اییدیورلر . بتون ثروتلری ،
 نون عائله لری ، ارض و حیات ایله کندی آره لرنده کی
 نون روابط و علائق یانلرنده ، کندیلری کبی صواوستنده
 موج ، خارجله مناسبتلری کویا یالکزه بر : «السلام..»
 اطمینندن عبارت ؛ قره ده کی عربله لر ، زینتلر ، سعادتلر

کویا اونلرک حسدینی دکل، غبطه سنی بیه تحریک ایتیمور .
اونلر آنجق بوسیار حیاتی ، بوروزکاری ، بونهری ،
بویلکنلری ، بویکدیگری متعاقب بر منبع مجهولدن دائماً
کلن کیلری ، آنجق بونلری سور کبی کورونیورلر .
بومسعود مخلوقلرک کوزلرنده اویله برصفوت بی خبرانه
وارکه کویا بیلدکلری شونلردن عبارتدر : سما صاف ،
صوبولانیقدر ؛ سعادت ده آغریسر بروجود ، طولو
برمعه ایله بیابان بیکرانه قارشی خیالات مضیئه یه طالمقدر ...
بولابالی کیجیلری ، بولا قید یولجیلری نیل ساکن ،
احترام فرمود بر قوتله ایستدکلری یرلره کوتوریور .
فقط بوروش نقلیسنده نه وقار وعظمت ، نه قدر احتشام
وار ! کویا مدنیت ابتدائیه نك نوروز ولادتنده حاضر
بولنان کندیسی اولدیغنی ، کویا ساحلر نده کی جسم شهرلر
کاغددن یاپیلمش برقله کبی یکسان خاك اولمشکن کندیسی ،
آنجق کندیسی قالدیغنی ، اطرافنده فکرلر ، خاطرلر ،
خیاللر متناوباً انقراض ماسبق آلتنده غبار نسیانه قاریشمشکن
یالکز کندیسی حالاقرن اولده کی قوت وحیاتیه یاشادیغنی
بیلیورمش کبی بروقع کرانسرانه ایله مجرای اعصار دیده سنی
تعقیب ایدیور . جوارنده هرشی دکیشمش ، یالکز
او ، یالکز نیل مبارک ایلک یوم جریاننده کی حالی محافظه

ایده بیلمشدر . بیکلرجه خرابیه خوابگاه اولان بوارض
مستناده یالکیز بوجوی وقور کندی صدرنده نبضان
ابدیتی حس ایتمش ، بشریتک سرابستان خیالاتنه انقطاعسز
برزمنه تهکمه جواب ویرمشدر .

نیل کنارنده بتون بر کتاب خاطراتک یاپراقلری
نظر دماغ اوکنده دور ایدیور ، فقط اسکی قاهرهیه
کیرمک ایچون آرتق بوکتابی قاپامق لازم کلدی .

اسکی قاهره قرون وسطانک مستحکم بلده لری کبی .
یوکسک ، قالین دیوارلرله محاطدر . سوقاقلر شمیدیکی
قاهره نك سوقاقلرندن ده اطار ، بنالردها یوکسک ، اطراف
دهاضیاسز ، دهارطوبتلیدر . بسوقاقلرده طولاشدیغی
مدتجه انسان کنديسنی بر معموره تنک ودراز ایچنده
ظن ایدیور ، بعض طولانبا جلرده یول او قدر طولاشیور که
ایکی طرفنده کی بنالرك صاچاقلری ، مشربیه لری یکدیگرینه
طوقونیور . بورالرده رطیب برکولکه ، درین برسکون
وسکوتدن باشقه برشی یوق . هر طرفدن آغیر برکوف
قوقوسی کلیور . هر خطوده چورومک اوزره یوموشایان
برسوپرونتو کومه سنه تصادف اولونیور . نادراً پاچاورالره
بورونمش بر جسد بشری پست وخافانه برسسله :
« باقشیش . . » دیهرک سیاه برجلده صاریلی بر میکدن

عبارت قولنی سزه طوغرو اوزادیور ... بورطوبتلی
 دارالتعفن ایچنده یاشایانلرک قسم کلیسی قبطیلردر . بوراده
 براسکی کلیسا وارکه روایت محلیه نظرأ عائله جناب
 یسوع (ع . س) بوکلیسانک مخزننده مدت مدیده
 اقامت ایتش ایش ؛ قاهره یه کلن زوار آره سنده بوکلیسای
 کورمکسزین عودت ایدنلر پک نادردر . اهمیت تاریخیه
 هرسیاحی بورایه جلب ایدیور . ترجمانلر کلیسانک مخزنی
 ایچنده حضرت مریمک اوطوردیغی یری ، حتی جناب
 مسیحک وافتیز ایدلدیکی قویوی کوستریورلر : واقعا
 تاریخ انبیایه واقف سیاحلر حضرت عیسی علیه السلامک
 ارض فلسطینده کی اردن نهرنده وافتیز ایدلدیکی وثائق
 تاریخیه دن اولدیغی اخطار ایدیورلر سده ترجمانلر
 دعوالرنده ، اعتقادلرنده هیچ بر نقطه یی تعدیل ایتیمورلر ،
 ینه کی کلن سیاحلره اسکی قویوی کوستریورلر ! ..
 بواسکی شهرک برطرفنده ، مسکون ابنیه آره سنده
 قبطی قبرستانی واردر . بتون خرستیان مزارقلری
 بو قبرستان داخلنده محصوردر . حتی قاتولکلرک برعرصه
 مخصوصه سی اولدیغدن جنازه لری قبطی قبرستاننک
 برکوشه سنده کرا ایله طوتولمش برموقعده مدفوندرلر :
 مستأجر میتلر !

« مطریه » اسکی قاهره جوارنده برقریه درکه
ایچریسینده کی بیوک برجمیز آغاجی بادی اشتهاری اولمشدر .
زیرا ، تاریخ مقدسک روایتیه کوره ، حضرت مریم
(ع . س .) فرزند مبارکیله برلکده — رؤسای
اسرائیلیه دن هرودیاتک تعقیبات عسکریه سندن قور تولق
ایچون — مصره کلدیکی صروده اوچیز آغاجنه دخالت
ایتمش وبرمدت اونک سایه اخفاسنده قاهره معقین
اسرائیلیه نك قبضه سبمندن آزاده اولمشدر . بو آغاج
اوزمانلرده بلسام یتشدیریلن برباغچه داخلنده ایتمش ؛
شیمدی اوشجره تاریخیه اطرافنده غایت کوزل ممالک
حاره چیچکلری تربیه ایدیلیور . واقعا تاریخ مقدسک
ارائه ایتدیکی نقطه ده الیوم جسیم بر آغاج موجودسه ده
عجبا عالمه مبارکه یسوعیه نك قطعه مصریه ده ایلک پنا کاهی
اولان آغاج بومیدر ؟ اون طقوز عصر لق اوزون بر حیات
آنحق باؤبابلره مقدرکن بوچیز آغاجی مستثنی اوله رق
او عمر مدیده مظهر می اولمش ، یوقسه اوشجره تاریخیه
یرینه عین جنسندن باشقه بر آغاجی دیکلمش ؟ بورالره
دائر معلومات و تحقیقات یوقسه ده زوار خرسیانیه نك
بو آغاجه بر حرمت مخصوصه ایله معامله ایتدکلری مشاهدات
یومیه دندر . حتی ایرلاندا لی برسیاح : « بن تا ایرلاندا دن

کلیورم ، پک زحمتلی برسیاحت اجرا ایتدم . مقصد
سیاحتده مطریهده کی آغاجی کورمکدن عبارت ایدی .
بوکون هیچ برزحمتمه آجیمیورم ، چونکه مملکتمه
او آغاجدن برکوچک دال کوتوره بیله جکم . بودال بنم
بتون مصارف سفریهمدن دهاقیمتلیدر . قطعه مصریهده
بکا طبیعت چرکین ، ابنیه تاریخیه روحفرسا کلیور . بن
یالکز بر آغاج کورمک ایچون کلشدم ؛ اونی کورددم .
منون ومسعود عودت ایدیورم .. « دیمش . خرستیان
سیاحلرک مطریهده حرمتله تلقی ایتدکلری شیلردن بری ده
او آغاج جوارنده کی بر آیازمه در ؛ بو آیازمه نک بیلادی کمز
بر بوستان دولابیه چیقاریلان صوی بوتخته اولوقدن
هرزائرک شرفه براز آقئدیریلیور ، زیارتجیلر بوصوی
ایچیورلر ، بونکله اللارینی ، یوزلرینی ییقایورلر ، چونکه
جناب روح اللهک مبارک چاشیرلری بوراده ییقاندیغی
مرویدر .

مطریهدن برقاق آدیم اوتدهده هلیوپولیس خرابه
مشهوره سی وارکه بوکون کندیسندن یکانه یادکار اوله رق
آنبحق بر دیکیلی طاش قالمشدر . برقاق خطولهک مسافه یی
قطع ایدوبده اودیکیلی طاشی یقیندن کورمک پک ممکن
ایدی ، فقط بن هلیوپولیسک او خاطره یکانه سنی اوزاقدن

سلاملامقله اکتفا ایتدم . چونکه . طوغروسی علم آثار
 عتیقه دن بی خبر بر مخلوقك اویله اسکی طاشلر اوکنده
 کشاده دهان غفلت طوروب ده هیه رو غلیف اشکال غریبه سنی
 اورتن سالخورده اورومجك آغلرینی صایمه سی بی معنی ،
 چرکین وعادتا صؤوق اولیور . کندیمه : « بر نظر وداعی
 ایله یکی قاهره نك یکی محله لرینی کورمك البته اولادر ! » دیدم .



اون اوچنچى مکتوب

قاھرەدن

عودت اسكى قاھرەنك كۈلكەلى ، رطوبتلى ، طار
معوج سوقاقلرىنى بىترنجىيە قدر زىمىتلى ، قىسوتلى اوليور ،
بوقاپانىق ، پىچ وتابلى يوللاردا اوكلن كۈنشنىك يالگىز
حرارتى حس اولئور ، جاجايغىلى طوران سوپرونتو
كومەلرەنن بربخار اختار چىقيور ، رطوبت موقعيەنى
تەغىن ايدىيوردى . انسان ساحل نىلە وارنجىيە قدر
فتحات تنفسىيەسنى طيقامق ، جگرلىرىنى حبس ايتىك ،
نفس المامق ايسيتور ...

يېكى قاھرەنك قەلب حياتى اوپرا ميدانيدىر . بتون
بويوك مغازەلر ، بويوك اوتلار ، دوائر رسمىيەنك اكترىسى
بوميدانە مجاوردر . زوار اجنبيە بورالردە اقامت ايدرلر ،
بىراخانەلر ، قهوه خانەلر ، قارخانەلر ھې بورالردەدر .
بوسمتك منتظم ، كنىش ، تىز شوسەلرەندە طولاشدىنى
مدتجە انسان قطعات خمسە اھالىسىنك ھىر بىرەنن بىر نەمۇنە
كورمەكن اميدواراولە بىلير . بواوزبكيە محلەسنىك ايشلك
جادەلرەندە برژاپونىيالى بىر المان تەقىب ايدىيور ، بىر حبشىنى

برانکلیز قارشیلایور ؛ بو اوپرا میدانی عادتاً بر مشهر ملل و عروق که بر آنتروپولوژی عالمی ایچون پک مساعد بر صحنه تدقیات تشکیل ایده بیلیر .

اوپرا میدانک ، وسعت احاطه نظریه اعتباریله ، اک مناسب موقعی « شه پرد » اوتلی اوکنده کی قهوه خانهک تراسه سیدر . اهالی مصریه ایله سیاحین اجانبک مناسبتلرینی مشاهدہ ایچون او تراسه ده بر قاق ساعت کچیرمک کافیدر . تراسه یی طول دوران ماصه لر آره سنده لایین قطع یرلی صاتیجیلر طولاشیور : مصرک مناظر لطیفه سی ، تاریخی پانارومالری ، ابنیه قدیمه سنک تصویرلری ، توپلی یلپازه ، حماماشاری ، ایشلمه لی اوچقورلر ، شام اویمه لری ، قدسک صدف معمولاتی ، یافه نک زیتون آغاجندن معمول اوانیسی ، ژاپون تقلیدی شیر ، فرسوده ایران ساجاده لری ، ساخته فیروزه لر ، یالانجی آنتیقه لر ، الحاصل هرشی ماصه لر آره سنده کزدیریلیور . بوسیار صاتیجیلرک تعیین ملیتده مدھش بر مهارتلی وار : نوازشکارانه بر تبسم ایله قولتوغنه صوقولقلری آدمک هانکی ملتن اولدیغنی فی الحال آکلایورلر ؛ بوندن باشقه صائدقلری شیئک یتمش ایکی لسانده کی اسمنی بیلدکلرندن سیاحک لسانیه :
— افندم ، لطیف یلپازه ... اوجوز : برشیلین ..

سوزلرینی فیصلدا یورلر . بعض شیطان صاتیجیلر
 تراسه یه اللرنده پارلتیلی ، جالب نظر برشیله کیریورلر :
 اوزمان قهوه ده کی متجسس سیاحلرک هپسی صاتیجینک
 باشنه طویلانیورلر ؛ النده کی یالیزلی اوکسه سایه سنده
 صاتیجی بتون مزاحم صیدیه دن قورتولیور . سیاحلرک
 کیمی آیاقده ، کیمی برصندالیه اوزرنده مصرینک بو حجه -
 سندن چیقان خرده وات رنکارنکی تماشاییدیورلر .
 بر آرهلق سیاحلردن بری برشی بکنیور ، فیاتی
 صوریور ؛ برغریب بازارلق باشلا یور : نه قونومی پولیتیک
 بتون عرض و طلب ، بیع و شراقاتونلرینی زیر وزبرایده جک
 بر بازارلق ... زیر ا بوضایتجیلرجه مقطوع فیأت اصولی
 کلیاً ممنوع الجریان اولدیغی کبی ایلك ایسته نیلن فیآتله
 صوک موافقت ایدیلن فیأت آره سنده برنسبت معتدله
 کوزتمه مکده مشروطدر ؛ غالباً بوتاجرلر صاتدقلری
 شینک قیمته کوره بر فیأت دکل مشترینک کوستردیکی
 رغبت کوره بر فیأت ایستیورلر ؛ بعضاً بر فرائق قیمتنده کی
 شیئه اوتوز فرائق ایستدکلری واقع اولیور ! سیاحلردن
 چوغنک بو اخذ و اعطاده یوتلدقلرینی اخطاره لزوم کورم ؛
 فقط بعض قورناز مشتریلرده وارکه بو آلیش و یریشک
 ییچندن آلدانمق سزین چیقمه نك قولایینی بولیورلر . بوضوک

طاقمك پلانی غایت ساده برشی : بکندکری شیئی هیچ
 بکنمه مش کتی کورونیورلر . غایت لاقیدانه برصورتده :
 « شو قاجه ؟ » دییه صورتقلری زمان چهره لرنده عادتاً
 برمعنای استحقاروار ، بوکقارشى تاجرلك غالى برقیاتدن
 بحث ایتکه جسارت ایده میور ، برفرائق قیمتده کی
 شیئه آنجق اون فرائق ایستیه بیلور ، اوزمان مشتری
 هیچ بر جواب ویرمکسزین النده کی شیئی آتیوریور ،
 غزته سنی آچیور ، مطالعه سینه عودت ایدیور . بوقومدیا
 سایه سنده صاتیجی بی هر بش دقیقه ده برفرائق تنزیل فیأت
 مرده سیله کندیسینه مراجعته مجبور براقیور ، نهایت
 تاجر مشتریك ایلک وپردیکی فیأته قدر اینیور ، اوزمان
 درین برشهیق تحسره کوکس کچیره رك متاع نفیسنی
 مشتریك اوکنه آتیور ، بروضع انکسارایله : « آلكز .. »
 دیور . مع مافیه ساخته برندات ایچنده نالان کورون
 بایع ایله آغلامقمی یوقسه کولمکی لازم کله جکنی بیلمین
 مشتریدن هانکیسنك آلدان دیغنی تخمین ایتك کوچ دکلدرو .
 بعض سیاحلر وعلى الخصوص بریتانیا آطه سندن کلنلر
 بوسیار تاجرلرک ایلک ایستدکری فیأتی بلاتردن کیسه لرندن
 چیقاریوریورلر ؛ صاتیجیلر بویله برروی التفات بولنجه
 آرتق کندیلر یله اخذ واعطایه کیریشمك ممکن اولیور ؛

فیأت ابتدائیہ لرندن برپاره تنزیل ایتیمورلر . بوساده دل
سیاحلر کندیلرندن قورناز اولانلرک بتون آمال اشترائیہ -
لرینی خردوخاش ایدیورلر . برکت ویرسون که اوپله
سیاحلره چاتان صاتیجیلر برقاق نوادر مسعوده دن عبارت .
اوتہ کیلر یکر می فراق ایستدکلری برشیئی ایکی فرانغه
صاتیجیه قدر قان ترا یچنده قالیورلر : عین شیئی مختلف
ماصه لرده اوطورانلردن بریسنه اون بش فرانغه ، دیکرینه
اون فرانغه ، براوچنجیسنه بش فرانغه صاتیورلر ؛ ظن
ایتمکز که بوصوک مشتری آلدانیمور ، اوده آلدانیور ؛
چونکه اوشیدک قیمت حقیقیه سی بی شبهه ایکی فرانقدن
زیاده دکلدر . بوغریب اخذ واعطاده بیتمز توکنمز
تحفلقلر وار : مثلاً بوماصه ده پازالغه کیریشن بر صاتیجی
بر کوچک خنچری اون فرانغه صاتمغه راضی اولدینی حالده
سیاحلر بش فرانقدن زیاده ویرمدکلر یچون اوتہ کی ماصه یه
کچور ، عین خنچری یکر می بش فرانغه صاتیور !
طوغروسی بوراده آلمق قاریشیق برمسأله اولدینی کبی
صاتمقده قاریشیق برمسأله . مع مافیه بولغز تجارتی
استفاده لی بر صورتده حله موفق اولان بر معتاد صاتیجیلردر .
بوجهتله بونلره آنجق آلمانیا ناک یونان مالیه سنه کوستردیکی
امنیت قدر بر حصه اعتماد تخصیص ایتک موافق بصیرت

اولسه کرکدر ... بتون بوتراسه آلیش ویریشلرنده
 اڤاز آلدانانلر هیچ برشی آلمق نیتده اولیوب بالخاصه
 اکلنمک ایچون بازارلغه کیریشنلر ، قیمت حقیقه سی
 اوچ فرانق اولان شیئه برفرانقدن زیاده ویرمینلردر :
 بونلره صاتیجیلرک برر یان باقشله آتدقنری سهام انفعالی ،
 صوکره عمیق برمایوسیتله ایچلرینی چکهرک ساکتانه
 اوتہ کی ماصیه کچدکلرینی تماشا ایتمکده کوزل برمضحکه
 لذتی وار ؛ هیچ شبهه یوق او آندہ تاجر پرفتور قلباً :
 « البته بن سنک ده بکنه جکک برشیئی اله کچیریم ! »
 دییور . عددی نیلده کی کیلرکی مجهول اولان بو صاتیجیلری
 جدی برتهورمایوسانه ده دوشورنینه مصریلردن برفرقه در :
 میلان ساحرلری .

بوصوک خدعه کارلر کلنجه الدن اله کزن اشیاهپ
 طویلانیور ، هرکس النده کی شیئی صاحبنه فیرلاتیور ،
 هر بازارلق فجأةً انقطاع ایدیور ؛ بتون قهوه خانه خلقی
 تراسه نك کنارنده کی پارماقلغه قوشیور ، یایاقلدیرمی
 اوزرنده کی ساحر افاعینک تماشای مهارتنه طالیور .
 ساحر اوموزنده کی طور به دن نه قدر سویمسز حیوانلر
 وارسه هپسندن برر نمونه چیقارییور : صیره سیله اورومجک
 بوقلمون ، کرتنکله ، عقرب ، میلان ساحرک سیاه ،

قورو ، چنكلششمش پارماقلىرى آره سنده برر اويونچاق اوليور . بومدهش پارمقلر اورو مجكله كرتنكله يه قارشى برمسابقه چالا كى يه چيقيور ؛ اوايكي آتيك حيوان بتون سرعتلرني صرف ايتدكلى جالده ساحرك پارماقلىرىندن قورتوله ميور ؛ اورو مجك ممكن دكل ساحرك بياكنى آشا - ميور . كرتنكله ساحرك ساعدينه قدر واره ميور . برى صاغ النده ، ديكلى صول النده اولديغى جالده ساحر بونلرله بش اون دقيقه اكلنيور . صوكره نوبت شعبده بازى بوقلمونه كليور : ساحر بونى فسنه ، كوكسنة ، انتاريسنة قويهرق متناوياً قرمزى سياه ، ماوى كوسترييور . دها صوكره عقرب كليور ، مدهش برقوجه عقرب ! ساحر بونى آووجنه آليور ، صول النك پارماقلىله حيوانك قيصقاچلرينه طوقونه رق قيزدييور ؛ عقرب پرتور زهرلى قويروغنى قالديرنجه ساحر حيرتفرما برسرعتله حيوانك قويروغنى ديبندن ياقاليه رق هر حركت تسميميه يه مانع بوتهللكلى عمليات برقاچ كره اجرا اولونيور .

نهایت بونلر صيرسيلاه طور به يه اعاده اولندقدن صوكره على التقريب برحق مترو طولنده برقره ييلان چيقيور : ساحر بونى طونونك پاچه سندن صاليوير ييور ، اوچقورينك يانندن چيقارييور ؛ كوكسنة صوقيور ، قولنك

يکندن يا قالیور . قالديرم اوستنه براقیور . ییلان قاچارکن
 برغریب ایصلق چالیور ، حیوانی ینه کندی یاننه عودته
 مجبور ایدیور ؛ حیوانك اغزینه توکوردکن صوکره
 قالديرمك برطرفه فیلاتیور ، ینه برغریب ایصلق — فقط
 بودفعه کی ایصلق اولکنه بکزه میور — چالهرق ییلانی
 دوشدیکی نقطه ده حرکتسز براقیور ، صوکره ینه بر ایصلقله
 یاننه چاغیریور . اکصکره ییلانك باشنی شهادت پارماغیله
 باش پارماغی آره سنده صیقه رق حیوانی بر باستون حاله
 کتیریور : بومانیتیزما عملیاتی ایله مسخره لغه نهایت
 ویریور . قره ییلان براوزون عصاکی دیم ديك النده
 ایکن ساحر غایت مضحك بروضع وتبسمله باش اکهرك
 بخششه منتظر قالیور ؛ بو ائنده بعض زوزك سیاحلر
 ال چیریورلر . یا یا قالديرمی اوزرینه مصرک باقیرا ونلقلری
 یکر میلکلی غروشلری یاغیور ...

بتون بو صووق حیوانلر تشهیر اولنورکن ساحرک
 اطرافنی چویرن چوجوقلر کاه برندای خوف ایله
 قاچیشیور . کاه برادای حیرتله حایقیریشیور . کاه کولو -
 شیورلر . تراسه اوزرنده کی ماداملردن بعضیلری برطور
 استکراه ایله باشلرینی چویریورلر ، بعضیلری قورقوب
 چکیلیورلر .

يىلان ساحرلارنى مايمون ، شېك اوينانانلار تعقيب
 اپدييور : بونلر ك بزم بيلدكلر مزله فرقى يوق ...
 اوزبكىيه باغچه سنده صوك بر كزىنتيدن ، صوك دفعه
 اوله رق مصر عسكرى موزيقي سنى ديكلد كدن صوكره
 يول چانطه مى تنظيم ايتك اوزره غروب دن اول عودت
 ايتدم ...



اون دردنجی مکتوب

سویشدن

بوصباح ، ترهن سویشه متوجهاً قاهره استاسیونندن
حرکت ایتدیکی زمان قلم لبریز اسفدی ؛ اوقاتدن طولانی
تسکین ایدیلهمین آرزو مجتمعاً اهتزاز ایدیور ، بتون
روحی برسنه سوزنك هوای تخریشی ایچنده براقیوردی .
برافتراق مجبوریدن صوکره اوراده ، واغونی طولدوران
یابانجیلر آره سنده قالمش کبی ایدم . اطرافده بریسی
دها شیمدیدن او یومغه چالیشیور ، بریسی بررومان اوقیور ،
بریسی نظر ثابتی برخولیای تسایت آریور ، بعضیلری ده
— بومکتوبك محری کبی — پنجره لر اوکندن کچن
الواح سریعه یی تماشا ایدیوردی . غریبدر : ترهن
نه قدر سرعتله حرکت ایدرسه واغونلر داخاندی کی ولوله
حیات اوقدر پست وخفیف اولیور ؛ یولجیلر شدت
سرعتدن مبهوت کبی قالیورلر ، ترهن سیاحلری آره سنده
معارفه بر معتاد ایلک موقفدن صوکره باشلا یور ، موقفلر
کچلدکجه معارفه یوکسلیور ، قوتلشیور ؛ برقاق ساعت
صوکره بتون واغونده کیلر آره سنده بر آشنالق ، عادتاً

دوستلق كې برشى حاصل اوليور ؛ بوالفت موقتہ بعضاً
صوك موقوفده براسف افتراق حاصل ايده جك درجه قوتى
بولىور . ايلك وسيله مصاحبه على العاده يولجىلردن برينك ،
كندى كندينه سويلنير كې ، اورته يه آتديغى ملاحظات
سياحت اوليور :

— قطعه مصر يه كه لوب ده سويس قانالى كور مكسزىن
دونوب كىتمك : طوغروسى بو طرز سياحته عقم ايرميور .
ياخود :

— بنم بو قطعه ده الكزياده شايان حيرت بولديغم شى
نه منفيس خرابه سى ، نه اهراملر ، نه ده فراغنهك آلتش
عصر دنبرى بوزولمايان مومىالريدر .. ايستر كولكز ،
ايستر تأسف ايدكز : بنى بوراده الكزياده متعجب ايدن ،
اوت افنديلر ، الكزياده متعجب ايدن ضيا ايله حرارتدر .
بويله على الاكثر عبثياته مستند بردءوى اوزرينه
مدهش برملاطفه يه يول آچىليور ؛ هر يولجى ادراك
وظرافتى نسبتده سوزه قاريشيور ؛ بعضيلرينك قولى
آچيق قهقهه يي ، بعضيلرينك اعتراضى كىزلى تبسمى ،
بعضيلرينككى برانكار عمومى يي دعوت ايدىيور .
برمائدء ذوقيه اوزرينه آچىلان مباحثه ، كاه اوليور كه
بر ساعتدن زياده سورويور : مصادمه افكاردن بارقه

معارفہ چیقیور ! یو لیلر آره سنده کی برودت هر کس
کندیسنی مجهول بر صاحب الیتک بر دعوتلیسی ، مسافری
کبی تلقی ایدیور : ییلا نیش سیاسی خصوصتله وارنجیه
قدر هر حس باردیو لیلر آره سندن چکیلیور ، بر فرانسه
بر آلمان ایکی انکلز کی قونوشه بیلیورلر ...

سویشی قاهره یه ربط ایدن خط بر موقوفه قدر قاهره
اسکندریه خطی ایله بر لکده کلیور ، نیک ساحل
یسارینی تعقیب ایدیور : بو مناسبتله بر کره دها قوجه
نهری آهسته روان کیلری ، صاری طالعه لری ، محصولدار
چامور لری ایله تماشایه فرصت بولیورم . نیک بویار چه سنده
کیلر غایت آغیر کیدیور ، هر کینک باشنده بر آدم النده کی
اوزون صیر یقله عمق نهری معاینه ایدیور : هر کون
اوزرنده کزدکلری حالده بو کیجیلر بیله نیک حقایق
جغرافیه سنی بیلمیورلر . بو عظیم نهر اونلر ایچون بر دوست ،
فقط حقیقت وماهیتی مجهول و سحر آمیز ، ثباتسز
بر دوستدر ؛ هر نقطه سنک عمق باشقه ، بر نقطه سنک عمق
هر کون قابل تبدلر ، زیرا کتله مائه نیک اراضی
مجهوله دن کتیر دیکی صلصال محصولدار بو کون بو نقطه ده در ،
یارین یو وارلانیر ، بر نقطه دیگره قدر کیدر ، بر مدت
اوراده توقفدن صوکره یکی بر آرامگاه آرامق اوزرهینه

جریان نهره قاریشیر . بوجسیم چامور کومه لری بوکون
سیرسفائنه مساعد بر نقطه یی یارین کوچک بر جزیره
حالنده نهرلر یوزینه چیقاریر ... ابوالمیا هک بو استعداد
تحولنی بیلدکلری ایچون کیجیلر دائمی برلرزه هراس
ایچنده درلر . بر قعر مجهول اوزرنده بیفرار طالغله لری
تعقیب ایدرکن طائفه لردن بری دائما عمقی تحری ایدر .
بعض نقطه لرده حرکت اوقدر کو چلشیور که کیلرک یلک لری
اینور ، یولجیلرک نصیبه حیاتی بریدکچینک بازوی هوسنه
تودیع اولونیور . بوتوجه ، توانادره نک قوی طالغله لینه
قارشی بیویور ، برکمی یی سور وکله ینیدجکی صرف ایتدیکی
مساعی عضلیه آلتنده ایکی قات اولیور ، تونج رنکنده کی
ظهرنده پارلدایان ترلر ، ایجه بالدر لرنده شیش طامارلر ،
غیرتلاغنده خورولدایان نفسلر برر فریاد استرحام کی
روحی تحریش ایدیور . بر آهنگ تشویق ایله میرالدایان
چوجوقلر ، قادینلر هریدجکی یی تعقیب ایدیورلر .

تعقیب ایده جک بریدجکی بولامایان چوجقلر کنار تده
قوملر ، چامورلر ایچنده یووالانیورلر ، بونلری طالقلری
لعب غرییدن آنجق ترن ایقاظ ایده بیلیور . اوزمان
چامورلو سیالرنده برر محلا آبنوسپاره کی پارلدایان ذکی
کوزلرینی واغون پنجره لینه دیکه رک ، دست رجا لینی

سرعتله کچن واغونلره اوزاته رق برصدای دلخراش
ایله : « باقشیش ، باقشیش » حایقیریشیورلر ، تره نك
ولوله حركتی آره سنده بزبونشیده تسلی ایشیده بیلپورز ،
او قدر شدتله حایقیریشیورلر . بیهوده برصیحه ؛ زیرا او قدر
عنیف بر صورتده کچپوررکه اسعاف مسؤللری کیمسه نك
خاطرینه کله میور . بلکه بونتیجه یی اوسائل یا ورولری ده
بیلپورلر ؛ فقط نعره سؤاله او قدر آلیشمشیرکه عادتاً
بوغازلرندن برعکس العمل نتیجه سی کی غیر اختیاری
اوله رق صادر اولپور . بلکه بونعره یی فائده دن منع ایدلسه لر
مضطرب اوله جقلر ...

ساحل نیلی ، حالا ساحل نیلی تعقیب ایدیورز :
کنار جویبارده کی مزروعاتک عرصه سبزینی براینکچی
نهرز مردین تشکیل ایدیورکه اوده نیل کی منحنی .
نیل کی تأثیر بادلخفیف ایله مواج ، نیل کی اوزون ..
گاه و بیگاه تارلاسنی سورن بر مصری ، نیلدن طولدردیغی
دستی باشنده اولدیغی حالده کوینه عودت ایدن برقادین ،
برخرما آغاجی آلتنده سنویلشن برقاق سرسری کورو-
یورز که تره نك کورولتیسندن متأثر اوله رق بروضع
تنپورانه ایله باشلرینی چویریورلر ، « بو قدر عجله ایله
بو بدلالر نره یه کیدیورلر ؟ حیات بو قدر عجله ایده جك

درجه ده قيصه ميدر ؟ » مألئ اشراب ايدە جك برنظر
استغراب واستفهام ايله واغون پنجره لرينه باقيورلر ...

بتون بوصاف شيلرك ، بوصاف آدملك تماشاى
آنئ حياتى روحه برسكون تسليت ويريبور . بوسكون
ايله تا اوزاقده كى كويلرى ، دها اوزاقده متموج بركتله
بخار كى طاغلى تماشا ايديبورز . طاغله نيل آره سى
تنها ، مزروع بروادى : ساحل يسارنده قومه غلبه ايدن
نيل ساحل يمينده مغلوب اوليور ؛ او طرفده قطعه مزروعه
برمترو عرضنده برخطدن عبارت قاليور ، او طرفده
قوم اعلان غاليت ايديبور ، بو طرفده صو . نيلك داخنده
يرير اينجه ، ظريف ، زمردين آطه جقلى ، نيلك فوقنده
رنكارنك قوش كومه لرى وار . بوكومه لر نور و حرارت
ايچنده لرزه دار شوق و آهنگ ، مست و مدهوش ، كاه بر
ساحلدن ديكريمينه كچيور ، كاه نيل اوزرنده كى كوچوك
آطه لردن برنده ضيافت الحانه طاليور ...

آرتق ساحلدن آيرلوق ، شيمدى آنجق نيلك صوك
يادكارى اولمق اوزره يلكنلرى ، هيجان وسعتله مملو بر
بياض كوكس كى تتره ين مثلى يلكنلرى كوره بيلوردق .
آرتق آثار حيات بيتيوردى ؛ شيمدى صوك كچى سورولرينى ،
صوك حقير كلبه لرى تماشا ايديبوردق : هپسى حقير

ومتروك ، سفيل وانزوا كزین ایدی ، فقط برضیای سفید
 آلتندہ یاییلان بوسفالت وحقارتدہ بیلمم نصل برملاحت
 خقیہ ، برسکون عظمت ، بروقار ساکت واردی . بتون
 کلبہلر قبارمش برر مزار ، بررخیمہ موت کبی حزین
 وابکمدی ، یالکز برکلبہدن اینجہ بردومان خطی - یکانہ
 نشانہ حیات - چیقیوردی ، آسودہ ، خواب آلود
 بردومان کہ کویابوقریہ ساکتہ اوستندہ اویومق ایچون
 طوغروجه سمایہ توجه ایدیور ، اورادہ آنجق قابل
 رؤیت برسحاب رقیق حالندہ یاییلیور ، یاییلیور ، اوجاقلہ
 سما آره سندنہ برخط اشتراک اولیور ، کیم بیلیر ؟ بلکہدہ
 اوجاق باشنک راز صمیمیسنی قوشلرک سحاب ترنمنہ فاش
 ایدیور .

هوای نسیمی صاف ، حرکتسز ، هرطرف پرنور
 ایدی . تضییق ضیا ایلہ سما یوکسلیور ، صولیور ؛ پک
 یوکسک ، پک صولغون برسما اولیور ؛ بتون اوقبہ واسعہ
 صولغون برمائیلک ، مضی ، طاتلی ، باغین ، عادتا مرضی
 برمائیلک حالندہ قالیور ؛ یورغون برسما ی نقاھت کہ
 اوکسور وکدن شکایت ایدن نحیف کوکسلری زیرضیای
 تسلیتنہ دعوت ایدر کبی کورونیور .

شیمدی طاغلر بتون بتون اوزاقدہ سیال ومبہم

برمنظره آلمش ، یردن سمایه طوغرو یوکسان برربیاض
بولوط کبی قالمشدی . آرتق صوک آثار نباتیهیه ، صوک
خرما آغاچلرینه وداع ایمک اوزره ایدک : بو آغاچلرک
منحنی داللری اوستنده قوم ذراتی اینجه برنقاب زرین
تشکیل ایتمشدی ، کیم بیلیرنه قدر وقتدنبری محافظه سکون
ایدن بواغصان متوکلانه رنگ حقیقیسی اونقاب آلتنده
نازنین برراز ملاححت کبی قالمشدی . خمسین دیدکلری
باشدید اسمدکجه بوجهان را کد و مرضی دیکشمز ، هرشی
سعادت وفلا کتدن ، ذوق والمدن ، بتون آثار حیاتدن
خالی اوله رق درین بر موازنه آسایش ، بیتمز توکنمز
بر آهنگ حضور و سکون ایچنده قالیر ...

آرتق چوله ، پایانسز چوله چیقشمشدق ، آرتق هیچ
برشی ، هیچ بر نقطه قالمامشدی که کوز اوراده بر تسلی
طراوت بوله بیاسین ، غریب بر حظ احتضار ایچنده هرشی
باغین ، هر طرف بی حیات ، بتون بیابان بی حدود بر سکوت
عمیقده نأمدی . بور کودت خواب ایچنده آنجق ترهن
- راکب اولدیغمز ترهن - بر رؤیای اهتزاز کبی گذار
ایدیور ، بو کائنات عطالته موقت برر عشه حیات ویزیوردی .
تره نک غمغمه حرکتندن ، لو قوموتیفک خرخره انفا سندن
باشقه برسس ، باشقه بر اثر زندکانی یوق ، کویا بر حریق

نامتناهی بتون بوواسع صحرالری قاوورمش ، شو عظیم
 مشهر مماندن باشقه برشی بر اقامش ... پارلاق برضیا
 - هر طرفدن نبعان ایدر کی - بتون منظره دن منعکس
 اولیور ، کوز بومنظره دن قاماشیور ، بریتابی عصبی ایله
 بلا اختیار قاپانیور . هر نقطه توز حالنه کمش بر جام پارچه سی
 کی بر شدت باصره فرسا ایله پارلیور . بتون چول ،
 بتون دریای ریک سوزان بویکرنکی خرما نفرمود ایله
 حدور رؤیتک نقاط انتهاییه سنه قدر دوام ایدیور .

بویابس ، حرکتسز ، حیاتسز شیلرک تماشایی برمدت
 موقته ایچون قلبی ترویج وتسکین ایدیور ، اشیای محیطیه
 کی قلب ده بومدت طرفنده بتون کرد باد حیاتدن آریله رق
 بی حس ورا کد قالیور . فقط بومنظره فروزان پیشنده
 اوزون بروقفه بصریه یه نه کوزده ، نه ده روحده تحمل وار :
 حواس کی وجدان ده بو شدت ضیا ، بو شدت خموشی
 ایچنده یورولیور ، بر خمیازه تعب بتون عدم تحمل عصبی یی
 اعلان ایدیور . انسان بونور و حرارت قارشیی هم او یومق ،
 هم متحس قالمق ، هیچ اولمازسه او یومقسزین کوزلرینی
 قایامق ایستیور . چونکه نظر تماشا لاینقطع یکپاره بر صفوت
 بلوریه ایله تترمین سمایی ، بریبوست مضيئه ایچنده یانان
 بادیه یی افقک تا اوزاقده سیال بر قوس منور کی کورونن

حدود مهمه سنی ، آنجق بویکرنک ، بوتابفرسا شیلری
 احاطه ایده بیلور ، هیچ برطرفده بر آرامگاه رنکین
 بوله میور . اوته ده بریده خفیف مور کولکه لر ، رقیق
 رنکله حاصل ایدن ملاعب ضیائیه استننا ایدلدیکی حالد
 پانوراما همان هیچ دکیشمیور . دأما اوچول ، دأما او
 سما ، دأما اوجلای نورانی ... بویکرنکی طبعته قارشی
 عصبه بصریه بر تعب استغنا کلیور . کوز قاپاقلری
 دوشیور ، حدقه بر ظلمت فیزیولوجیه ایچنده استراحت
 ایدیور ، انسان اویومقسزین رؤیایه ، طوفان متعب
 ضیادن اویوشان کره عین قویو مور برقرانلق — که
 رنک ضیایک لون متممیدر ، — ایچنده بر بلده خیالیه رنک
 منظره لایه سی ، کولکه لر ، قبه لر ، آنجق فرق
 ایدیلن کاشانه لر ، مور آغاجلی مشجره لر ایله محاط
 اوله رق دیکلنیور ، روح بوجهان ظلال ایچنده بر آردلق
 برسیای منوری ، کیم بیلر هانکی نسیان نا پذیر خاطره
 قلبیه یی احیا ایدر کی اولیور . روحک بورؤیت آتیه سی
 بتون متاعب عینیه یی اونوتدوره جق بر خیالی مکافاتدر .
 ایواکه حقیقه عودت ایتک لازم کلیور ؛ حقیقت
 بر بیوک قایا کی بوتالاب خیالاته یوارلانه رق ینه دماغی
 موجه دار اشـمیزاز ایدیور ؛ ترهن طورییور ، یکی بر

مخاطبه کلمش ؛ کوزلرمزی آچق ، طالديغمز آرام
عصیدن آیرلق ، نسیان نا پذیر خاطره قلییه یینه قعر
حافظیه ترك ایتک لازم ...

سویس خطی اوزرنده کی موقفلرده — چونکه
آرتق قاهره — اسکندریه یولندن آیرلمشوق ، — یرلی
قادینلردن باشقه برشی کورلیور ؛ موقوف نرده ؛ بیلت
نرهدن آلیور ؟ بورایه اینلر نرهبه کیده جک ؟ هپ
مجهول. دمیریول بونجه دیزلمش قادینلر ، چوجوقلر —
حقیر نباتات انسانیه ! — یوزلرنده اشعه شمسیه قارشی
آچلمش براشمیزاز الم ، آرقه لرنده بسیط براوزون
انتاری ، برر هیکل عطالت کی طورویورلر ، قادینلرک
دریلری آتشین بر توزله دائماً دوولمکدن ، کونشک
محرقت شعااتنه دائماً قارشی طورمقدن عادی برکاوساله
حالی آلمش ، طراوتلری ملاحظلری بوانقطاعسز احتراق
ایچنده غائب اولمش ؛ آرتق هیچ بریسنک یاشنی تخمین
ایتمک ممکن دکل ؛ هربری عضوی ، سیاه ، حرارت
غریزیه ایله متحرک برکتله ماده کی قالمش ؛ یالکیز
کوزلری بر چفت شبچراغ آسود طرزنده برجلای
حیات ایله پارلدايور ، زواللی قادینلر ... چوجوقلر
متجسسانه واغونلره باقیورلر ، دمیر قفسلر ایچنده کی

حيوانات وحشيه يي سير ايدر کي متحيرانه بر پنجره دن
 اوته کنه نقل نگاه ایدهرک بزی کوزدن کچیریورلردی ؛
 کندی والدهری کبی قادینلر آره سنده بیوین بو
 چوجوقلر بی شبهه سوسلو بر مادامی بر اعجوبه خلقت
 صانیورلردی ، کاه و بیگاه بر چوجوق یاننده کی چوجوغک
 قولاغنه یولجیلردن برینه دائر بر ملاحظه معصومانه
 فیصله ییور ، آرقداشنگ نظر دقتی بر پنجره ده دعوت
 ایدیورلدی ، بعضاً برسوز ، بر فیصیاتی قولاقدن قولاغنه
 کچهرک بتون خطی طولاشیور ...

تره ن نا محدود چول ایچنده اوکسوره اوکسوره
 اسماعیلییه کلنجهیه قدر طبیعتک منظره عمومیه سی کبی
 موقفلرک شکل وحالی ده دکیشمیور . بتون بوموقفلرده
 نظر دقتی جلب ایدن برشی وار : بورالرده میل تسئل
 یوق . مصرک مرکزی شهرلرندن اوزاقلاشدجه ،
 اوروپالیلرک اوغرامدقلری تنها کزین قریه لره یاقلاشدجه
 مرض سؤالک خفیفلشدیکی کورولیورا . اوروپا مدنیتک
 هنوز اوغرامدینی بوکوشه لرده معاملات صرافیه نه قدر
 مجهول ایسه تسئل ده اوقدر نا معلوم ؛ بونلر بورسه
 ایشلمکی بیلمدکلری کبی آووج آچنی ده بیلمیورلر ،
 طاتلی جهالت ! غالباً قاهره کبی ، اسکندریه کبی بیوک

شهرلرده ، باخصوص اهرام جواری کبی مواقع قدیمده
 تسلك اوتصور سوز نسبتله رسیده اواسی برقاج سیاح
 ریاکارک ساخته جو مردلکی سایه‌سنده اولمشدر ؛ قولایجه
 تدارک معیشت یولنی کورنجه بر زمان تارالرده چالیشانلر
 صاپانی ، طاراغی ترک ایتمش ، اوروپالیرک کذرگاهده
 « باقشیش ... » ترانه‌لسوزینه باشلامش ، زواراجنبیه‌نک
 کمیتی ایله متناسب بر درجه‌ده مسئله محلیه‌نک مقداری
 آرتمش .. اک غریبی شوکه مسئله‌نک کثرتندن اک زیاده
 شکایت ایدن ینه آوروپالی سیاحلر اولیور ، کچلم !

غروب شمسدن اول اسماعیلیه واصل اولدق .

سویس قانالی مناسبتیه متوفی خدیو اسماعیل پاشا زماننده
 برنسیتی آلان بو موقعک استاسیونی آوروپانک کوزل
 موقعلرندن بری کبی مکمل ؛ بوراده موقف بونجه
 دیکلیمش منتظم آغاچلره وارنجه‌یه قدر ، یورغون
 کوزلری ، باخصوص اوزون بر چولک بیتمز توکنمز
 بوش منظره‌سندن یورولان کوزلری ترویج ایده‌جک
 هرشی وار ... بر چاریک ساعت - بوراده کی مدت
 توقف - بر استراحت حسیه ایله کچدی . ینه یوله ، ینه
 چوله عودت ایتدک .

کیتدکجه سویشه ، قاناله یا قلاشیوردق . مع مافیه اطرافک

چوللره مخصوص تنهانی حال دوام ایدیوردی ؛ صحرای
ریکی انجق بریر بر قاج چالی دمتی نقطه لیور ، یکرنگی
منظره داخلنده قورو ، سیاه برر تهکم نباتی ، خسیس
برر پیرایه الم تشکیل ایدیوردی ...

بر آره لق چولک ثابت طالع لری آره سنده بیوک بر
واپورک بتون آرمه سیله اوج دیرکنی کوردک : بوقانالدن
کچن بر سفینه ایدی. قانال کورونمور ، صوکورونمور ،
یالکیز دیرکلرک قوم اورته سنده قایدینی کورولیوردی ..
آرتق کونش کنار افقه کلش ، اقشام اولمشدی .
منظره نك چهره نهاریسی دکیشیوردی. ضیایه ، حرارته ،
یبوسته ، هر شیئه بر خفیفلك کلدی ؛ آرتق قوم کتله لرنده
ثقلت قالمش ، صانکه بتون تپه لر بر مس-تویت ملاعیه
المشدی. کولکه لر ماویلشیور ، قویولانیور ، قاراریور ،
پارلاق نقطه لره طاتلی بر صولغونلق چوکیوردی . افقده
لذیذ بر پنبه لك بلیریوردی ؛ بر پنبه لك ، فقط شمال
سمالرنده اقشام بولو طلرینه یاپیشان تکلفسز پنبه لك دکل ،
بر پنبه که اثر کبی ، خیال کبی لطیف ؛ انجق حس اولنه بیایور ،
کوندرك حیات ضیادارینه بر خائمه لایقه تشکیل ایده -
بیله جک بر پنبه لك که بر قاج دقیقه ظرفنده طوغیور ،
بیویور ، تکمیل حیات ایدیور ؛ بر دقیقه اول سمانک

نصفه استیغاب ایتش-کن بر دقیقه صوکره افقده بللی
 بلیرسز بر قوس کی قالیور. بر دقیقه دها صوکره جوف
 کائنات ایچنده ارییور، انجق طبقه شبکیه ده براهتر از
 نوشین براقیور.

دیار حاره نك بتون شفقی بوپنبه لکدن عبارت قالیور؛
 بوندن صوکره بردومان لرزه سی هر طرفی طولاشیور.
 برارام احتشام ایچنده پیدر پی هرشی غائب اولیور،
 افق منکشه رنکنه کیریور، سما برکراب لاجوردی
 حالی الیور. قویوماوی بر کیجه بتون منظره یی مکوکب
 قانادلری آلتنه چکیور...

کیجه اولدی؛ کهکشانشان برطاق مرصع کی میان
 آسمانده پارلادی. برقاق یوز مترولق بر مسافه ده سویش
 شهری بتون نقاط مضیئه سیله بر برج ارضی کی کورو-
 نیوردی. غروب شمسدن برقاق ساعت صوکره ایدی که
 اوبرج ارضی به داخل اولدق.

یول چانطه لر می یوکه نن عرب چو جوغنه :

— « اوتل بل نه ر » ه ... دیدم .



اون بشنچی مکتوب

سویشتن

بعض شهر لر وارد رکه نه ابنیه تاریخیه سی ، نه آثار مشهوره سی ، نه ده زراعی ، تجاری ، صناعی بر خصوصیتی وارد در : سوق وقوعات ایله بر قاچ عائله کمش ، اوراده برسکنای موقت تشکیل ایتش ، صوکره آهسته آهسته عائلات موجوده نک مقداری ایله بر لکده غدد مساکن آرتهرق اورتهیه بر شهر چیقمشدر . ایشته سویش بونوع بلده لردندر . قانالک کشادن اول بوراسی بر کوچک کوی ، بحر احمرده کزن کیلرک حقیر بر اسکله سی ایدی ؛ صندالجیقله کچین ، بالقله بیله ن بر قاچ یوز کشی بوراده خسیس بر نصیبه حیاته قناعت ایدیوردی ؛ کوی ترقی ایده میور ، عدد نفوس حس اولنه بیله جک درجه ده دکیشمیوردی . طبیعت بر مخلوقک اتساع سعادت ایچون لازم کلن هر واسطه یی بورادن دریغ اتمشدی : بتون اطراف هر امید زراعتی یکنظرده اولدورن بنخیل ویابس بر چول ؛ ایچه جک صویوق ؛ حرارت جوویه درجه عتدالک تحملسوز بر نسبتده فوقنده . . یالکز بوارض موانه

براز مشفق کورونن بردکز وارکه اوده مبذول بالیه لبرله
 آنجق کوی خلقنی ضبطه قادر اوله بیلوردی . بتون انقه
 شامل بر نظر هیچ بر نقطه ده بر تبسم زراعی ، بر ذره نباتیه
 کوره مز ؛ منظره تا اوزاقلرده کی اوبوز طاغلرله محاط
 بر قبولقدن ، حزین وسوزان بر بادیه تهادن عبارت ...
 بو عالم بی حیات ایچنده بر بلده بختیاری ترقیه نائل
 اوله بیلیمک ایچون فوق العاده بر حادثه ارضیه ، غیر مأمول
 بر نعمت سماویه یستر ؛ قاناک عملیات حفریه سی بو بد بخت
 اسکله ایچون عادتنا اوله بر فرصت اولدی . بوکون بر دینه
 بشریه کی قریه ایچنده بر قاق یوزمهندس ، اون بیک قدر
 عمله ، یوزلرجه ارباب اخذواعطا ورولدی .

بوراده سوزی ، ساکن اولدیغ « اوتل بل نه »
 صاحبی اختیار فرانسزه ترک ایدیورم :

— کورملی ایدی : اونه حرکت ، نه حیات نه اخذواعطا ،
 نه شطارت . نه ایام مسعوده ایدی ! کوندوز آتشین قوملر ،
 آتشین روزکارلر ، وجودی قاووران شعاعات شمسیه
 آره سنده آقشامه قدر یورولاننر غروبدن صوکره
 چادرلره ، کلبه ره طاغیلورلر ، بوش چولی شوق و شراب
 نقراتی ايله طولدورینورلردی . هر کس چوق چالیشیور ،
 چوقا کلنیور ، دایما قازانیور ، لاینقطع صرف ایدیوردی .

سویس یرلیری ایچون بونفال مسافر لر شن وشاطر
 بر خزینه قارون ایدی، عمله نك جیی کویلیلرک انه کشاده
 برخاتم طائی کیسه سی اولدی . حظ و سروز ، کسب
 و کار ، سورونشاط ایچنده آنجق چولک قوملری اعصار
 خورده آسایشنی غائب ایدیور ، متصور قاناله یول
 و یرمک ایچون یالکز قازمه کورک ضرباتیه قوملری
 حضور ایدیلیوردی . نیل وادیسى هراشتهای بطی یی
 تسکین ایده جک بر مبدولیتله بوستانلری سویشه نقل
 ایدیور ، نقد وانشراح کبی هرشیدن بر فیضان و برکت
 کوریاوردی . یالکز برا کسیکمز واردی ، همده بونی
 پک شدتله حس ایدیوردق : اوت ، بوراده ایچه جک
 صوبوله میوردق ؛ دوه یوکلریله نانیلدن کلن صو هم
 یتشمیور ، همده بزه اسکی بوردوشرابی فیائنه کلیوردی .
 ممالک معتدله ده کونده برقچ کرده ورموتله ایصالنمغه
 آایشان بوغازلر مز بوصیجاق چولده صوسزلقدن
 یانیوردی ؛ هن بر مز بتون بر نیلی ایچیویره جک بر حمای
 عطش ایچنده ایدرک . عمله هر کونکی قازانجک قسم
 اعظامنی صویه صرف ایدیور ، ینه معدده سنده کی حریق
 احتیاجی سوندوره میوردی . اوزمان موسیو دوله سپسک
 دماغنه ایی بر فکر تبادر ایتدی : کوردیکمکز قانال

آچیلدی ، نیل صوی بورایه قدر کتیرلدی .

فی الحقیقه سویشه دمیر یول بونجه کلن علی التقریب
بر یچق مترو عرضنده بر قائل حال نیل صوینی سویشه
قدر کتیریور . بو فی کور مشدم ؛ اختیار مخاطبی تصدیق
ایتدم . او ، برایکی نفس پیپوسنی چکد کدن صو کرهینه
سوزنده دوام ایتدی :

— آه ، اوصوسزاق دورنده حضرت موسایی نه قدر
آرامش ، عصای موسی سایه سننده ریان اولان قوم اسرائیله
نه قدر غبطه ایتمشدک : بیلیرسکز که قوم اسرائیل جبل
حورب اوزرنده شدت عطشدن شکایتیه باشلا نیجه جناب
کلیم عصای اعجازینی یره وورمش ، اون نقطه ده لذت بر منبع
بولمشدی ... عملیات حفریه اون سنه دن زیاده سوردی ؛
بومدت ظرفدن سویش قریه سی هر کون بر آز بویودی ؛
اوتلر ، یره خانه لر ، غازی نولر ، قافه شانتانلر آچیلدی .
فرانسه ده سود کلرینی ترک ایدوب کلن عمله نك نقرات
تحسینه تلرک اهتزازاتی کوروکلرک نفحات مؤثره سی ،
بتون آلات موسیقیه نك آهنگ عمومیی قاریشدی ،
بالولر ترتیب اولونیور .. کنج ، اختیار ، هر کس آز چوق
صیچرایوردی . بو ذوق و انبساط ایچنده هیچ کیمسه
یور غولنه نی طوی یور ، کونشدن یاندیغنک فرقیه

وارده میوردی . یوزلر مژك جلدی بیاضدن بایات تره یاغی
 رنگنه ، دهها صوکره سودلو قهوهیه دوندجه روحمز
 پارلایور ، حیاتمز صانکه براقلاشی-وردی . قارناوال
 زماننده وندیک نصلسه سویش کیجهلری ده اوپله اولمشدی .
 عملیات ختام بولدقن ، رسم کشاد اجرا اولندقدن
 صوکره بیله بو حیات مستانه دوام ایتدی . واقعا قانالک
 اجرا آت حفریه سیله کچینلر چکیلمش ، کیتمشدیلر ؛
 فقط بوناره مقابل قانالدن کچن کیملرک بتون محتویاتی
 هرکون سویشه دوکولیور ، کیدنلرک براقدقلری بوشلنی
 طولدوریوردی . اوزمان پورت سعید عادتاً هیچ موجود
 دکلدی . قانالک مرکزی سویش ایدی که آرتق بر شهر
 بویوکلکنی آلمشدی . بوکون پورت سعیدی اکلندیرن
 وابورلر بوراده اکلنمکه مجبور ایدی . کیجیلر ، یولجیلر
 کینک ساعات توقفی سویش عالم شطارتنده کچیرلردی ؛
 هرکس کیدسه سنک ثقلت ووسعتنه کوره رقاچ یوزفرانغه
 قدر برپاره یی بورایه براقدقجه کچه مزدی . صوکره مدهش
 بررقیه کبی پورت - سعید طوغدی ؛ اندیشه ویره جک
 برسرعتله بویومکه باشلادی . آرتق کوزل کونلر برر
 برر بزه وداع ایدیور ، یکی طوغان بختیار شهره تبسم
 کوستریوردی . بوراده یاواش یاواش موسیقی سکوت

ایتدی ، رقص بیتدی ، عشق و بهار شرقیلری ایشیدلمز
اولدی ، قافه شاتنانلر قاپایدی ... برکله ایله اجمال ایدیم :
سویش وفات ایدی . بوکون کوردیککز حزین بلده اک
ولوله لی برعید سفاهت ایچنده آنجق اون بش سنه قدر
یاشامش برشهرک نعش باردندن باشقه برشی دکدر .
بن بوشهرک طوغدیغی کورمدم ؛ فقط بتون کنجلیکنی ،
بتون دور سعادتتی ، صوکره بتون اختیارلغی ، بتون
ایام احتضارینی تماشا ایتدم . اوت ، بواقامت ایتدیککز
اوتلک اوتوز سنه یی کچن عمری بومتباین منظره لر
قارشیدینده کچدی ... برشهر برانسان قدر بیلله یاشایه ماسین :
پک آجی . پک شایان مرحمت برطالفسزلک دکلی ؟

پرکو اوتلجی سنکوت ایتدی ؛ فقط بوتخظرات
کندیدینده پک کوزه چاربه حق برتأثر وتحسر حصوله
کیرمشدی . بن بیسکوی ایله چوقولاته آر.س.سند
برشهرک بتون سرگذشتی قارشیمده کی شاهد تصویر پرداز
لسانندن دیکلدم . بو اختیار آدمک بر مارسلیالی لسانیلله
فرانسز کله لرینی بیرته رق سویلدیکی شیرلر بکامفید کلمکدن
زیاده خوش کلیوردی . کندیدینی دهاسولتمک ایستدم :

— بوراده کز یله جک ، کوروله جک بریر یوقی ؟
— خایر ، مع التأسف هیچ برشایان تماشا یر کوره میورم .

بورایه کلن سیاحلردن بری نتیجه مشاهداتی اوله رق : « قوم ، ینه قوم ، دائماً قوم ... » دیمشدی ؛ هر زمان بوطوغروسوزی تخطر ایدرم . ها ! باقکیز ، اکر مطلقاً بر موقع زیارت ایتمک ایسترسه کز « بئر موسی » یه کیده . بیلیرسکیز ؛ بیلیمم نیچون بعض سیاحلر بورایه پک چوق اهمیت ویریورلر ؟ زیرا بوقویولرک جبل حوربدکی منع لطیف کی حضرت موسی ایله مناسبتی تاریخ مقدسک روایتیله مصدق دکلدر . بوندن باشقه بوزیارت ایچون صویک اوته طرفنه کچمک لازم کلیر که بوده اک ساکن هواده اوچ درت ساعت مناسبتسز بر بارقه ایچنده یحضور اولمغه موقوفدر . وکلفتی اختیار ایتدیککزه کوره مشاهده ایده جککیز شیلرک تاریخی ، جغرافی ، یاخود فلسفی یردکری اولسهیدی ینه مشتریلرمی بوسیاحتیه تشویق ایده رم . فقط برقاق نحیف وناتوان خرما آغاجی آلنه کیزلنمش برقاق آجی صوقویوسندن باشقه برشی کوره میه جکسکیز ... ها ! صحیح ، خرما آغاجلری آرسنده قورولمش موقت میخانهلری اونو تدم ؛ « بئر موسی » لقبه آلدانوبده اورایه قوشانلرک بتون حکایاتی اومیخانهلردن شکایاته منحصر قالیور ؛ عنواندن باشقه بوردو شهرزی ایله مناسبتی اولمایان برشیشه شرابی

اینانیامیه جق فیاً تلرد صاتون آلد قلمرینی آکلا تمده بتون
سیاحلر متفق در ... شیمدی ، اکر ایسترسه کز ،
یده ییلیر سکز .

سوییده یالکز بر کون قاله ییله جکدم ؛ هیچ باشقه
بر محذوی اولماسه یالکز بش آتی ساعتک لزوم صرفی
نی « بئر موسی » یی زیارتدن منعه کافی ایدی . او موقع
مشهور حقنده اختیار اولدجیدن آلدیغ معلومات مهکمانه
ایله اکتفا ایده رک شهر داخلده بسیط بر جولانه قرار
ویردم : اوئل صاحبک سویش حقنده کی حکم حاضرینه
کوره بوجولان بسیط بر اشریح نعش ، بر فتح میت ایدی . . .
نیشتر سز ، یالکز بر تماشای لاقیدانه ایله اجرا ایتدی کم
بوشریح نظری هیچده اوزون سورمدی : چونکه
سویش آنحق بر قاچ یوز مترو طولنده بر تک جاده ایله
مفتخر بر حزین قصبه دن باشقه برشی دکل . شهری آهسته
خطوه ایله بویدن بویه قطع ایتک ایچون بر چاریک ساعت
مع الزیاده کافی . قصبه نک اخشاب . بویالی — علی الخصوص
قویو قیرمزی بویالی — خانه لرنده شایان دقت بر معماری
هندی تقلیدی وار : هر خانه « وهراندا » تعبیر ایتدکلی
واسع بالقون ایله دائراً مادار محاط . جاده نک ایکی طرفده
وهراندالر سراپا برر اورولمش سیت کی بنالره آسیلی

طورييور . غريب برظرافتدن خالى اولمايان بواقصاي
 شرق شكل معماریسی بورایه نصل کلمش ، ا-کندریهیه ،
 قاهرهیه نیچون طاغیلمامش ؟ عجبا بوخصوصیت سویشه ،
 هندستان مواردات بحریه سنک ایلمک اسکله سی اولدیغندمی
 عارض اولمش ، یوقسه بوده استعدادعرقینک بر اثر ظاهر-
 یسیمی ؟ زیرا مصریلرک اصلنی هندستانک ارجاع ایدن
 مدققلر نادر اولمادیغی کبی هندستانک امتعه مختلفه سیله
 برلکده شکل مخصوص معماریسنکده سویشه داخل
 اولمش بولنمی مستبعد دکلدر . بومعمای معمارینک
 حلی عالمده ترک ایدرک اوکلن طعامی ایچون عودت
 ایتدم . سما بتون بتون بولوطسز ، پک یوکسک . خفیف
 بررنک وسعت ایچنده غائب اولمش کبی ایدی : اشمه
 ضیائیہ برسلسبیل آلاو طرزنده شهر و صحرا اوستنه قائماً
 ریزان اولیور ، بتون ذرات طبیعی برحریق نهانی ایله
 قاووریویوردی . اوتلده هر کس صیجاقدن شکایت
 ایدیویوردی ؛ لوندره دن کلمش ایکی « میس » بوکونکی
 حرارتی کانون ثانی آینک شهرت شمالیه سیله هیچده
 متناسب بولمقلرینی سویلیورلر ، اندام ملاحظلرینی بر
 نزاکت حریریله ایله خفیفجه کتم ایدن اینجه قورسازلری
 اللریله طالغه لاندیره رق کوکسلرینی یلپازهلروردی ؛ ملائم

برلیلاق رایحه سی یمک ضالونتی آهسته آهسته تعطیر
ایتدی ...

وکلن طعمانی تعقیب ایدن آتشین ساعتلر ممالک
حارده بر معتاد خواب و آرامه مصروفدر : کونش
یو کسلدکجه هر کس کیزلیر ، بر سایه حارایچنده رخاوت
عصبیه سنی دیکلر ... کونشک إشعه مهلکه سی هر آرزوی
حرکته مانعدر : بوالیمده اولوم علی الا کثر پارلاق بر شعاع
شمس وزرنده کلیر ؛ مهلک محبتلر تلقین ایدن صاریشین
قادینلرک نار کیسوسی یرینه -- چونکه بواقالیم آنحق
حس اسمر یتشدیره بیلیر -- کونشک زرین ومغفل نار
ضیاسی قائم اولور ؛ اوکلن ساعتلرنده قارشیسنه چیقان
بصیرتسزلری شعاعات حرار بلام ندامت قربان قهری
ایدر ؛ بی حدود چوللر ، بوچوللر اوستنده بر رشامت
مجنحه کی طولاشان خونخوار قوشلرنه فجائی فجیعهلرک
شاهدکتومی اولمشدر . قیش کونلرنده کدی مملکتیمز
ده صوؤقدن تتره دیکمز صرده خط استوا اجوارنده
طولاشان اجزای انسا یته غبطه ایتیمه لم : هر دوره حیاتک
بعض امراض خصوصیه سی اولدینگی کبی هر کونه ارضک
کندینه مخصوص پک چوق آفاتی واردر ...
غروبه ایکی ساعت قاله آنحق اوتلدن چیقہ بیلیم ؛

دکز کنارینه کادم . بحر احمرک نفخات معتدله سی
 کوندوزک خاطره حرارتی اوستنه بر مروحه تسلیمیت
 صالایوردی . اشتیاق واشتها ایله تنفس ایدیوردم .
 الفاظه لزومندن زیاده اسناد اهمیت ایدرلر بحر سیاهک
 صولرینی ایس رنگنده ظن استدکری کبی بحر احمرک
 سطحنی ده قیرمزی تصور ایدرلر ، بوضور بعضاً بر اعتقاد
 وجدانی درجه قوتنی آلیور ، اوزمان اعتقاد وجدانینک
 قدرت تلقینیه سی بر غلط بصری یه سبب اوله رق —
 حقیقته هر دکز کبی ماوی اولان — بحر احمر بر لجه
 خونین کبی کورونیور . باقکز اوروپالی بر سیاح نه حکایه
 ایدیور : « بولد ، بر حادثه عجیبه کبردک که زمان قدیمده
 بودکزه بحر احمر نامی ویرلرلر سببی شهه سز بویله
 بر علامت مایه اولمشدر . کوچک طالغیلر اوزرنده آهسته
 آهسته قایوب کیتدی کمز صرهده بلا سبب ظاهری بردنبره
 صویک رنگی دیکشیدی . ماویلاک غائب اولدی . بتون
 امتداد نظر من دائره سنده امواج دم کبی قیرمزی ،
 متحرک بر سطح دریا منکشف اولدی ... بو غریبه سحر
 آیز هانکی تأثیر نا کھانی سایه سنده ظهور ایتدی ؟ »
 اکر بو سیاح صافدرونه جواب ویرمک وظیفه اولسه
 ایدی : « اسکی بر اعتقاد باطلاک تأثیر تلقینسی سایه سنده ! »

دردم... بحر احمرک عنوانندن بشقه هیچ بریرنده خصوص-
 صی بر قیر مزباق یوقدر ، اوده هر دکر کی ماوی . هر
 دکر کی کاه ساکن ، کاه متلاطمدر . مع مافیه هیچ بر
 دکرده کورلمه یین بعض خصوصیات و ارکه بونلری آرامق
 بودکره یچون بحر احمر دینلوبده مثلاً بحر اخضر یا خود
 بحر اصفر دینلمه یکنی دوشونمکدن فائده ایدر . فی الحقیقه
 بودکرده بر طاقم خرده بینی حیوانلر یا شیور بوعضویات
 غیر مرئییه شابلر ، مرجانلر کی بمض تشکلات معدنییه یی
 انشا ایدیور که باشقه بر دکرده امثلی یوقدر . شوخصوص-
 صیت اوزرینه فیک نظر دقتی مجلوب اولدی ؛ ده ایلک
 تحقیقاتده آکلا شلدی که بودریای مستشانک طبقات
 عمیقهنی تشکیل ایدن صولرده خصوصاً بر حرارت
 نسبیه واردر ؛ اوکرچک حیوانلر بر حرارت سایه سنده
 یا شیورلر . طریق تدقیقاتده دائماً « یچون » لرتوالی ایدر :
 اوخرده بینی مخلوقالک بوراده یچون تکثر ایتدکلری
 آکلاشیانجه بوحرارتک مستثنی اوله رق بودکرده یچون
 موجود اولدیغی صوروشدیرلمغه باشلادی . نظریات حلیه
 بری برینی تعقیب ایتدی ؛ نهایت فراسه فنون آقادیاسی
 اعضاسندن موسیو « ژانسن » بومساله یی همان همان مقنع
 بر صورتده حله موفق اولدی : بودکرکه طبقات

عمیقہ سندنہ کی حرارتک سببی قعر دریادہ هنوز تمامیاہ
 سونمہ مش بروولقانتک اندفاعات حاروسی ایمش ؛ بویوک
 دکز براسکی برکانتک واسع دهانہ سی اوستندہ طورییور۔
 مش ، بوکشف مهم دکزک بتون غرائب حیاتیہ سنی
 توضیحہ مدار اولدی : از آن جملہ بحر احمر اطہلرینک
 برقسمنی تشکیل ایدن جزائر برکایہ نک نرہدن چیقیدیغی
 بیلنہ میوردی ؛ شیمدی بونلرک برراندفاع بزکانی کومہ سی
 اولدیغندن هر ~~کس~~ متفقدر . اک غریبی ولطیفی شوکہ
 بوسایہ دہ بحر احمر لقبنک سبب وضعی دہ آکلاشیایر کی
 اولدی : زمان قدیمہ ، هنوز اندفاعات برکایہ پک شدتلی
 ایکن عناصر تارہ سطح بحرہ قدر چیقیور ، برمنظرہ
 آتشین دکزک رنک اصایسنی اخفا ایدیوردی ؛ بوحوالی
 کورنلر بودکزہ بحر احمر عنوانی ویردیلر . کشفیات
 فنیہ سایہ سندنہ فیلولوژی مراقیلیری دہ نمون اولدیلر...
 « اوتل بل نہر » صاحبنک شکایتہ جدأحق وارمش :
 تا اقصای شرقدن جاوادن ، یوقوہامادن کلن کیلر پک
 بی وفایانہ برادا ایلہ کچوب کیدیورلر . طیفون فیرطنہ لرینک
 تہدیدات مدہشہ سنہ کو کس کرن بومتین سفینہ لرک قطع
 ایتدکلری یولی ، اوغرادقلری اسکالری دوشوندم :
 اوقطعات ارضیہ حقنہ کی معلوماتم اوقدر آز برشی ایدی

که جهلم بنی تترتدی ؛ جاوا کله سی فکر مده آنجق هانری
 قونسیانسک « باتاویا » عنوانی بریایغی رومانی ، چاپونیا
 نامی ایسه عجائب رسملی طباقلر ، کاسه لرله لوتینک برقاچ
 کوزل حکایه سنی اخطار ایتدی . کندی کندیمه دیدم که : «
 بزم بویوک قباحتلر مزدن بریسی رومان مطالعه سیله تربیه
 فکریه چالشمق دکیدر ؟ . . . » چاپونیا حقنده
 « قریزانتم » حکایه سنندن آلدیغمز معلومات ایله اکتفا
 ایدیورز ، مینادو حضرتلرینک مملکتنده بعض ارککلرک
 آدی « کوکرچین » ، بعض قادینلرک اسمی « کلبک »
 اولدیغی او کریمک بزه یتشیر صانیورز . سوزن تجسس
 بیله بزه : « جدی اثرلردن بواقصای شرق خلقنک ،
 خصوصی برطرز مدنیت کوسثرن بو عرق اصغرک روحنی
 تماشا ایدیکیز . . . » دیمور . یوق ، بنی اکر ایسترسه کز
 رومانلره حرمتسنز لکله اتهام ایدیکیز ، برتهالک معرفتجایانه
 ایله رومانلره قوشدیغم زمانلره آجیورم . . .



اون آلتنجی مکتوب

رحمانیہ واپورندن

غروب شمسدن بر ساعت اول سویشك دو قمر
ساحلی ترك ایتدك . هوا پك صیجاق ، واپور پك
غلبه لقدی ؛ اقشام اولمش ، فقط حرارت دها مندفع
اولماشدی . هر كس تعرق وازدحامدن شكایت ایدیور ،
مندیللر هم سونكر ، هم یلپازه كبی قولانیایوردی .
لمیاندن خیلی آچیلدقن صوكره قاووشدیغمز خفیف
برصای مسایولجیلری كوندورکی هوای آتشینك ویردیکی
عسرتلی تنفسدن آنجق قورتاره بیلدی . آرتق حرکات
صدریه بر سهولت مسعودانه ایله جریان ایدیوردی ؛
آرتق سیاحلر کندیلرندن آفاق افولدن بر ذوق تماشا
ایستیه جك قدر مساعدۀ قوت بولورلردی . كوش
خفیف بولو طلك تشكیل ایتدكلی جزائر سیم و صدف ،
جزائر خون و ذهب آره سنده بی تاب و ناامید بر قضا زده
طبیعت كبی بایغین و همان حرکتسز طور یور ؛ پك بطی
و عادتاً غیر محسوس بر سقوط اختضار آلود ایله کنار مغربه
ییقیلیوردی . كائناتك افقده قان آغلایان شو عظیم قلب

ضیادارینی قبه سما پک رقیق برکودی آرام وصفوت
ایچنده لاقیدانه تماشا ایدیوردی . یولجیلرسه کونشدن ،
سمادن زیاد . دکزه باقیورلردی : ضیای غروب بتون
سماحتیله الوان سبغهسنی بی مثال براییک-قالیچه طرزنده
دریای را کدک سطح بی پایانه یامش ، دکزه اک مشکلدسند
برمارکیزی مجبور شتاب ایده جک بردیب ی تیرازه فام
ملاحظتی اعاره ایتمشیدی . بحر احرری ایلک کورن اسکی
آدملر صویک بومظره مغضله سنه تصادف ایتسه یدیلر شو
دکزه شبهه سز « بحر قزح » عنوتی ده-ا مناسب
کوررلردی ... بواقایمک صباحث افولیه سی نظر فریب
اولدینی قدر سریع الزوال : برقچ دقیقه ایچنده کونش
ادوار احتضاری امرار ایدیور ، لب طبیعتیه صوک بوسه
سکوتی تودیع ایدهرک یکی اقایملرک تازه صباحلرینه
طوغرو قوشوب کیدیور . برآز اول برعید کاه الوان
حالنده کوان اطراف شیمدی مبدء لیلک حوض ابدیه
دو کدیکی قطرات ظلام ایچنده آهسته آهسته غائب اولیور ،
برخوشی وقور هرشی صانکه برجوف احترام فرمود
ایله احاطه ایدیوردی ؛ آنجق سمت رأسده برسیاهی
مکوک ، آشاغیده لرزان ومبهم خطوط مضیئه سیاه برسمای
دنعکس قالمشدی ...

آقشام طعامنده بتون برنجی قماره یولجیلری
 حاضر دیلر : شورای دولت اعضاء کرامندن عطف و قتل
 صالح رشید بك افندی حضرتلریله مملقات نجیبه سندن
 دوت ذات برای حج ینبوعه کیدیورلردی ؛ بونلردن
 باشقه سبودان سفرینه مأمور رانکلیز ارکان حرب
 بیکباشیسی ایله خدیویت مصریه طوبجی قائمه قاملرندن
 بریسی و مادموازل غریفال همشیره لرینک ماصه سنی اشغال
 ایدیورلردی. یاشلری یاریم عصری کچن بوتوأم همشیره لر
 ادوار قبل الطوفان موده سنه موافق سرپوشلری ، انکلیز
 قادینلغنک مساعده ایده بیله جکی درجه فیلسوفانه قیافتلری
 ایله ایکی عادی میس اولمقلرینی آکلاتیورلر ، انظار دقت
 وحیرتی جلب ایدیورلردی : بر درجه ده که غالباً ایکی
 همشیره یی اوزرلرنده طوپلایان عیون تجسس تعذیب
 ایتدی ، بو عذابدن قورتالمق ایچون کندیلرینی طانمق
 ایسته دیلر : بوایکی همشیره برینک بیلدیکنی دیگر
 بیلمه مک شرطیله اونوز لسانه آشنا ایمشیر ؛ هم نه لسانلر !
 آثوری ، کلدانی ، عبرانی ، سریانی ، قدیم ، یونانی قدیم ،
 مصری قدیم ، چینی ، هندی ، عربی ، فارسی و حتی ترکی !
 بونلردن باشقه بو کون او وپاده تکلم ایدیلن بتون
 لسانلری ده بیلورلر مش . . . بر حکیم مشهورک دیدیکی

کبی انسان پک چوق لسانلر اوکره نیر، فقط یالکز برینی
بیلیر که لسان مادر زادیدر : اوتوز اسانه آشنالقدن
بحث ایدن شواییک همشیره برر مستثنی کبی اوقاعده حکمتی
تحکیم ایتیمورلردی ؛ طعام اثناسنده انکلز جه دن
باشقه فرانسه و ترکیه سویلدیلر، فرانسه و ترکیه لرینی آکلامق
ایچون بتون قوای دقتمزى صرفه مجبور اولیور و آنجق
اعانه سیاق و سباق ایله مجرای مکالمه یی تعقیب ایده بیلور دق..
ترکیه لرینی آکلامق ایسه هیچ ممکن اولمدی، ترکیه ظن
ایده رک میرلدا قلمری شی بزم لسانمزه اوقدر آز بکز-
ییوردی که ابتدای امرده آثوری یا خود کلدانی سویلیور لر
ظن اولوندی. بویله یکرمی اوتوز لسانه واقف، مستثنی
مخلوقلره تصادف ایتدکجه خاطر مه قاردینال متزوفاتی کلیر:
معلومدر که صوک زمانلرده وفات ایدن بومشهور قاردینال
سویلیمک، اوقومق، یازمق شرطیله سکسان ایکی
لسانه — اوت، سکسان ایکی لسانه ! — آشنا اولدیغی
ایچون و اتیقان ترجمانلغی ایفا ایدردی ؛ بو اعجوبه
هزار لسانی زیارت مقصدیله علمای جهاندن پک چوغی
رومایه قوشارلردی، فقط غریبی شوکه، تقدیر و حیرتله
عودت ایدن پک نادر بولنوردی، حتی قاردینالی کورن
برلمان فیلسوفی حکایه ملاقاتنده : « اوت سکسان ایکی

لسانی سویلیور . فقط طبق برپایان کبی . . . تکلمه
مقتدر ، فقط مصاحبه دن عاجز . قولانغدن کیرن کلمه لره
دوداغندن جواب چیقیور ، ایشته بوقدر ! عوامل
ادرا کیه سی بخار الفاظ ایله متحرک بریروح ومنفعل ما کنه
کبی ایشلیور ؛ بتون مغزی بیوک برمحفظه کلمات حالنه
ککش ، ملکات سائره فکریه سی قورومش ، سونمش .
برپیانو فلان وفلان پرده لرینه تماس ایدیلنجه فلان وفلان
سسری ویردیکی کبی قاردینالده فلان وفلان کلمه لری
ایشیدینجه فلان وفلان کلمه لره مقابله ایدیوردی . . . »
دیمشدی . فی الحقیقه دماغ بشر یالکز برلسانه بیله عسرتله
تحمل ایدر ؛ چونکه لسان برمزیت موهوبه دکل برملکه
مکسوبه در ؛ فرد بشر طبعی اوله رق ناطق دکلدز ؛
هیأت بشریه افرادینی تعلیم و تربیه ایله جبراً انطاق ایدر .
بوجهتله سکسان ایکی لسان آلتنده قالان بر دماغ
خردخاش اولسی پک ضروریدر .

یمکدن صوکره کو کرته ده یاصلانمش سیغاره مک منبه
دومانی تنفس ایدیوردم : فکره سیغاره مدن چیقان
دومانک حلزون راجعنی تعقیب ایله قطعه مصریه یه طوغرو
عودت ایدیوردی ؛ برقاق کون برروح بختیار کبی شوق
وسرور ایله اوزرنده پویان اولدیغم اوارض نفیس بتون

سکنه سی بتون حیاتی ، بتون تاریخی ایله پیشگاه دماغده ،
 کشاده قالدی : آه ، بولوحه عظیمه هانکی نقطه نظر دن
 شایان تماشا دکلدی ؟ تاریخ ترقینک مقدمه ضروریه سنی
 تشکیل ایدن ایلك ظنون واعتقادات بورادن چیقمش ..
 ایلك اباطیل ایله فکرك ایلك اضطرابات شک وترددی
 بوراده ترجمه ایدلمش .. وجود روح ، لطافت روح ،
 بقای روح فکرلری بوراده طوغمش ایدی ؛ آسیادن
 کچن برفرقه مهاجره طرفندن عشاء متشتته ابتدائه
 آفریقانک قعر مرکزینه و باخصوص سودان جهتلیینه
 طوغرو سورولدکن صوکره نشو ونمایه باشلایان مدنیت
 مصریه ایلك دور اوهام و خرافاتی تأسیس ایتدی ، ایلك
 مهد اباطیل قطعه مصریه اولدی ؛ فقط بونیکله قالدی ؛
 صره سیله مهد صنایع ؛ مهد فنون ، مهد فلسفه ونهایت
 اون طقوزنجی عصر میلادیده مهد ثروت اولدی .. اوت ،
 مهد ثروت ! بر زمان اسکندریه یه تحصیل علوم ایچون
 کلنیردی ، بر زمانده کسب ثروت مقصدیله شتاب ایدلدی .
 هله شوپری حکایه سنی دیکلیکیز :

على التقريب آلتمش سنه اول یانی آنطونیادی
 اسمنده اون درت یاشنده برچوجوق لمنی آطه سنده اقامت
 ایدن والده سنک اللرینی اوپیور ، اسکندریه یه کیدوب

چالیشیق ایچون استیدان ایدیور، یالواریور، آغلایوردی.
 احتمال که خانه مادر دن قاجیق ایستین بوسر سری نورسیده.
 نك قلب تحسر خواهی ایله والدۀ مشفقۀ نك روح مرحمت
 پناهنده شایان تصویر و تحلیل نکات حسیه واردر،
 باخصوص که والدۀ یك فقیر، چوجوق یك مائل احتراض
 ایدی. فقط بن حکایه یی چابوق بیتیرمک ایستیورم:
 چوجوغك ایلک تضرعاتی رده مقتدر ایکن تهدید
 واصرار شکلی آلان صوک رجارینی آرتق والدۀ قبوله
 مجبور اولور؛ چوجوق آرتق ارض مصره کیده جک
 برسفینه نك لیمانه کیرمسنه منتظر قالیر. برکون بیاض
 یلکنلری سیاه توزه بورونمش بوکومور کیسی منی اوکنده
 طورور، آفریقا ساحلنه وارمق ایچون بادماسب بکلر.
 او هوا ایله اسکندریه متوجهاً لیمانی ترک ایدن بوکمی
 ایچنده کنج یانی انطونیادی سالخورده برملاح کبی باشدن
 باشه قوشیور، یلکنلری آچیور، خالاطلری طوپلایور.
 دی؛ بر ساعت اول ایکی بوسۀ وداع آره سنده والدۀ سی
 بوچوجوغه بتون ثروتی اوله رق اون دانه باقیر غروش
 تودیع ایده بیلیمشدی... یانی انطونیادی الی سنه قطعه
 مصریه ده نه ایله مشغول اولدی؟ بونی، باخصوص
 انطونیادی به نسبت قرابتی اونلر، بر آغیر سنك سکوت

آلتنده مصرانه مدفون براقق ایستورلر . هر کسجه شوراسی معلوم که وفات ایتدیکی زمان یانی انطونیادی ایکی میلیون لیرالق بر ثروت ترك ایتمشدی و آرتق یانی انطونیادی دکل میستر جون اندونیاس تسمیه اولنیوردی . جبنده اون دانه باقیر غروشله مملکتندن چیقان در بدر چوجق مصر بانه لرینه محور حرکت اولمش ، اسکندریه نك اك نفیس باغچه سنی اله کچیرمش ، دو قلرك ، پرنسلك آماج غبطه سی کیلمشدی . . .

بویری حکایه سی اسکندریه ده عادی بر وقعه کی جریان ایتدی ، هم ده میستر جون اندونیاس تك ، بی نظیر بر بختیار دکدر : آوه روف ، زاردوزاکی ، صور صوق ، هپ جوار نیلده احراز یسار ایتدیلر .

کیجه ، سیاه و مظلم بر کیجه بتون بتون حلول ایتمشدی ؛ ظلمت عمومیه یه یالکز اجرام سماویه نحیف ولرزان بر طبقه غبار منور دو کیوردی ؛ زیر مزده دکز صانکه بر لیل مذاب ، اطراف مزده هوا صانکه بر بخار ظلمت ایدی . المده کی سیغاره بقیه سی آتشی ایله بر لکده بر قوس شراره چیزه رك دکزدوشدی . هوای بحری یی طول دوران ذرات رطوبت رقیق بر یا غمور صورتنده تکائف ایدیو . ردی ؛ قارمه چکیلمك لازم کلدی ...

ایکنجی کون :

بوصباح واپورك وقفه ناکهانیسیله اویاندم . بو واپور-
 لرده غیرمنتظر برتوقفك قلبه القايتدیکی شدت خلدجانی
 تعریف ایتمك قولای دکلدر ؛ یالکز تصورایدملی که شاب
 دکزنده سیاحت ایدیوردق ، بغته واپورمرك قعرینه
 تصادف ایدن برشاب کتله سی بزی محو ایده بیلیردی .
 بوغریب دکرك هر طرفنده نامتناهی حیوانجققلر بوشاب
 کتله لرینی ، بودامکاه بی امانی تنظیم وانشا ایله مشغول ؛
 هر سینه یکی شابلر کشف اولونیور ؛ هر یکی شاب آنجق
 بر بیوک سفینه ایله برکمی طولوسی نفوس بشریه بهاسنه
 خریطه لره کچه بیلیر . هر خطووده بوتلهکلی جزائر
 تحت البحر دن بری اوزرنده تهلهکلی برروبصونلغه دوشمك
 احتمالز وار ؛ شئون بحریه ایچون عادی براستطراد بیله
 تشکیل ایده مین بو احتمال هر سیاحك قلبنده هر دقیقه
 تتریور ... واپورك سکتہ نابهنگامی روحده تترهین
 احتمال مهلکی شدتله ایقاظ ایتدی : بر آن ایچنده نظرکا-
 همده صانکه هیچ برشی قالمدی : آنجق بر حیاتم واردی ،
 برده اوکا صارملق ، اوندن آیرلماق ایستهین بن ؛ مدهش
 برجوف بی حدود ایچنده قالمش کبی اولدم ؛ بتون عمر
 گذشته م ، بتون خیالات و خاطر اتم ، بتون سودکلام ،

هرشی نهایتسز بر کرداب نسیانک قعر نامرئیسندہ صانکہ
 نہان اولدیلر . خردسوز بر شعر ممت ایچندہ موجودیت
 متزلزلہ مک انین وداعی ایشیدم . حکیم شہیر اسپنوزا
 « هر موجود وارلغندہ دائم اولمق ایستر » دیور ؛ بو علم
 الحیاۃ ضرب مثلنک حقیقتہ موافقتی تجربہ شخصیه ملہ
 تصدیق ایتدم . شہہسز اوکون دنیانک ال بختیاری
 بن دکلدیم ، فقط صاندیم کہ قورتولہ مازسہم ال بدبختی بن
 اولہ جغم ... حب حیاتمک بیلیم نصل بر غلیان عقورانه سیلہ
 کو کرتہ یہ صچرادم : اوخ ، بو حیرت لذیذہ ! خایر ،
 هیچ بر تہلکہ یوقدر ، هر کس مخمور وساکن ، دکر
 را کد و خواب آودایدی ؛ مقوس بر لیانک منظرہ
 سحریہ سی قارشیدسندہ ، لطیف بر صباحک سنبل سہاسی
 آلتندہ آرامکزین ایدک . اوزمان براز اولکی مصارعہ
 صمیمیہ اثناسندہ کریلن اجہزہ عصبیہ مہ بر رخاوت آتیہ
 عارض اولدی ، تھملسوز بر تعب عضلی حسی ایلہ کو کرتہ
 اوستندہ کی قانا پہ یہ چوکدم ، کندی کندیمہ صوریوردیم :
 « بوراسی ، بورادہ نیچون طوردق ؟ »

هرشی آکلاشیلادی : تیہ بنی اسرائیل حذاسندہ ،
 جبل طور پیشکاھندہ ایمشز ؛ غرنفال ہم شیرہ لر اوتوزلیرا
 مقابلندہ واپورک خط سیاحتنی تعدیل ایتدیر مشلر ، شیمدی

بورایه چیقجه جقلمش . عظیم برر عشه تهلکه دن صوکره
ایلاک دین سماوینک منزل مقدسی ، هدایت انسانیتک
درگاه اولینی اوکنده دیکلنمک ! الیاف عصیه مقرون
رخاوت اولدجه اجزای دماغیم پیش نجا همده کی جیل
مبارکه متعلق خاطراتی احیا ایدیوردی : اگرچه نه
صحرای تیه کورونیور ، نه اوصحراده قوم بنی اسرائیلی
قرق سنه بسلهین قدرت حلواسی یاغیور ، نه ده سلوی
قوشلری اوچیوردی ؛ بالعکس سمابوش ، آفاق پک را کد
طور ویوردی ؛ فقط خیال بر حمله ده بتون تقویم اعصاری
چویریور ، سمت اریحایه کملک نیتنه ایکن ظلمه
عمالقهدن قورقه رق وادی تهیده قالان اولاد اسرائیلیه یی
بولیور ، صوکره جناب کلیم علیه السلامک شاهقه طورده
کچیردیکی قرق کونلک دور طاعتی واومدت ظرفنده سمع
موسایه کلن : « لن ترانی ! » ندای نسیان ناپذیر یله پیش
چشم نبوتنده سوزان ودرخشان بر بیوک حزمه حس
حالنده اشراق ایدن دیدار با کمالی وجدانی بر لرزه ابتها
وخضوع ایله دوشونیور ، حضرت موسی علیه السلام
ذروه سیناده مظهر شرف رؤیت اولورکن آشاغیده ،
ساحه تهیده جباره بنی اسرائیلک مصر دن چال دقلری
حلیاتی اصاغه صورتیله سامری بدسکالک میدان چیقاردیغی

« کاو زرین » ی ، بوکا پرستش صورتیله اهل اسرائیلک
دوشدیکي ورطه شناعتی ، ونهایت ضیای حقک بر سعادت
قلیه کبی چشمه سار مروت آلپیه دن فیضانی تحمیدات
فائقه ایله درپیش ایدیور . . روح ، قارشیسنده سیاه
وصامت طوران کوه بالادن بر نوازش هدایت بکلر کبی
قرین وجد و ترقب قالیور . . . طور سینا ، اوخ ، حوالی
لطیفه مصریه ده کشف و کذار ایدنلر ایچون نه موافق
آرامگاه ! .. تاریخ ، جغرافیا ، هر شی بوشبه جزیره
ایله مصر ربط ایتیورمی ؟ مصر یلرک اجداد ابتدائیه سی
بورادن کچمیدیلر می ؟ سویش قانالی بو روابطی نه فک
ایده بیلیر ، نه اونو تدوره بیلیر . قاهره یی ، اسکندریه یی
کورد کدن صوکره طور سینایی کورمکسزین کچمک
سیاحتنامه مده پک حس اوانه حق بر بوشلق براقه بیلیردی ،
قلبا : « غرنفال همشیره لره تشکر ایتلی یم ! » دیدم .
وفی الحقیقه براز صوکره یکی بر کسوه حریمانه ایچنده
کوکرتهیه چیقان همشیره لره تشکر ایدیوردم ؛ بو تشکر
بهانه سیله آچیلان اوزونجه بر مصاحبه اثناسنده خبر آلدیم که
بو عالم توأملر برقاق آی اول طور سینا کتبخانه سنده
حضر عیسی علیه السلامک شمیمدییه قدر مؤرخینک
هیچ بحث ایتدکری اقوال شریفه و حکمیات جلیله سی

ایله مزین بر کتاب کشف ایتشلر ، لسان آثوری ایله محرر
اولان بونادره نفیسه یی همشیره لردن بری انکلیزجه یه ترجمه
ایتمش ؛ بوجمله منیفه نك محتویات حکمیه سی حقیقه عمیق
ونفیس ایتمش ، بو جهته انکلترده فوق العاده جالب
انظار اعتنا اولمش . ایکی همشیره ینه یکی بردفینه حکمت
آرامق داعیه حسنه سیله طور سینایه حقیقه جقلر ، کتبخانه
قدیمی تفتیش ایده جکلر مش . لسان آثوریدن ترجمه
ایتدکلری مجموعه حکمیه نك جناب یسوع علیه السلامه
نسبتی حقنده کوستردیکم علام ترده قارشی ایکی میس
رقابتکارانه بر غیرتله تحمینلرنده کی اصابتی اثباته چالیشدیلر ،
طولو کی ادله تاریخیه یاغدی ریورلردی ، فقط طوغروسی
بکا بودلیللرک — بلکه ده جهلمدنر — بری دیکرندن
سخیف کورونیوردی . بتون برردیه ضمنیه اولمق اوزره
دیدم که :

— شو کشف مهمکز خاطر مه بر وقعه ممائله یی دعوت
ایتدی ، مساعده ایدرسه کز حکایه ایدیم : آینه روز
کتبخانه سنده عصر لردنبری کمال اعتنا ایله محافظه اولنان
بر کتاب واردی ، بيلم هانکی لسان قدیم ایله یازلدیغی
ایچون بو کتابک محتویاتی هیچ بر پاپاس اوقویه مامش ،
آکلایه مامشدی ؛ مع مافیه بتون مناستر هیئت کنندی

سلفنرندن منتقل بر قوله تبعاً بو کتاب مستطابك قدسیت
 وعلویتته اعلان ایمان ایدیور ، کتابی کمال حرمتله
 صاقلیور ، کتاب مناستری زیارته کلنلردن آنجق بر
 صنف ممتازه ارانه اولونیوردی . روایت اسلافه نظراً
 بو کتاب مبیجلده — خاشاک حاشا — حقیقت خرسیانیتی
 غیر قابل رد و اعتراض بر صورتده اثبات ایده جک ادله
 واضحه موجود ایمش ، بو کتابک ترجمه سی خرسیانلغک
 بادی حیات و سعادت اوله جقمش ، کتاب سماوی حقیقی
 بو ایمش ؛ آه ، بر کره متنی معلوم اولسه ایمش ، فقط
 انسانیت تمامیه کسب صلاح ایتدکجه بومیسر اوله میه جقمش .
 ایشته بو کتاب ذی نقاب شو اعتقادات ایله محاط و موقر کن
 بر کون مناستری زیارته کلنلر آره سنده بر سوریه لی پاپس
 بولندی که السنه قدیمه یه وقوف ایله معروف ایدی ؛
 مناسترک کتبخانه سنی تدقیقه باشلادی ، مجهول و نادر
 بر اثره تصادف ایده میوردی ؛ بر کون اثنای طعامده
 مناستر ارکان مهمه سنه قارش کتبخانه نک فقرندن شکایت
 ایتدی . اوزمان ارکان کنیسا بر تبسم تهکمله یکدیگرینه
 باقشدیلر ، بوانظار غالبانه : « او کتاب ، آه ، شوبدلا
 اونی کورسه .. » دیمک ایستیوردی ؛ یکدن صوکره
 مهمان فاضلک بوشرفه نائل اوله جغنی تبشیر ایتدیلر .

مسافر نحرير دها ايلك نظرده بونك آثوريجه يازلمش
برائر مقدس اولديغني آكلادي وترجه سني وعد ايتدي؛
بو وعد نامنتظر بارقه سيف سرعتي ، مژده عيد خنده سي
ايله بتون مناستري طولاشدي : او كيجه مسافرك او طه-
سنده كي قنديل ضياسي سونمدي ، فقط ايرتسي صباح
مترجمك ديده تعينا كنده سرور مأمولدن هيچ برائر
كوروله مدي ، بالعكس پاپاس افندي كمال ياس ايله باشني
صاليورددي ؛ نهايت بومعماي اضطرابي اورته يه دوكددي :
او كتاب محفوظ ، اودفينه حقيقت لسان آثوري يه ترجمه
ايدلمش بر قرآن كريم نسخه سي ايمش !!

سامعه لرم هم متبسم نزاكت ، هم لال تاثر قالديلر ؛
چيقمق اوزره حاضر لانان صديقلرينه طوغرو كيدر كن
مقام وداعده اللريني اوزا تديلر ؛ بزدانه سي ديدى كه :
— مع مافيه بز حقايق حكميه خرستيانيه تحريسنه
كيد يورز .

بنده قلباً :

— ديورتهك فنارله انسان تحريسنه كيتديكي كي ...

جواني ويردم .

اتها







3 1761 09624852 1